



Bodleian Libraries

UNIVERSITY OF OXFORD


This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>





This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.




51. a. 11









COLLEZIONE


DI


COMPONIMENTI SCELTI


IN IDIOMA BOLOGNESE.



VOLUME VII.







CIMA DI MONT' OVOLO

AL PENTAMERÒN
D' ZVAN ALÈSSI BASILE
TOM III.

EL DSGRAZI
D' BERTULDEIN
DALLA ZÈINA

POEMÈT SCHERZÈVEL

D' ZÈISER CRÒUS.



BOLOGNA 1840.
PRESSO L'EDITORE ANTONIO CHIERICI
Libraio in via san Mammolo
alla Lirad' Apollo.



FOLA UTTAVA

El sètt Clumbein'.

Chi fa servezi, trova servezi. Al benefezi strecca sèimper piú l'amizezia, es è una caparra dl'amòur. Chi n'sèmna, n'cuirà mai nieint. Questi ein tútt pruverbi, ch's' ein verificà in-t-el sol ch'avèin cuntà, cmod s'in verificarà di alter in quèlli ch' a cuntarèin.

Zanarèlla era una bona dunizzola ch' una volta steva in-t-al paèis d' Arzan. So maré era tútt cuntèint, perchè ogn aun la i feva un ragazzol, e aqusé l' arrivò avèiren sèna a sètt; mo l' aveva tant da far a tguiri sù tútt, ch' la n' aveva un òura d' bèin, e i fiù stúff anca lòur tgneven dett: mamma fà un poc una fèmna, ch' aqusé la v' sullivarà vù, e z' servirà nú altr' omeu. Vdèndla zà

grossa un'altra volta, tutt insèm i i dessen: oh sinti mamma, fâ bèin una tusètta vdé, s' in chi no nú v' lassèin, es andarèin a zercar furtouna pr al mònd. Basta, quand la fú d'cò, e ch'la n'saveva piú l'òura ch'l'avess d'avèir fiù, i ragazz i dessen: sinti mamma nú andèin lassú in qula muntagnèta, ch'è qué indrett, es starèin aspttar la nova; s'a fâ un masti mitti sú in-t-la fnèstra un calamar, s'la srà una fèmna, mitti-i una ròcca. Quand i fiù fúnn andâ la Zanarèlla sté poc a far una bèlla zaquleina d'fèmna. Lì mèzza alligra, mèzza addulurâ dess alla cmar ch'mittess fora al sègn, mo quèsta qué dalla gran frèzza in vez dla ròcca, mess al calamar in s'la fnèstra; l'our pinsonn ch'al fúss un masti, e tutt instizzé s'la fènn a gamb. I s' messn a camminar, es audonn d'long per tri ann fein ch'i fúnn stracc murt in-t-un bosc, e ch'i mureven dalla fam. I vestn una bèlla cà, e i battènn dmandand la carità d'un poc d'pan, e un busslott d'aqua. Qué i steva un om salvadg, al qual era stâ minciunâ da una donna, che, dòp èsser stâ sig dis ann, la i aveva cavâ i ucc'in quell mèinter ch' al durmeva, e po era scappâ vi cún un bòn buttein: e per sta rasòn l'aveva ciappâ tant odi al fèmen, che cún quant a in psseva avèir tra 'l greinf al t' m' el taffiava. L' om salvadg s' fé sú in-t-la porta, e dòp èssers' bèin assicurâ ch'i fússen masti, a i dé da magnar e da bèver, e po siccòm l'aveva bisògn d' èsser servé, e l'era un om recc, a

idmandò s'i vleven star sig a servir per pan
 in bòcca, ch' alla fein po al i aré dâ quell
 ch' i s' srén meritá. A sti ragazz a n' i pars
 vèira, es azttònn al parté. Lú po s'era fatt
 insgnar i su nom, e quand l'aveva bisògn una
 volta al ciamava *Ciccaréll*, un' altra *Zanbu-*
déll, òura *Passarein*, òura *Nuccètt*, e po
Puncein, e *Pazzaia*, e *Dscargabarél*, ch' al
 i aveva impará aqusé bèin a memoria, ch' a
 n' era dúbbi, ch' al s' affallass. Al i aveva
 dâ dòu stanzi da goder: lòur al serveven, es
 al feven star alligramèint, i s' la cavaven bnein,
 es era zà passá di ann parecc' a sta manira.
 Intant era zà vgnú granda la Cantarèlla, ch'
 era la surèlla d' sti ragazz. Sta tòusa vdeva
 so mader pianzer, e lamintars' tútt i dé, e
 n' far alter, che arcurdar sti sètt fiù ch' l'ave-
 va, e ch' l' era stâ causa qu' oca dla cmar,
 ch' i eren andâ vi d' in cà; e aqusé a i vegn
 voia d' andari a zercar, e la n' feva alter che
 tudnar so mader, e la i rumpé tant al chit-
 tarein, ch' la lassò ch' l' andass vi vsté da pel-
 legreina. La s' mess dònca in viaz, e tant
 dmandava, e tant zercava dand i cuntrassegn
 d' sti sètt zuvnett, che quand al zil vols in-
 -t-un' ustarì dov lâ sté a durmir a i fú dett,
 che in-t-un bosc poc luntan i saveven ch' a
 i stava sètt ragazzon a servir un om salvadg
 orb. La mattina a bunòura la Cantarèlla s'
 mess in strâ, es arrivò prèst dai su fradì, la
 s' i dé da cgnosser, e lòur i fénn tanta zira
 ch' mai. I i dessen po ch' l' om salvadg so

padròn n'psseva vèdr el donn, e per quèst chè quand l'era in cà ch'la stess bèin arpiattâ in-t-el stanzi sòu d' l'our, s' in chi no al l'aré stragualzâ in-t-un bccòn, perchè al l'aré cgnussú all' udour. E po i dessen: sav surleina che qula gatta ch' è sù in qula scranna l' è la speia dl' om salvadg, e ch' al bisògna bèiu ch' t' i dag sèimper la mitâ d' quèll ch' a t' purtarèin da magnar, ch' allòura po la starà quèida, se no a srén arvinâ tútt. La ragazza n' mancò d' far quèll ch' i aveva dett i su fradi, e la parteva la robba cún la gatta da bon' surèll in fena a uu luein. Òura al purtò mo al cas, ch' un dé i su fradi ern andâ tútt in mercâ a far del pruvest, la Cantarèlla anttava dèl zèis da far per mnêstra, e a i scappò mess in bòcca una mèzza grana n' s' arcurdand dla gatta; sta spirta s' l' avé sùbit per mal, e per dspètt l' andò a pissar sòuvra al fug, es l' ammurtò tútt. La ragazza girò tútta la cà scènza pssèir truar al battfug, e per far prèst l' andò planein planein in-t-la stanza dl' om salvadg, dov l' era impiâ, perchè al pateva un gran frèdd, cherdènd d' n' èsser dscverta, mo lú sinteva el doun a nas, cmod a dess, dis: mo chi è qula femnazza ch' gira tra lé? Al saltò in bistia: oh bèin vegna maz dis, aspètta pur la mi zaquleina, ch' t' hà trovâ cún ch' far i tú. Al ciappò la preda da rasur, al l' unzé d' oli, e po cminzò aguzzar i deint per magnarla piú fazilmèint. La Cantarèlla ch' vest ch' el

coss piaven brúta piga, ciappò sù un stanghètt, es còurs assrars' in-t-la so stanza, l'appuntalò l'ùss, e po i mess cònta el banchett dèl lét, un tavlein, del scrann, e tútt qui zavi-ri ch' la pssé truar là dèinter. L'om salvadg andò a taston in quell lug dov al sinteva dl armòur, e trovand l'ùss assrà a i deva di calz e di pugn per trarel' pur zò, ch' al pareva ch'cascass la cà. In st sgumbei al turnò i sètt fradi ch'dmandònn: coss'è mai st pladur? L'om salvadg tútt infuriâ dis: eh un coren; ah i mi bardasson, a savì pur ch' a n' poss suffrir el fèmen', e vù li tgnì qué tra i pi; a sù i gran razza d' becc. Zambudèll saltò sù: chi? Nú? Mo a n'savèin mega ngòtta. La srà una qualc sgualdreina, ch' sé srà ficcâ in cà, in quell mèinter, ch' a n' i eren. Vgnì pur nosc ch' a i farèin la pèira; andarèin dèinter per la fnèstra dalla banda dl'ort. I cundússen dònca l'om salvadg in-t-l'ort, mo da un là dov i aveven fatt una fossa fònda fònda per suppliri dèl perdezz, e quand i i fúnn souvra i t'm'i dénn un gran spintòn, ch' a i cascò dèinter a cò fett, es se scavzò l'oss dèl coll, ch' a n' dess nianc tererè. I fradi tolsen po un badil pr ún, es astuppònn d' tèrra la busa, perchè a n' s'psseva savèir ch' al fúss arvgnú. I andònn a torr fora d'persòn so surèlla dsèndi: hat'mo vest braghira a ch' priguel a sèin andâ per causa to? Pr èsser salv tútt l' ha bsgnâ, ch' amazzamen quell bòn umazz, ma sèinten'mo

un' altra, ch' a la savèin anc quèsta, ch' a i l'avèin sintú dir in insoni in quèll mèinter ch'al durmeva; che sòuvra alla so fossa, quand al sré stâ supplé a i aveva da nassr una zert' erba, ch' aré fatt dvintar tant clumbein' qui ch' l' avessen mai tradé, s' la fúss stâ colta. La Cantarèlla dess: oh no zerto a n'srò min-ciòuna a darev'dann. I destinònn po d' star lé tutt l'inveren fein ch'el strâ fússen bon'pr andar tutt a cà so, e passarsla alligramèint cún la bona pruvisiòn ch'era in quèll sit. Mo a n'passò gran fatt, ch'un dé, ch'i fradì ern andâ a far dla lègna, la sinté un om ch'zigava cm' è un' anima daunâ; la saltò fora dall' úss, e la vest un pellgrein ch' spissinava sangu dalla tèsta, ch' i cuntò ch' in-t-al far arrabir una semia ch'era sú pr un alber tirandi di madon, la i aveva sfrumblâ una pègna in-t-la tèsta, es i l' aveva conza a quela manira. La Cantarèlla s' moss a cumpassiòn e camminò in-t-l' ort a coier dl usmarein e dla salvia, e po cún dèl pan biassû e dl asê la i fé un impiaster, es i al mess sú per la tèsta, es al mandò vi. L'era po dri ch' l' apparciava, aspttand i fradì, la vèd arrivar dèinter dalla fnèstra sètt clumbein', ch' dessen tutt insèm: mo hât' magnâ al zervèll cún al pan, bambozza? te n't'arcurdav'che t'n'avev da coier qu' usmarein lé dri no? Oh guarda ch' braghira, pr andar a medgar la tèsta ai alter, ròmpèr quèlla di su fradì. Vit' cmod a sèin ardútt: per causa to ún d' sti dé a

srèin cuccâ sù o da un sparavir, o dalla puiana. Per nú a n'i è piú rimedi, ch'a tur-nam in-t-al nostr êsser se te n'vâ a trovar la mader dèl tèmp, ch' seppa lì quella ch' z' insègna cossa avèin da far. La Cantarèlla era lé ròssa ròssa tütta murtificâ, es i dman-dava perdunanza, es prumess d'andar a tru-var sta véccia, fússla d'co dèl mònd. Vú alter dis avì da star sèimpr in cà fena ch' a toun-ren, e aqusé a sri sicur, che qué ne v'man-ca da magnar, nè da bèver, pover bstioli. La s' mess po el gamb in spalla, e cammeina e cammeina fena alla riva dèl mar, dov la vest una gran balèina ch' i dmandò: dov andav' bèlla púttà? — A vad dis, in zèirca dla Mader dèl tèmp, guardâ mo vù; la truvaro-ia? — Oh bsgnarâ ch'a muvadi bèin qui zampett, per-chè l'è lontan purassâ. Avì da tgnir dri a sta mareina fein ch' a trovâ un fiúm gross, andâi dri all'insú, ch'a trovarì chi v' in da-rà pova. Mo dis: d' grazia fâm' un servezi, dmandâi cmod a pré mai far pr en' dar tant volt in scoi, e armagner qusé spèss in-t-la rèina. Lì la ringraziò, es i prumess d' fari l'imbassâ, e po seguitand a camminar dri alla riva dèl mar l'arrivò a quell fiúm, e an-dand all'insú dòp un viaz bèin long la s'tru-vò in mézz a un bèll prá tütt cvert d' mar-garitein. Qué la vest una pundgazza, mo che pòndga! L'aveva un par de baffi alla moda, ch'a n'avì mai vest i piú bi. Dov camminav' bèlla ragazza, la i dis, aqusé affannâ e da

per vù? — A vag dalla mader dèl tèimp. — Oh a i vol alter innanz ch' a l' accattadi; vdiv' quell muntagn alti alti? l'è mo iúst là. Mo zè ch' a dscur'ri sig fâm' una finézza, dman-dâi da part, mi cossa a prénn mai far per liberars' da qula razza sfundradòuna di gatt, ch' z' vrén vèder tutt murt. La Cantarèlla prumess anc a quèsta d' servirla. La seguitò po al so viaz, mo pr arrivar a quì mont a i vols dla bèlla e dla bona, ch' i pareven lé avsein, e s' en' s' i era mai: basta quand al zil vols la s' trovò a pê d' sti muntagn, la s' tré a seder stracca morta, ch' la n' psseva piú avèir al fiâ. In quèll mèinter ch' la steva a pònder mèint a del zintunara d' furmig ch' purtavn a cà una gran pruvisiòn d' fur-mèint, e in-t-al passari dinanz cùn la so grana in bòcca, úna, ch' dseva ésser la capuriònna, mess zò la so grana, es i dess: cossa fâv' mai lé bèlla púttà aqusé arscaldâ? Li ch' era tant galant, ch' la s' deva a dir cùn tutt, la i dess ch' la zercava la mader dèl tèimp. La furmiga dis: mo andâ pur innanz anc un puctein ch' a trovarì una gran largura, e lé i srà chi v' mittrâ in-t-la bona vi. Mo a bòn cònt a vré mo ch' a tirassi zò qula vèccia per savèir quâ sré la manira, ch' a psessen campar un pzzol; perchè la z' par la piú gran mattiria, ch' a z' avamen da fadigar tant, e po ch' a z' andamn a far bendir aqusé prèst. Lassâ pur far a me la (mi bstiola, dess la Cantarèlla, ch' a v' servirò yluntira. L' arrivò a qula

largura, e la trovò una gran Querza, ch'feva la piú bèll'òmbra, ch'a i vegn voia d'arpussarsi sòtta: mo bona, la n'stá s'n'a sintir ch'anc la querza i dmanda dov la va. La Cantarèlla i dis una bona volta ch'la zèirca la mader dèl tèimp. La Querza i dis: oh stá pur alligra ch' a i si poc lontan; s'avessi da camminar anc un dé l' è tútt quell ch' i pò vlèir: mo d'grazia zà ch'a si aqusé bleina a sri altertant serviziavel; a vrev ch'a zercassi da li cossa a prev far per turnar in-t-al mi unòur, perchè una volta la mi frutta al la magnava anc la zèint ch'aveven garb, mo adèss i la dan sòul ai purzi. La zuvnetta prumess anc a qustì d' savèiri dir cvèll. Po turnò a avviars', es arrivò a pê d'una montagna tant alta ch' la s' perdeva tra 'l núvel. Lé la trovò un vcein che dalla stracchèzza s'era svultá sú in-t-una múccia d'fèin. Quand lú la vest al l'arcgnussé súbit per qula bona ragazza ch' i avé medgá la tèsta, e li al cgnussé anca lú, perchè l'aveva l' istèss vstiari da pellegrein. Li i cuntò tútt el sòu dsgrazi e tútt quell ch' i era intravgnú, mo vú dis: cossa fâv'qué?—A sòn vgnú pr accustarm'al Tèimp per pagari al solit tribùt, ch'tútt i omen i han da pagar, e savì ch' al Tèimp l' è un zert galantumein che n'la perdòuna a nssúu, e se vú n' i andà, l'è capaz d' vgnirv' a trovar dov a si, e quand manc a v' al pinsá. Me v' accompagnaré per cumpensarev' dèl servezi ch'a m' fessi, mo adèss a n'poss piú

arrampigarem' fena lassú. Dàm dónca mèint. Avì da savèir ch'là sù in zema a qula montagna a i è un malèid d'una cà, che nssùn s'arcorda d'avèirla mai vesta nova. El murai ein tútti dsgrustá, sèinza port, nè úss, nè lètt, nè scrann, perchè i padron n'dormen es en's'arpossen mai. Sòuvra alla porta a s'vèd un'arma inquantá, ch'mòstra un serpèint ch' s'morsga la cò, un zerv, un corv, e una feniz: quèsta è mo l'arma dèl Tèimp, e quèsta è la so cà. Tútta la cà cunsest in-t-una gran sala, dov attaccá al murai a vdrì lem, cord, martì e ògn sorta d'usvei de tútt el-i art; e per tèrra dri alla muraia del zintuara d'vas pein d'zènder cùn di pulizzein, cmod è in-t-i vas di spzial, cùn sù i nom d' Corinto, Sagunto, Cartagine, Troia, e d'tant alter zittá, ch' ein stá dstrútti in causa del prudèzz dèl Tèimp. Arpiattav' dedri da sta cà, fena ch'al Tèimp vein vi, ch' al cgnussrì fazilmèint, ch' l' è un vècc' cùn el-i ali in-t-el spall, e in-t-i pi, che n' stá mai fèirem. Súbit ch' al Tèimp è sguillá fora, e vù scappá dèinter, e d'cò dla loza a vdrì una vèccia purassá brútt, greinza, gobba, e tútta cverta d' pil gruss cm' è el sèdel d'purzèll. La srà a cavall d'un gran arloi da turrèta, ch' la n' l' abbandòna mai per regolarel' ch'a n'svaria mai. Lì n' ve vdrà qusé fazilmèint, perchè l' ha el zeì tant longhi ch' el i craven i ucc', e vù ciappá sù camminand i cuntrapis dl' arloi, e po ciamá la vèccia dsèndi: ahn nunneina, a v' preg ch'a

m' dsadi tutt quell ch' a voi savèir. La ciamarà bèin so fiol, ch' al vegna a magnarev', ma lù n's'prà mover fein ch'vù tgni in man i cuntrapis dl arloi. Turnâi po a dmandar cùn bona grazia, ch' la v' dega ògn cossa, che li per pora ch'nassa di gran guai a tgnir fèirm' al Tèimp la v' cuntintarà. Appèna al vcein av finé sti parol, l'arstò lé mort spant, e la Cantarèlla sté un pzzol a pianzer sòuvrà al mort dal gran dsgúst ch'l'avé, e po fualmèint s'avviò sù per sta muntagna, e a v'imprumètt, che quand la fù dcò la vindeva i anser a bòn mercâ. La n's'fù appèna arpiat-tâ in-t-un cantòn, ch'la vest saltar fora st vécc' ch' aveva una barba ch' spazzava têrra, cùn un fraiulètt aqusé pein d' toppel, ch' a n' i è tant dé in-t-l'ann, cùn sù incullâ del zintunara d'pulizzein, dov i era scrett sù i nom di Rè, di Imperatur, e d'tùtt i omen grand ch'l'aveva stragualzâ, e ch' l'andava tulènd dal mònd d' quand in quand. Appena vest l'al pers d'vesta, e li s'ficcò in cà. La povra Cantarèlla av a inspirtar dalla pora a vèder qula véccia a cavall dl' arloi, perchè a n's'pò dar una véccia piú brúttà d'quèlla; mo la s'fé curagg', la s'i mess sòtta es ciappò camminand i cuntrapis, e in sta manira l'arloi s'fermò sùbit. La véccia aveva un béll sdundlar al pèndol, mo lù n'andava innanz; la s'mess a zigar, e a ciamar al fiol cùn quant fiâ l'aveva, mo al fiol en's'psseva mover nianca lù. Finalmèint la s'parò indrì el zeì, vest sta

ragazza; la i dmandò: chi siv'; cossa fâv'; cossa vliv'? La Cantarèlla s' i tré in znocc' e cún tûtta la manireina la i dess ch' la vleva savèir una massa d' coss. Alla vèccia a i piase tant sta ragazzola peina d' galantari ch' la i prumess ch' l'aré savú ogn cossa, mo dis: basta ch' t'fazz prèst a lassar andar qui cuntrapis, perchè te n'sâ quant guai e quant dsurden prén nasser a fermar al Tèimp. La Cantarèlla ubbidé, es turnò attaccar i pis all' arloi, e in quell mèinter ch' el-i asptavn al Tèimp la i dess in fugatton tût quèll coss ch' la vleva savèir, e l'aveva appèna finé, ch' al Tèimp era lé, e la mamma i fé quell dmand, e lú giranduland sèimper d'intòuren a sta sala, i arspòus in frèzza aqusé: alla Querza bsò diri, ch' al so frutt n' srà mai piassú alla zèint fein ch' la tein supplé un tsor sòtt al sòu radis; ai pondg, ch' i n'sran mai sicur dai gatt, s' i n' i attacchen di campanein al zamp per sintiri quand i veinen; al furmig, ch' el camparàn fena ch' el volen s'en'faràn mai el-i ali; alla balèina, ch' la tegna sèimper dri al pòndg marein, ch' la n' darà mai in scoi, nè in sècca; al sètt Clumbein'po, che quand el s'arpussaràn sù in-t-la culòuna dla ricchèzza, el turnaràn in-t-al so èsser. Súbit ch' l' av dâ tût sti arspost al Tèimp sparé vi cm' è vèint, e la Cantarèlla dòp avèir ringraziâ tant, e basâ la man alla vèccia, s' mess a ruzzlar zò da qula montagna, tant camminavla fort. In-t-l'andar zò la

s' accurzé ch'el sêtt clumbein' i svulazzaven sòuvr' alla têsta, e li a n' i pars vèira d'dirî sùbit cossa i aveven da far per turnar cmod i eren; mo lòur strulgaven coss' era sta culòuna dla ricchèzza, es en' capevn una patacca; basta i arrivònn tûtt stracc a pi dla muntagna in quell bèll prá, la Cantarèlla s' mess a sedr in-t-l' erba, e'l sêtt clumbein' s' arpussònn sòuvra'l coren d'un bò, ch'era lé a pasqular. Mo bona, in-t-al pùnt istèss ch'el pusavn i pi sù in-t-la corna una clumbeina dvintava un ragazz, e aqusé tûtt sêtt el clumbein'turnònn a èsser sêtt bi zuvnett, cmod i eru una volta: e allòura i capénn ch' la culòuna dla ricchèzza era rappresentâ dal coren, perchè a se dpenz un cornucopi per simbol dl' abbondanza. A v' pssì immazinar l'allgrèzza, ch'i aven tûtt dal vèder ch' l'era finé i su guai. I turnònn po indrî per l'istèssa strâ ch' aveva fatt la Cantarèlla per dar el-arspost a tûtt qui, ch'li li aveva prumess. La prema a èsser cuutintâ fú la Querza; la qual dess: l' è causa un tsor ch'a-i ho qué sòtta? Ch'al séppa l'or, ch'fa dvintar el iand amari? Mo tûlil' pur vi, e dscavamel' d' qué. I ragazz andònn camminand a torr del zapp, del vang, e di badil, e s' messn a cavar la tèrra sòtt al radis, e dòp avèirli taiâ e dscalzâ tûtti i trovònn una gran pgnatta peina d' zcchein quant in psseva mai star. I s' impénn tûtt el bisacc, e la Cantarèlla al grimbâl, e po s' la sbittòn vi. L' avé l' asi la Querza

d' zigar: ohi cruvim' el radis, ohi arcalzâm', sin chi no a casc; mo l'our eren zà lontan, e li da lé a poc la se svultò per tèrra. I s' messen po a seder, ch' i eren stracc madur dal gran pèis ch' i avevn addoss; i s' indurmintonn dri a una zada; crit ch' i fùssen mamalúcc? In quell mèinter arrivò una massa d' assassein, ch' i ligonn bèin strecc, es i alzirénn dèl pèis purtandi vi tût i quattrein, e po s' la fénn a gamb. I pover ragazz arstonn lé peiu d' affann, e la Cantarèlla tgneva dett; ecco al frutt dl' ingratitudin' d' avèir maltratâ e abbandunâ aqusé la povra Querza, adèss a sèin mo abbandunâ nù alter. Mo dòp n' sò quant òur l' arrivò quell pòndg, ch' vgneva per torr l' arsposta. La Cantarèlla i la dess, e po i mustro el sòu miseri. Al pòndg fú cuntèint dl' avis ch' i deva al Tèimp, e in benemerèinza al s' mess a rusgar tût el cord, ch' tgneven ligâ qui zuvnett, tant ch' i pssénn andar vi. Quand i avénn camminâ un bòn pzzol i trovonn la Furmiga, ch' avè l' arsposta ch' l' aspttava dalla Cantarèlla: ma la furmiga vdèud ch' la pianzeva in-t-al dscòrrer la i dmandò: Cossa aviv' la mi tòusa, ch' a sè quésè bisa? Li i cuntò la scagazza ch' i avevn avú per vi d' qui lader, e la dsgrazia d' avèir pers i quattrein. Qula bstiola i cunsulò digandi: mo tasi ch' a v' casca al furmai in-t-el lasagn. Savâ ch' in-t-l' andar a arpònder al noster furmèint a-i ho sintú un gran pladur ch' feva di lader sòtta a una fabbrica dsabitâ, a sòn stâ a vèder

e i suppleven una quantitá d' munèida, e a s' pò dar ch' la seppa la vostra: tgnim' dri, ch' me v' cundurò là. I sêtt fradì andónn cún la furmiga, e i truvònn tútt i su quatrein, ch'a n'in mancava nianc ún. I i ciapòn sú, es s'avviònn vers al mar, dov i era la Balèina, ch'aspttava la Cantarèlla cún l' arsposta ch' i aveva dà al Tèimp. I s'persen lé un pzzol a zanzar, tant che in-t-al piú bèll coss' el', cossa n' el'? I ein i assassein ch's'védn arrivar da lontan a carrira, perchè i s' ern accort, ch' a i era stá tolt al tsor. I zuven vesten ch' i avevn i trumbon calá; a n' i armas una gòzza d' sangu addoss. Stiavo suo, dis: l'è bèin mo adéss ch' andèin a pilastrein. La Balèina dis: i v' voln ammazzar? Mo dov' sòn-ia me? A n'srò bona d' aiutarev', me che v' sòn tant ubbligá? Fâ aqusé, muntá sú in-t-la mi scheina, ch' a v' purtarò tútt a salvamèint. I saltònn sú in-t-la Balèina tútt sêtt, anzi tútt ott cún la Cantarèlla, e cún tútt i su zcchein; e la Balèina i purtò in-t-un attem in mêzz al mar, dov i ern in salv. Allòura la Balèina i dmandò:

Dsim' un poc i mi zuvnett,
Vliv'armagner qué in ste drett,
O aviv'gúst d'andar all'-i Endi?

Lòur arspòusen:

Oh no mega, no d' sicur,
Ch' l' è al paèis del cargadur:

La Balèina turnò a dir:

Eh, i mi tus, a v'ho zà intèis,
 A vli andar tútt al paèis.
 Ossú pur vgni vi pian pian,
 Ch' a v'cundúga tútt a Arzan.

Quand i fradi sinténn numinar la so patria i s'allgrònn tútt, ch' l' era al sit dov i vleven andar. La Balèina i cundúss alla riva, i smuntònn, e s'lizenziònn dalla so benefattriz cún mell ringraziameint. I andònn po a cà dla mamma, dov i sténn sèimpr in pappar-deina; i cumprònn di lug e del cà, es vegu vèira quèll pruverbi, ch' dis:

Al mònd è d' chi al sa goder.



FOLA NONA

Al Corv.

L'è zerto un gran bèll pruverbi quèll di Napolitan ch' disen: *Nú vdèin stort, es giudichèin drett*; ma a i n'è bèin puc ch's' in serven, che l'è scars purassâ al nùmer di omen ch' pèinsen pr al drett, e anzi la piú gran part ciappa di granc'; e tútt crèden d' èsser Salomon. Da quèst nass ch' a s' còrr all' orba, a s' pèinsa mal, e a s' opera piz. E per quèst tant laminturi, che s'seinten; e a s' vol dar la còulpa alla furtouna, sèinza vlèir capir, che sta Furtòuna a n's'sa cossa la seppa, ch' l'è un nom inventâ dai omen sèinza ch' i l'aven mai spiegâ. Stâ a sintir sta fola, s' a vli cgnosser ch' tútt quèll ch' a deg l'è verità.

T. VII.

Dis ch' a i era una volta al Rê Mlúzz d' Frascumbròusa, ch' era tant appassionâ per la cazza, ch' al lassava andar piüttost alla malòura i su stat per cavars' st caprezi. Un dé ch' l' era in-t-un bosc fess fess, e ch' al tgneva dri a una livra, per vlèirla pur ciappar, l' arrivò dov a i era una bèlla lastra d' marem bianc scandâ, cùn sòuvra un Corv, ch' era stâ ammazzâ iúst allòura, e al so sangu ch' aveva stiattinâ sù per quèll marem feva un contrappost aqusé bèll, ch' al Rê armagné lé incantâ un pzzol a mirarel', e po tré un gran suspir digand: oh s' a pssess avèir me una muier, ch' füss aqusé bianca e ròssa, cmod è quèll marm e quèll sangu, e ch' avess i cavì, e' l zèi aqusé nèigri cm' è quèll corv, me n' saré cossa em' vlèir. A s' i piantò po in tèsta sta mattiria in-t-un mod, ch' l' andò a cà, es en' trovava quiet nè dé, nè nott. Al se dstruzeva cùn st pinsir, es s' era mess tanta malincuni per pora de n' trovar una donna sé fatta, ch' l' era dvintâ smort e sècc, ch' al paré una brègula. Znarèll so fradèll, ch' vdeva st om dstrúzers' sèinza savèir al perchè, andò un dé in-t-la so stanza, es i dess: mo che nova? Coss' è quèst ch' a n' dà piú nè in búss, nè in bass? S' avì cvèll, che v' daga fastidi, ch' n' al dsiv' a voster fradèll? S' avì mal dsil', ch' a mandarèin a torr al duttòur. Eh, dis Mlúzz, pinsâ vù, al mal ch' a-i ho me a n' i è remedi. Znarèll scunzurò tant so fradèll ch' finalmèint a i cuntò, ch' lù

n'aré bèin, fena ch' al n' avess trovâ una donna, cmod avì sintú. Znarêll tintò d'cunsolarel' digandi, ch' l' aré tant zirandulâ pr al mònd infena ch' al l' avess trovâ. Al fé súbit ammanvar una nav peina d' tútt el galantari, ch' al saveva ch' psseven piascèir a una donna. Al se vsté da mercant, e po s' avviò vers Venezia, dov al tols i passaport, e d' lé l' andò in Levant per trovar una bêlla Circassa, o una bêlla Giorgiana. Mo al s' fermò a Costantinopol. Lé al trovò un om ch' aveva un bellessem falcòn, e lú al cumprò per dunarl' a so fradèll. Qul' alter dé al trovò un cavall d' una bellèzza strampalâ, e lú al còmpra per so fradèll. Al girava po per la zittâ guardand a tútt el donn ch' al psseva, e sberlucciand da tútt i lâ; mo l' era inútil perchè el-i aveven al mustazz cvert da un vèil. Al vleva po turnar a imbarcars' pr andar innanz, mo al s' imbatté in-t-un umarèll tútt randlèint, ch' i dmandò cossa l' andava zercand. Znarêll i arspòus brúsc brúsc: o adèss sé a sòn bèin mo vgnú a bòn mercâ; a i arò l' asi s' a voi andar cuntand coss' a-i ho; e po a un par to. Mo adasi un poc, lustressem, dis qul' umarètt, a-i è stâ di piú bi barbarein d' lú, ch' m' han cuntâ i fatt su, e aqusé trest cmod a sòn a-i ho pssú dari aiut. Znarêll in-t-al dscòrrer cgnussé che gustú aveva dèl giudezi, e lú i dess cossa al zercava. Quand al puvrètt av intèis al dess a Znarêll, sâ-la mo, ch' a i è un lug, dov

a s' trova una zòuvna, ch' è fatta a posta: ch' la m' tegna dri e me la cundurò là: me battrò alla porta e li vgnarâ alla fnêstra a farem' la limosna, e in qu' uccasiòn al la cuntemplarà, ch' me crèd, ch' a n' prà trovar d' mei. Al puvrètt batté alla porta, e la zuvnetta vegn alla fnêstra, es i fé la limosna. Znarèll vest ch' la ragazza era iüst quèlla ch' al vleva. Al dmandò chi l' era, e chi la n' era, e al sinté ch' l' aveva nom Livia, fiola d' un Negromant. Znarèll dé una bursa d' quattrein a qu' om, e dòp avèirel' ringraziâ, al mandò a far i fatt su. Al se vsté po da spazzein cún la cassèta in spalla peina d' galantari, e po passò sòtta alla fnêstra dla sgnera Livia a zigar cún quant fiâ l' aveva *galanterie, galanterie*. Lì al ciamò sú camminand, es arstò incantâ a vèder tant bèlli coss. Al mercant po i andava digand: oh sguòura quèst ch' la vèd è iüst un vada; bsgnaré ch' la vdess quèll ch' a-i ho in nav. La Livieina dis: oh s' a i fúss al sgner padr in casa, a vré ch' al mi cundusess. Oh, dis Znarèll, la n' ha una so donna? Quant stén-ja? La nav è qué vsein, in mézz urtteina nú andèin es turnèin. Lì ch' en' psseva piú dalla voia, ciamò la camarira, e i andònn tútt insèm alla nav. I intrònn dèinter e in quèll mèinter ch' Znarèll i mustrava tútti sti maravèi, e ch' la tòusa era lé incantâ, la nav era luntan del meia e meia, perchè Znarèll aveva zà dà òurden ai marinar d' alzar el

vèil. La ragazza finalmèint s'acurzé ch'al bastimèint curreva vi, e la cminzò a far di zig ch'andavn al strèll. Znarèll la lassò sfugar un pzzol e po i dess: oh zà mo ch'la tasa lé; la n'sa ch'la va a spusar un Rè? La i dis una búscà lì; mo l'è ch'la vdrà al piú bèll zuvnètt ch'seppa al mònd, la vdrà cùn ch'amòur al la trattarà. A i dess po chi l'era, e dov al la cunduseva, e a forza d' cuntari del lucchein' al l' agudò, e lì cminzò a accumdarsi, e a star vluntira cùn lù, ch'la feva star alligramèint zugand all'oca, e a dscvertein. Mo quand i fùnn in alt mar un bon pèzz in là a s'mudò vèint, e una gran burrasca travaiava la nav in maniera ch'al pareva ch'la sperfundass. In quell tèimp ch'Znarèll era lassú in-t-al casser a strulgar al tèimp, dòu clumbein's'veinsn a pusar vsein a lù, e al masti cminzò a far la roda cùn al solit rún, rún; la fèmma i dmandò: coss' hât' mi maré, ch't'fâ quell lamintari? Al clòmb dis; a m' in crèppa al cor per st pover prèinzip ch'è qué in sta nav. Lù ha cumprâ un falcòn, quèst cavarâ i ucc' a so fradèll, e s'a i fúss chi n'i al vless purtar, o chi al vless avvisar, preda d'marm ha da dvintar. Al clòmb seguitò a rumber, e a far la solita tugnana, e po dis: a i è un alter guai, che quand al Rè cavalcarà quell bèll cavall, ch'so fradèll ha cumprâ, al s'rumprà l'oss dèl coll lù tolé: e s'a i fúss chi n'i al vless purtar, o pur ch'al vless avvisar, preda d'marm ha

da dvintar. Al clòmb n'finé qué, es turnò a far rún, rún e po a dir; un guaiazz piú grand è bèin; che la prema nòtt ch'al Rè srà a lètt cún la spòusa i sràn magnà tutt e du da un gran dragunazz, e s'a i fúss chi al vless avvisar preda d'marem ha da dvintar. Appèna l'av finé sti parol la burrasca se stallinté, e i clomb vulònn vi. Ma s'al passò la timpèsta, al chersé bèin al sgumbei in-t-al stòmng del prèinzip Znarèll, es armas quésé sú d'sòuvra, ch'a n'savé ch'parté s'piar. S'me cònt ògn cossa a mi fradèll, me dvèint d'marm in-t-un tererè: s'a n'i deg nieint, al srà ammazzâ sicuramèint. L'è vèira ch'a prev trar in mar tutt sti qutà, mo a n'em' la seint de dvintar un bambozz d'preda, e a dirla al prèm piú la camisa, che n'fa al zibòn. Aquésé n'savènd cossa s'risolver la nav tuccava vi, tant ch' i arrivònn a Frascumbròusa. Al Rè, ch'era zà stâ avvisâ, i vegn incònta. I andònn tutt in palazz, e al Rè ch'aveva zà lumà la spòusa, dess a Znarèll: bravo bravo l'è iúst d'pnèll quella ch'a vleva. Al le ringraziò tant es l'abbrazzò; e po vdènd ch'l'aveva sig al falcòn; oh dis, avì pur al bèll falcòn! Znarèll i arspòus ch'al l'aveva cumprâ per dunariel'. Ma in qu'att ch'al Rè al ringrazia, e ch'l'aslonga la man per torel', e lú cún un timprarein ch'l'aveva in bisacca t'm' i taia al coll nèt. Al Rè s'incantò a guardari, n'capènd cossa significass st caprezi, es en'vols dir alter per n'al dsghustar alla

bèlla prema. Al vest po al cavall, e quèst dis, d' chi èl'? Mo l' è voster, replicò Znarèll. Al vegn voia Al Rè d' muntarel' sùbit, e in quell mèinter ch' i servitur i tgneven sod la staffa, camminand Znarèll cùn un sablètt ch' l' aveva a gallòn i taiò el zamp dinanz, ch' al stramazò lé dstèis in tèrra. Mlúzz arstò sèimper piú maraviâ, es en'psseva pinsar alter sen' ch' al cminzass a perdr al zervèll, e pr en' guastar l' allgrèzza a n' vols dir una parola. Al cundúss prèst la spòusa tra 'l dam e i cavalir, che quell zervèll guast n' i ammazzass anc la muier. Al dé po una fèsta da ball, e va pur là, e dòp dé da zèna a tútta la comitiva. In tútt sté tèmp Znarèll sté sèimper malinconic, e pinsiròus, perchè l'aveva dinanz ai ucc'quell dragunazz, ch' i era stâ dett ch'aveva d'ammazzar i spus. A i vegn in tèsta d' vlèiri salvar a tútt i cost. Cossa fé'l' lú? Al s' ficcò in-t-la stanza di spus prema ch' i andassn a lét, e s' mess dòp alla trabacca dèl lét. Mo bona, quand fú trèi òur dòp mèzza nòtt vit' lé ch' arriva al dragòn, ch' gumitava fug dalla bòcca: a v' imprumètt, che chi l' avess vest, n' avé piú bisògn nè d' purgant nè d' lavativ, ch' a i sré vgnú la mossa d'corp da per lì per la pora. Znarèll sèinza pinsari sù mess man al so palussètt, es cminzò a mnar di culp alla dsprâ per taiar la tèsta a sta bstiazza, mo lì era aqusé svelta ch' la feva di salt da un co all' alter

dla stanza. Znarêll in-t-al smanzar l' arma tirò un còulp aqusé sperpustâ, ch' al dé dèintr in-t-una clunèlla dèl lêtt, es la taiò nètta, e in st mèzz al dragòn sbignò fora. St còulp dé tanta la gran tantanâ in-t-al lêtt, ch' i spus se dsdònn, e al Rê s' attaccò al curdòn dèl campanein sunand tant alla dsprâ, ch' tútt i pagg' intrònn dèintr in furia cún el torz da vèint. Tútt vesten ch' Znarêll aveva al sablètt sfudrà e ch' l'era lé dal lêtt, e aqusé a s' pinsò ch' al vless ammazzar al Rê. Mlúzz dé òurden ch' al fúss ligâ e mess persòun, che dmattena po, dis a pinsarèin cossa a in avèin da far d' qustú ch' è qué. La mattena al Rê fé ciamar cunsei, e dòp avèir esaminâ i tstimoni fú dà la sentèinza d' mort. Znarêll ch' sinté dars' sta bèlla nova, dess: cossa m' ha mo zuvâ tant smanez, e tant impègn per salvar la veta a mi fradèll, sèinza ch'la mi i andass d'mèzz? Adèss tolé a sòn me in t-el pest, e a srò strangulâ per man dèl boia, e cún ch' bèll unòur, pr avèir vlú ammazzar un fradèll! Oh l'era pur mei ch'a i avess dett ògn cossa, ch'adèss a sré lé frèdd zlà l'è vèira, mo a n'pruvaré tanta passìon, e tanta vergògna! Mo a sòn auc a tèimp, e aqusé almanc a salvarò al mi unòur. Al fé dònca dir a sò fradèll che prema d'murir a i vleva cunfidar un gran secret. Al Rê s' al fé vgnir dinanz, e lú i cuntò la cossa di clomb, e tútt al rêst, e Mlúzz n'stintò brisa a crèdri, perchè d'in

man in man, ch' Znarêll zanzava l' andava dvintand d' marem, tant che quand al finé d' cuntar l' istoria dèl dragòn i cavi fúnn i ultem a instchirs' e lú armas lé una bélla statva dretta in pi. Mo se Znarêll arstò lé mort d' preda, Mlúzz arstò anca lú d' strazz, frèdd zlá dalla passión. Da st mumèint in là al n' avé mai piú bèin nè lú, nè la spòusa, pr avèir pers un cugnâ tant d' garb. Lí po dòp nov mis la fé du bi fandsein, ch'eren la so delezia. I eren po grandsein, e so pader i cunduseva spèss in sala, a i mustrava qula statva, es i cuntava l' istoria duluròusa, perchè i l'imparassen. Un dé che l'era avsein a sta statva cún i tuset al suspirava, es pianzeva, a i cumparé lé un béll vccion ch'aveva una zazzaròuna ch'i crudava zò pr el spall, e una barbòuna ch'i tuccava el znocc'. Quèst dòp avèiri fatt una riverèinza i dess: cossa pagarev vostra Maestâ per turnar in veta so fradèll? Al Rè dis: oh i andass pur al mi règn, o la mi istèssa persòuna. Al Vccion i arspòs: al règn srév una bagatèlla in cunfrònt dla veta d'un om, e lì po s' la muress a srén po in-t-l' istèss cas in risguard d' so fradèll, ch' pianzrev la so perdita; s' la vol ch' al tòurna in gargam, al basta al sangu d' qui du fandsein; cún quèst ch' la sfrèiga da cap a pi la statva, e al fradèll turnarà in-t-al so èsser. Al Rè sté a pinsar un poc, e po dis: oh di tuset chi sa quant m' in farà mi muier, che di fradì d' sta fatta a n' i è

dúbbi ch'in tòrna piú. D'long cún un timprarein al taiò la canna dla gòula prema a ún e po a qu' alter d'qui tuset, e po cún una spònga insupâ d'quell sangu l'imbusmò tútta la statva, e súbit ch' al fú d' cò Znarèll saltò sú san e svelt. I fradì dòp èssers' abbrazzâ e astriccâ cún una gran cunsolaziòn, i messn i ragazzù in-t-una cassteina. Al Rè fé arpiattar Znarèll e po ciamò la Regeina, es i dess: cossa pagarévla mo, perchè mi fradèll turnass al mònd?—A darev la metâ del mi sangu s' al valess.—E la n' daré piüttost quell di su tuset, qui quatalett ch' i ein, es en' i ein?—Oh quèsto no sicuramèint; bsgnaré bèin avèir voia d'cugnâ per privars'd'qui du ragazzù, ch' ein la nostra cunsolaziòn. Oh a n'sòn sé baròuna.—Al Rè dis: a l'ho mo fatta me la barunata. La vèda qué la cassteina, dov a i è i fandsein. La Regeina instramurté, e po dòp dé in-t-una furia tal ch' la pareva ammatté, nssún la psseva tgnir: la ciappò uua carrira, la saltò sú in-t-al murèll d'una fnèstra per trars'zò. In qu' att arrivò lé so pader in-t-una núvla, ch' l'era zà quell Negromant, emod a savì, ch' la trattegn, es i parlò in sta manira: Fèirmet' Livieina, sav' che tútt sti guai ein intravgnú per causa mi. A m'sòn vlú vendicar del sgnor Znarèll, ch' vegn in cà mi per rubart', ch'a n'sò mo da ch' lèz: a-i ho po vlú castigart' te pr èsser stâ aqusé sfazzâ d'andar fora d'cà sèinza lizèinza d'to pader, es ho vlú ch't'prov almanc

pr un poc al béll gúst, ch' s' ha a perdr i fiù. In-t-l' istèss tèimp a m'sòn vendicâ d' so Maestâ ch' è stâ causa d' tant malann per vgniri uua voia aqusé stracca d' mandar a zercar pr al mònd una muier d' so caprezi. Ma cún tútt sti vendètt a n' em' sòn brisa dscurdâ d' èsser pader. Va, Livieina, aver la cassèta e guarda ch' i tu fandsein ein san e svelt, e piú bllein ch' i n' eren. Di fatti i saltòn fora dalla cassareina, es còursn abbrazzar al nonn che n' se saziò mai d' basari. Znarèll fú cuntèint, e al Rê tútt alligher, e s' tegn sèimpr a mèint: *Quant mal porta a n' pinsar pr al drett.*

FOLA DEZIMA

La superbia castigâ.

Chi la tira trop, la strazza: chi vol andar trop in sú casca zò piú fazilmèint.

A s' dis ch' a-i era una volta al Rè d'Zada-longa, ch' aveva una fiola ch' i aveven mess nom Ceinzia, perchè l' era agusé bêlla cmod fú qula Dea, o sia Diana, val a dir la Louna: mo s' l' aveva un' onza d' bellèzza, quèsta era cuntrapsâ da una lira d' superbia. Lì guardava tútt d'alt in bass, e al piú gran prènzip i puzzava sòtt al nas. Fra qui ch' i cascaven murt dri a-i era al Rè d' Bèllpaèis, mo lì al dsprezzava, e a tútt el finèzz ch' a i feva la i arspundeva cún tant sgarb. Finalmèint stúff di trattameint cattiv d' sta streia, l' arsols d' vlèirs' vendicar, es fé feinta d'

lassarla, e d'andar vi. L'aveva usservâ che sta sgnureina, sebbèin la fess tant la schizzignòusa cùn i preinzip, la s'la tuleva po cùn i staf-fir, e cùn i zardinir; che pr al piú al suz-zed aqusé a sti spuzzètti, ch' dan l' imbèll a cvèll d' bòn, e po s'attaccn al piz. Al Rè d' Bèllpaèis s' lassò crèsser la barba, e i baffi, e po s' dé un poc d' pàttina in-t-al mustazz, che nssún aré mai dett l'è lú. Al turnò po là in-t-al palazz d' qula squenzia, es andò dal giardinir, e cùn di quattrein al s' mess sig pr aiutari a adaquar i vas, e a far el part d' fiur; mo l'aveva tanta la gran abilitâ a far i bochè, ch'a n' i era un par a lú, perchè l'aveva studiâ al dsègn. Al purtava po sú sti fiur alla Sgnureina, e li cminzò a guardarel' d' bòn occ', tant i piaseva qui bi baffi. La sgnera Ceinzia, ch' s'andava arscaldand a dé per dé, s' mess andar in-t-al zardèin piú spèss d' quèll ch' la feva, e po a forza d' fars' insgnar iu ch' mauira al mitteva insèm aqusé pulid i fiur la s' era tant smesdgâ cùn st zuvnètt, ch' la in dvintò cotta. Basta, a far la fola longa e curta, al l'insulfanò tant, ch' al l'ardùss a scappar vi sig una nott d' arpiatt dèl sgnèr pader. Cunsiderâ bèin adèss coss' è al caprezi del donn. Li ch' aveva lassâ andar tant parté d' preinzip, metters' in-t-el man d' ún, ch' la n' saveva chi al fúss; ch' al psseva mo anc' èssr un avanz d' galé. Li andò dònca sig vsté da casa, sèinza pssèir torr nieint dla so robba,

perchè el dunzèll eren anc livâ, quand la scappò vi. Lú la fé zirar innanz e indrì, cundusèndla in dell'-i ustarioli, e la sira al maga-zein a durmir, es magnavn apèna apèna per star in pi: e aqusé camminand sèimpr a cavall del sòu gamb i arrivònn a Bèllpaèis, dov al Rê la cundusè in-t-un' armèssa sù d' lú, sèinza ch' li savess dov la fúss, es fé feinta d'èssr amig d' ún d' qui cuccir, e al s' fé dar du paion da durmiri sù. Al cuntò po ògn cossa alla sgnera madèr, dis: la m' há fatt tant arrabir me qustì pr al passâ, ch' a m' voi mo torr un po d' spass adèss ch' m' è vgnú la balla al sbalz. Lú po la feva star a stècc, e i i deven una scudèlla de mnêster, cún du panett, e rar volt un poc d' caren, ch' al Rê i deva ad intènder ch' al n' aveva quàttrein allòura, mo ch' al l'aré po cundotta a cà so, dov la sré stâ da regeina. Lú po s' andava vstènd, e dspuiand cm' l' andava da li. Un dé i fevn al pan e al Rê dess: ahn donn, ciamá sù la puvrètta, che v' vegna aiutar. L'andò po zò da li, travsté zà sèimpr al solit, es i dess: a sò ch' al Rê ha dà òurden, ch' i v' ciamen a far al pan, guardâ mo d' sgamurdir un pzzol d' pasta, tant ch' a pssamen far un gnocc. La Ceinzia d' manc n' fé, in-t-al mnar la pasta la ciappò sù d' in-t-al tular un ruzzlètt, es l' arpiattò in bisacca; in-t-l' istèss tèmp l' arrivò lú vsté veramèint in-t-al so abit da sgnòur, es dess a quell donn: cossa fav' d' qustì ch' è qué per

cà? L'hâ pur zira d'èsser poc d'bòn! Guardai mo addoss, ch' la n'avess mai sgufflà vi cvèll, innanz ch'la vaga vi. El donn lassonn andar vi al Rè, mo el volsen vèder s'al i aveva accolt, el i guardonn in bisacca, es i trovonn la pasta, mo pr amòur ch'al n's'inquietass el i teinsen cvert qula fufegna, mo el bravonn bèin bèin alla Ceinzia, es i des-sen ch'la n's'avviass a far d'quell quâtà, s'la vleva ch'el la tulesen sù dell'-i alter volt. Li andò vi tûtta svergugnâ ch' la n'alzava nianc i ucc'. Al Rè camminand s'travsté, es còurs zò da lì. Al vest ch' la piænzeva: dis, cossa aviv'? Quand la i al dess, al i arspòus: ah al n'è nièint, a n's' i bada a sti quâtà; un'altra volta l'andarà mei. Quell donn en' s' n' ein nianc dà a dir; tant è vèira ch' el m'han dett ch'andadi aiutari a taiar del camis. Andâi dònca dmattena, e zercâ d'aganfar un pzzol d' qula tèila, ch'srà qusé feina, tant ch'a m'fadi un fazzulètt da sudòur, ch'a sòn sèinza. N'em' stâ a far squas, ch' al Rè n'è mega sèimper lé per rivira. Li che n'vleva dsgrustarl', e po ch'l'aveva pora, ch'al n' i mnass s' la n' feva quell ch' a i dseva, andò sù a taiar sti camis, e vdènd una tèila feina feina, ch' pareva una tèila d'ragn, la in tols n'sò quant brazza in quell mèzz ch'el donn l'aveven lassâ lé da per lì a posta, e s' el-i arpiattò sott'alla stanèlla; mo in quell mèinter iúst ch'la s'attaccava la tèila a una curdèlla del suttanein al Rè, ch'era arpiattâ dòp.

all' ùss, saltò fora, e trovandla in-t-al fatt, al t' m' i fé una capladazza, che n' se sré fatta al piú gran lader dèl mònd. Lì tré in tèrra la tèila, e po scappò vi ròssa ròssa. Al Rè s' travsté súbit, es còurs zò, perchè la povra Ceinzia n' s' afflizzess; e in fatti al la trovò, ch' la pianzeva purassá. Al zercò d' cunsolarla, digandi: al Rè è bòn, l' arà fatt per reder, n' aveir mega pora. Mo a n' vals el smorfì, ch' a i vegn una termari, e una fivra da cavall. La tgneva po dett: oh la m' stà mo iúst una pittura: me che m' puzzava sòtt' al nas i fiù di Rè, che m' cascavu adoss murt d' amòur, adéss a sòn sfurzâ a suffrir del villani: me che n' psseva nianc udir una parola brúsca, che m' dsess al mi sgner pader: tù, a m' sbattrò mo adéss dedrì la mi superbia; quella m' aiuterà mo adéss in-t-i mi bisogn. Al Rè po intant andò sú dalla sgnera mader, es i cuntò ch' la Ceinzia aveva la fivra. La n' l' av sé prést savú, ch' la dess a so fiol: coss' è sti mattiri? Vliv' far cherpar qula ragazza? La Regeina la fé purtar sú, es i andò lì in persòuna a parlarì; dis: nè v' dubitâ mega povra quâtá, ch' a v' assistrò bèin me. La la fé metter in-t-una stanza, ch' a i era un létta cún la cverta, e la trabacca d' sèida tútta arcamâ d' or, e po' l murai ern adubbâ d' vlud trinâ d' or, cún el carig cumpagni. Po ciamò so fiol, es i dess: Fiol mi l' è mo òura d' finirla. T' há fatt suffrir abbastanza sta povra ragazza, dat' i da

cgnosser, e ch'tütt seppa finé. Al Rè s'acustò al lètt, e la Ceinzia l'arcgnussé allóra pr' al so spòus. I s'dmandònn po scusa ún cún l'alter, e sta cunsolaziòn fé passar la fivra alla sgnera Ceinzia, e cún li anc la superbia svané, ch' la fù po sèimper peina d' bona manira in seguit, perchè l'aveva pruvà ch' la superbia cundus spèss a mal parté.

Prema ch' finess la Giornata al Prèinzip fé cantar un' egloga.

Quèst è un dialog tra Nardèll, e Cicchètt.

Nardèll incòntra Cicchètt e a i dmanda in prèst zeinqu pavel. Cicchètt i arspònd ch' al n' i i pò dar, perchè l' ha spèis tütt i quattrein in-t-una còmpra. L' Autòur napolitan la ciama una *Vulpara*. Nú i dirèin una *Ragnola*, o si una *Rèid da pscar*. Nardèll dis: poffar Bacc còstla mo tant una Ragnola? Bisògna ch' t' sepp molt geueròus?— Oh, dis Cicchètt, te n' sà ch' adèss el rèid ein chersú d' prezi, e ch' in vez d' ciappar di usi, e di pess, el ciappen di scud?— Di

scud? Ah dis Nardèll, te m'vress dar ad intènder del lúzzel per lanteren, te m'vress far vèder la lòuna in-t-al pozz. — Oh pover Nardèll, al par ch' t' nass incù. Te n' sâ ch' al dé d' incù a s'è immascarâ ogn cossa, ch' ogn cossa ha mudâ fazza, e ch' a s' è mudâ anc i nom al coss? Te n' sâ ch' a n' s' dis piú rubarì, ma guadagn? Te n' sâ ch' tutt han sta rèid d' vari fatta attaccâ a gal-lòn? I omen grand l' han d' or, o d' ar-zèint; qui d' mézza vigògna l' han d' ram, o d' uttòn; e i alter l' han po d' fêrr, e anc d' corda. I omen grand, ch' l' han d' or, pê-schen i Stat: i piú bass pêschen i lug, el pus-siòn; la zèint urdinaria s' attacca alla robba da magnar; e la marmaia s' cuntèinta d' pscar i fazzulett d' in bisacca alla zèint. Tutt quell ch' s' aquesta cùn sta rèid n' s' ciama piú rubarì, ma indústria, guadagn, regal, man-za, bonaman. Rubar? Obibò; inzgnars', in-dustriars', arrisgar, approfittar. — Ah l'è vèira pur trop. Adèss chi n' roba, u' ha robba: chi n' s' inzègna, n' s' imprègna; chi n' tèinta, stèinta. — Qué l' Autòur napolitan porta l' e-sèimpi di Giúdziz, di Legal, di Duttur, di Spzial, di Buttgar, e di Artesta, ch' al no-mina a ún pr ún, es fa vèdr el suffegn de tutt. — Al finess po cùn dir, che tutt sti gua-dagn ch' n' ein unêst, duren poc: ch' el piú gran ereditâ n' passn alla terza generaziòn: ch' la fareina del diavel va tûtta in rêmel, etz. etz.

GIORNATA QUEINTA.

FOLA PREMA

L' Oca.

A i era una volta dòu surêll, la Lèlla, e la Lolla, aqusé puvrètti, ch' el s' davn al diavel dalla mattena alla sira d'andar filand, e po dòp êssers' bèin bèin inspudacciâ el dida tûtt al dé el cavavn appena la manira de n' murir dalla fam; mo el-i eren tant boni, unêsti, es pregaven sèimpr al zil ch'el-i aiutass, ch' el speraven d'cavars' d' in-t-i strazz un dé o l' alter. El-i aveven filâ dla garzuleina feina feina, e po l'aveven sbianczâ cùn el sòu man. El purtònn st bèll fil al mercâ,

mo sebbèin al fúss aqusé bèll i i vleven dar una canta. Sti ragazzèlli, ch' speraven d' cavar tant da pssèir vivr almanc una stmana, andaven girauduland sù e zò per la strà sèinza farn' alter. Quand el trovònn una vcceina ch' era agufflà in-t-un cantòn, ch' aveva in grèmb un' Oca, mo tant bèlla granda e lusèinta ch' a n' s'era mai vest cossa piú rara. La vcceina dess a quell fioli: vliv' cumprar st' Oca? e lòur—Mo s' a sèin qué per vènder, e cavar di quattrein per magnar; pinsà mo vù s' a vlèin torr un' Oca, ch' magnaré quell poc, ch' sré per nú. La véccia dis: a barattarò in quell fil ch' avi lé; ne v' dubità, ch' a n' v' in pintirì, ch' l' è la piú bona e brava bistia ch' s' possa dar, la magna poc, e po dalla so pulleina a cavarì tútt i quattrein ch' a vli: me intant ev' darò un quartiròl d' furmintòn sig, perchè a pssadi dari da magnar almanc pr' una stmana, che dòp po a vdrì cossa nassrà. El ragazzi tolsen l' Oca e al furmintòn, es purtònn a cà ògn cossa. St' Oca era po tant piàsèvla, ch' la i tgneva dri dapertútt dov el-i andaven, e el-i piònn a vlèir tant al grau bèin, ch' el la tgneven fèna sig a lètt. Quand fú passà dòu stman l' era dvintà sèimper piú granda e bèlla, e ch' al fúss mo l' avèirla mantgnú aqusé bèin, o coss' alter pssess èsser, a sò ch' sta bstiola cminzò a far di bi zcchein in vez d' pulleina. La prema volta quell ragazzi s' n' addènn in-t-al spazzar la cà, ch' el trovònn un zcchein

in-t-al rúsc; po qui alter dé i cherseven d' maniera tal che sti pover qutali cminzònn a arburdir's: el cumprònn dla tèila per fars'del camis, e po di búst, del vstinzein', di mubilett d' cà, es magnaven bnein tútt i dé. Sta cossa deva in-t-l' occ'a del braghiri ch' i stevn a mur, e d'quèlli ch'teinen dri ai fatt di alter piú che ai su. El s'devn in-t-al gomb quand el dòu surèll passavn, es dseven: ohi cmar, aviv'vest? a deg ch'el-i han i stanlein burdá! Uhm, pover qutâ; guardâ cmod el-i han alzâ la crèsta! Adèss el-i han di bi fissú, e l' alter dé el n' psseven nianc cruvers' el spall cún un fazzultètt d' indiana. Qu' altra saltava sú: mo dsi mo ch'el-i han el sòu gallein' morti attaccâ fora dla fnèstra, e del gavètt d' sussezza; o ch'qualcdún li mantein, o ch' el-i han accattâ al tsor. Qué po el s' devn all' impecc per savèir cmod l' era, e per vgnirn'in ciar, cossa fénn-el lòur? El furònn un bus in-t-la muraia, ch'arspundeva propri in-t-la stanza dov durmeva el dòu surèll. El sténn tant lé paziènti cún un occ' a quell bus, ch' el vesten úna d' quell ragazzi vgnir a dstèndr in tèrra un linzol, e qu'altra cún l' Oca in brazz mettrila sú: el-i usservònn ch'st' Oca s' agufflò, e po s'mess a far di bi zcchein, ch' al pareva, ch' al so per dedrì fúss al conì ch' i battess tant erni nuv nuveint. Caspiteina! Quell braghiri ch' vesten sta quaquila el-i avn a cascar morti dall' invidia. El pinsònn súbit a un rigir. Tant quant

fú dé úna d'sti pttèigulí andò a battr all'úss del ragazzi, e fagand vesta d'avèir pers al gatt, el-i al cininzonn a ciamar: Mascarein, Mascarein? E in-t-l'andar girand per cà la vest l'Oca. Oh, dis, avì un'Oca? Oh! s'a vlessi pur farm' un gran servezi d'imperstaremla per dòu òur sòuli, perchè a-i ho di ucchein cein cein, e n'avènd la mamma i van scappand fora d'cà, e a vré ch' la i ciamass. Ne v' dubitâ mega, ch' l' è sicura in bon' man, me n' sòn d'quèlli, s' a m' intindì. El dòu mamalúcchi, tra ch' el-i eren bunazzi purassâ, che n'saveven dir d'no, tra ch'el-i aveven pora, ch'la i fess un tir, s'el n'i la deven, el s'ardússn a darila cún patt ch'la i la rindess fra dòu òur. La braghira purtò in cà so l'Oca, la ciamò el sòu cmar, es dstèisn un linzol in tèrra, l'Oca i andò sú, es i fé in mèzz una bèlla squaquara, ch' puzzava tant fort, ch' a se sparguìò la pèsta per tútta qula cà, ch'al pareva iúst ch'i vudassn el ciavg. Lòur però n'se dsprònn; el cherdénn ch'al fúss al mudar cà. El i dénn bèin bèin da magnar dèl ris in-t-al latt, e po da lé e un' òura el la turnònn a metter sú in-t-un alter linzol nètt; mo a v' sò dir ch' sta volta el-i àven d' grazia d' còrrer vi cún al nas astuppâ, ch' a n' s'psseva piú avèir al fiâ dalla púzza. A i vegn tanta la gran rabbia, che d' long el-i stur-zénn un poc al coll, e po la trénn zò dalla fnêstra, ch' guardava in-t-un stradèll mort. Mo al nassé un cas, ch' fa vèder ch' i pruverbi

veinen vèira, ch'a i è quell ch' dis: ch'tútt i mal ein bon da cvèll. Al fiol dèl Rè andava a spass, e mèinter ch' l'era poc lontan a i vegn bisògn d'far i fatt su, ch'l'avé la mossa d'corp, al dé la spada e al cap-pèll da tgnir sod al so servitòur, e po andò zò per ste stradèll, es fé quell ch' i bisugnavà. L'era po qué, es n'aveva nè carta nè ngòtta da nttars', e guardand in zà in là, a i vegn tratt l'occ'a qu' Oca, ch'pareva morta, perchè l'era svultâ lé in têrra; al la tols sú, es se spazzò cún quella. L' Oca mo ch'n'era brisa morta, s'arsinté, es s'attaccò tant fort al taffanari dèl Prèinzip cún al bêcc, ch'al s'mess a zigar cm'è un dsprâ. Al còurs i servitur, es pruvònn tútt a ún pr ún d'tirarla vi, mo a n' i fú vers, ch' l'era tant attaccâ, ch'la pareva incullâ lé cún dla colla garavèlla. Vdènd ch' i n' i ariusseven i ciappònn sú al Prèinzip a zervlètt, i al purtònn a cà, es al dstindén sú in-t-un létta a buccon, perchè a n' i era dúbbi ch' al pssess star in scheina per causa d' qula bistia ustinâ, che n' s' i vleva torr d' dedrì. Qué a s' ciamò al Médic d' Còurt, e tútt i alter duttur dla zittâ, e chi fé una rizètta, chi in fé un' altra per dscavari st incomod, mo tútt era inútil, ch'ògn volta sòul ch's'tuccass l'Oca la s'arsinteva sèimper piú, es striccava quant mai la psseva. Al prèinzip ch'vest che nssún rimedi era bòn de dstor qustì de d' lé al fé trar un band, ch' dseva a sta maniera; *Qualúnqu*

*persòuna a i bastarà l'anem d'livarz' dal
seder sta pettma, ch' a i avèin attaccá; s'
l'è om, a i darèin la metà dèl noster règn;
s' l'è donna, a la spusarèin. Oh! la gran
quantità d' zèint, ch' vegn d' ogn banda.
Tútt guardavn a ste mssir, e tútt vleven pru-
var a tirar l'Oca, e li striccava ogn volta
piú, e a nssùn i bastava l'anem de dstac-
carla. Al Prèinzip era tant travaiá dal dulour,
ch' dal gran zigar l'era arragaié. La cos-
sa dl' Oca dèl Prèinzip se sparguiò daper-
tútt, e quell pover ragazzi, ch' pianzeven
dal dsgúst d'avèir pers la so, a i vegn in
pinsir d' andar pur a vèder s' la fúss li. La
Lèlla, ch'era la piú granda n' s'attintava, a
i andò dònca la Lolla, la piú pzneina. La s'
mess dòp a dl' altra zèint, e súbit ch' la la
vest la cgnussé ch'l'era la so Oca, la s'mess
a zigar: adì la mi zuieina; vgnin'dalla mam-
ma, vgnin'. L'Oca cgnussé la vòus, es còurs
d' long in brazz alla so padròuna sfergandsi
dri, lassand pur andar una volta quell pover
tafanari. Quand al Prèinzip fú un poc arstu-
rà al vols savèir tútta l'istoria, e sintènd la
cattiviria d' quell braghiri, al dé òurden ch'
el fússen scuvá per tútt quattr i quartir. Al
spusò po la Lolla, ch' aveva in dota qula
bistia, ch' valeva piú d'un règn. Al dé po
per spòus alla Lèlla un so cunsiir, e aqusé
s' fé dòu para d' nozz in-t-una volta. E da
tútt quèst a s' cava: *ch' la buntá ha sèimpr
al so prémi; e ch' la cattiviria è castigá.**

FOLA SECÒNDA

I Mis.

I disen'ch'una volta a i era Can, e Bis du fradi. Can era recc sfundâ, perchè l'aveva la primogenitura, e Bis era miserabil, perchè cadètt. Al fradèll recc era iúst un can, ch'a n'i sré stà dúbbi, ch'al i avess dá un bèver d'aqua, anc s'al l'avess vest cascar mort dalla sèid. Bis vdènds' tant dsgraziâ pinsò d'andar vi dal paèis, digand, che chi muda lug, muda furtouna; e zà ch'al n'aveva nieint da perder, ch'a n'lassava nieint, al s'mess a camminar, e dòp qualc dé al s'tegn fermar a un'ustarì la sira, perchè al vgneva zò un'aqua, e una nèiv aqusé grossa, ch'a n's'pssé dar d'piú. In-t-l'andar dèinter al vest dòds Zuvnett,

ch'eren dintòurn a un gran fug, ch' i se scaldaven. Quèsti fénn lug al pover Bis, ch'era infusté mort dal frèdd. I cminzònn a far vari dscurs, e po' cascònn in-t-al dscòurs dèl tèimp. Un d' qui zuven dis: cossa dsiv' d' st bèll timpazzein? Bis, ch' era bèin scars d' furtòuna, mo al n' l'era brisa d'inzègn, arspòus: mo me deg ch'a sèin dalla so stasòn; a sèin nú che n' s' cuntintèin mai, es vrén ch' al zil fess a noster mod, ch' al fúss al sòul, quand è iúst bèin ch' al piova, nú n' s' n' intindèin una patacca; a vrén ch' fúss cald quand ha da èsser frèdd, e qusé vi dscur-rènd. A st mònd a sèin tútt egoesta; ògnùn parla pr al so interèss. Al zttadein assrà tra quatter murai in-t-el zittâ vré sèimper vèder al sòul; al munar, l' urtlan, al zardinir vrén l'aqua un dé sé e un dé nò: al vtturein, al lavandar a i piasré sèimper bèll tèimp. In sòm-ma a sèin una bèlla massa d' matt, che s' al zil z' vless dar mèint al bsgnaré ch' in-t-un istèss camp al fess dar al sòul in-t-un pzzol d' tèrra, in-t-un alter pzzol ch' a i tress l'aqua; da una banda fúss frèsc, da qu' altra fúss cald; e a i srév infena dla zèint ch' al pregarén, perchè al fess vgnir una grossa tim-pèsta, ch' arvinass tútt al furmèint, perchè lòur han i granar pein. Quèll Zòuven steva a sentir el-i arspost ch' i deva Bis, e po des: mo vù parlâ mei che n' feva Zizeròn; a n' s' pò però dnegar che st mèis in-t-al qual a sèin n' seppa una gran fètta, l' è una cossa

insuffrebil sti zel, e sti nèiv, ch'al diavel n'i durarev. Bis replicò: mo lú dis mal d' st pover mèis, es en'mett mo a cònt al servezi, ch'al z' fa cruvènd al furmèint cún la nèiv, perchè a n'patessa, e tgnènd indri la messa di alber e del vid, ch'al frèdd ch' sol vgnir d' Marz a i faré mal; perchè a s' sol dir: quand Febrar n'febrèza, Marz mal pèinsa. In quant a me a sòn d' parèir ch' tútt i mis avn el sòu bon'qualità, e ch' a i siamn ubbligâ a tútt: quell mèis d' Marz n'él' una delezia? Qèll caldein ch'cmèinza a far dzlar e adrizzar ògn cossa, ch' al par d' arnasser. Avrel cún quell sòu trusadein' caldi caldi fa crèsser la robba a vèder e n'vèder. Maz tútt vsté d' foi e d' fiur. Zúgn ch'porta al sustintamèint dl om per tútt al mònd. Loi, e Agost ch'purghen la tèrra, e z' la lassen lavurar cún fazilitâ. Settèmbèr e Uttòber ch' z' porten la frutta tant sana per l' om, e quella massmamèint dalla qual a cavèin quell sug, ch' è al balsem dla veta. Nuvèmbèr e Dsèmbèr fan nassr al furmèint, lassen piantar i alber, e arsoren la tèrra a poc a poc dal calòur dl'estad. E Znar finalmèint fa dèl bèin anca lú cún quell sòu nèiv, ch'cruven la tèrra es la dfènden dai zel; e po mett in arpos i pover cuntadèin ch' han tant fadigâ in-t-i mis indri. — Òura bsògna mo savèir che qui dòds zuvnett, ch' s' truvaven lé d' attòurn al fug, eren mo iúst i dòds mis dl ann lú, e quell ch' dsurreva cún Bis era al mèis d'

Febbrar. La zanzada d' Bis, e 'l lod, ch' l' aveva dà a ògnún, piasén tant a sti Ragazz, ch' i arstòn aqusé alligr e cunteint, ch' i volsen per gratitudin'fari un regal. I i dunòn una cassteina, e al fú Febbrar, ch' i la cunsgnò, digandi: tulé, zercâ, dmandâ tútt quell ch' a vlì e ch' a v' savì mai immazinar, che quand avrirì sta cassteina, a l' arì. Bis al ringraziò quant mai, ciappò sú la so cassèta, es andò a lét, mittèndsla sòtta alla tèsta per cavzzal. Alla mattena al s' mess in viaz, mo la strâ era peina d' nèiv che nssún aveva nianc fatt la rotta. Al pover fiol s' trovò imbruiâ tra ch' l'aveva del scarp tresti, ch' a n' psseva andar nè innanz, nè indrì. L'avers camminand la cassteina es dess: oh s' avess qué una bèlla lettiga cùn un scaldapì pein d' fug tant ch' a stess cald! Mo al n' av sé prèst avert la bòcca, ch' a i cumparé lé la lettiga cùn du mùl ch' fumaven, e l' om ch' i cunduseva. St om al ciappò sú d' pèis, al le mess dèinter dov a i era anc al scaldapì, ch' al sguazzava al mònd. Quand al vest sta baza al fé i su cont d' vlèir turnar a cà so, e al dess al pustiòn: ehi? a stò in-t-al tal sit e aqusé, e aqusé. E quì om arspòus, eh lustressen sé, ch' a n' s' in dúbita mega ch' a i al cundurèin. Per viazz al vegn l'òura d' magnar, ch' Bis era smilz smilz, ch' l' ost l'aveva tgnú a stècc la sira, e lú dmandò alla cassteina un bòn dsnar. Súbit lampant fú lé amanyâ bòcca mi ch' vut', mo cùn un'

abbondanza ch' a i aré pssú magnar trèinta persòun'. Bis aveva magnâ a crépapanza, e i'era tant pein ch'al n' s' psseva piú mover; al sté lé un pzzol e n'avèud piú voia d'turnar a muntar in lettiga, al s' agurò d'avèir lé un bèll lètt preparâ cald buièint. Appèna i vegn st pinsir ch' a n'stà sn'a vèder cumparir una gran trabacca cverta d'tèila inzirâ cún sòtta un lètt, l'èndma, e la cverta zibâ cún di arcam alla Chinèisa, di linzù ch' se srén pssú suppiar vi tant erni fein, e po tútt l' uccorèint, iufena l' urinari d' arzèint. Al pustion al dspuiò, a i scaldò al lètt, es al mess a lètt. Qula nott al s' la durmé, quant l' era longa e larga, e la mattena al se dsdò ch'al sòul i deva in-t-i ucc'. In quèll mèinter ch'al s' livava a vèder qui paguarett al se sturzeva in-t-el spall, e al pustion dis: coss' hâl lustressem? Mo dis: vut' ch' a m' metta sti strazz, e andar a cà aqusé? E quì om dis: mo volel' un bèll abit, al n' ha che da cmandar. E sta volta al bastò sòul al desiderì, ch'al n'avé briga d'avrir la cassteina, ch' l'abit era zà sù pr al lètt: un abit magnèfic de vlud nèigher cún el guernizion rossì, e del franz zalli. L' arrivò po a cà, e quand so fradèll al vest in sti squarci al dmandò cossa i era intravgnú, e cmod l'era dvintâ aqusé recc. Bis i cuntò la cossa di zuvnett, ch' l' aveva trovâ, e ch' i aveven fatt l'our qui regal, mo al n' i sté po a cuntar el particolarità dèl ciaccaramèint ch' l' aveva

avú cún l'òur. Can en' vest l'òura d' sbrìgars' da so fradèll, e po andò vi vers qu' ustarì, ch' avé minzunâ Bis. Di fatti dòp avèir asiâ un pzzol al la truvò, e al truvò anc qui zuvnett ch'eren sèimper dal fug. Quand al fú dèinter al dmandò all'ost ch'al mittess sú di fass d'vid, perchè l'era infusté dal frèdd, e sèinza ch' i fúss bisògn d' èssr interrogâ al cminzò a scartar cònta la stasòn. Al seguitò a vudars'al stòmng digand: oh ch' tèimp maldètt! Qusti du msarein d'Znar e d'Febbrar a t'deg ch' i s' fan dar dèl vù. Éla robba? ògn cossa zlà, ògn cossa artirà. Oh l'era bèin mei quand i n'eren nianc in-t-al lunari. E quell zananein d' Marz, ch' aré da purtar súbit la premavèira, adèss anca lú cmèinza a dar all'-i occ, ch' al fa cascar dla nèiv, e bsògna anc scaldars' al lètt. Oh, dis ún d' qui Zuvnett: a n' dirì po mal d' Avrel, nè d' Maz, ch' al vein po la bona stasòn? Adasi pur, dis Can, anca lú st inguanguel d'Avrel vol far al so ventsètt o ch' al trà zò tropp aqua, o ch' al fa nvar anca lú, e s'a deg al vèir sintì al pruverbi ch'dis: Avrèl Avrilòn n' metter zò al zibòn. E qulú d' Maz anca lú stà dòp al macciòn, es lassa ch' nèiva anc al prem dé, e perséna al terz, cmod a-i ho vest me.—A sintirey' vù, dessen qui alter zuvnett, dònca a n' vri bèin alter che ai mis d' Zúgn, d' Loi, e d' Agòst? Oh, dis Can, stà pur quèid, ch' anca l'òur dan in-t-al quoniam; quand aréu bisògn d'un poc

d' aqua in Zúgn, l' è un sècc dèl diavel, e al furmèint è tútt stransé, ch' in vez d' farina a s' cava dèl rémel. Per Loi a i vré un po' d' aqua per far el tèrr, mo ahibò, l' è tant dur al trrèin, a i vein tant el gran cherpador, ch' a i va dèintr el zamp del bisti. Pr Agòst po al cmèinza a piover, e a savì zà che: alla prema aqua d' Agòst povr om a t' acgnòss; ch' al bisògna cminzar a metter sù al frraiol. Settèmb e Uttòber duren' po a èssr aqusé marz, ch' a n' s' po nè custodir al furmintòn, nè vindmar. A n' in deg po nieint d' Nuvèmb e Dsèmb, ch' l' è quell tèimp ch' la natura se dspoia, e ch' cmèinza a durmir, e a murir ògn cossa: e adèss bisògna dir ch' avèin sì mis d' Inveren. Dòp ch' l' av dà tútt sti bèlli lod ai Mis a i vegn sònn e l' ost al mess a lét. La mattena quì Zuvnett l' andònn a travar in-t-la so stanza, es i cminzònn a far di cumplimeint, e per la bona cumpagnì, ch' al i aveva fatt là sira, i volsen regalarel'. I i dénn una galantari, dsèndi: ch' al tuga st stafflein guerné d' franza, e ògn volta, ch' i vein voia d' cvèll l' ha da dir:

A t' preg staffil mi car,
Ch' t' m' in dag un zintunar.

Ch' al prova, dis, mo sòul quand l' è a cà,
ch' al vdrà ch' al n' arà mai avú sé gran cuc-
cagna. Can i ringraziò e po s' mess a còrrer

la posta pr arrivar prèst a cà so. Sùbit ch'a i fù, al s'andò a srrar in-t-una stanza, perchè nssùn vdess a cuntar i quattrein ch' al sperava d'avèir dal staffilein. Al s' mess a dir quell ch' i aveva insgnâ qui Zuvnett. Mo s' al staffil n' i el dé mo lú, pago me. Al t' m' i saltò adoss, e sù pr el gamb, e pr al mustazz, attravers dla tèsta e di ucc', tant ch' al puvrètt av d' grazia d' pssèir appèna avrir l' úss, e d' ciamar aiut. Bis sinté, es còurs: quand al fù lé al s' vleva inzgnar d' ciappar in man al staffil; mo eibò a n' i era cas: al saltava vi sguilland cmod fa un' anguella viva. Bis còurs a torr la so cassteina, es dmandò ch' s' fermass sta musica, e quésè suzzèss. Al dmandò po a Can coss' era stâ st imbroi: lú i cuntò ògn cossa a pèil e sègn. Bis, dis: mo sé tarù, mi fradèll, a ne v' pssi lamintar se n' d' vù. Ch' accadeva mo ch' andassi a zercar al trèds in dspar? Bsò tgnir la lèingua tra i deint lú, perchè a vdi a ch' prigul a si andâ per zanzar mal, s' a parlati bèin forse aressi guadagnâ cvèll cmod a-i ho fatt me, perchè avì da savèir che qui dòds Zuvnett eren i dòds mis dl ann. Can ch' sinté ste dscòurs s' deva di púgn in-t-la tèsta. Bis l'andò cunsuland, dsèndi: stâ pur alligramèint, ch' a n' voi brisa ch'a v' dspradi per quèst: me a-i ho tant da qula cassteina ch' a i è anc al mod d' cuntintarz' tútt du, a in avì da èsser patròn tant vù, quant me. Un alter mo diré: l' ha fatt, l' ha dett, nó a

n' voi arcurdarm' eugòtta d' quell ch' a m' avi fatt passar, quand a-i era in miseria; a voi ch' a vivamn' insêrn da bon fradi sèimpr in pas, e in allgri. Can armas cunfus da sta gran amurevlèzza dèl fradèll, es i dmandò scusa d' avèirel' trattà sé mal. Da lé innanz el fúnn el cheriatur piú cuntèinti ch' fússen sòuvra alla tèrra, perchè Can s' teins a mèint al pruverbi ch' dis: *Ch' l' è un cattiv imparar a so cost.*

FOLA TERZA

Dpeint-Smalt.

L' è sèimper stâ piú diffezil all' om d' cunservar quell ch' l' ha aquistâ, che l' aquistar d' nov: perchè in st cas ch' è qué purassâ volt la furtouna spenz innanz la giustezia, che in-t-al prem a i vol sèimper dl inzègn.

Quèsta è una cossa ch's'vèd tutt al dé, sèinza bisègn d'pruvarla, che purassâ van in sù prèst, e po s'arbaltèn tutt in-t-una volta.

A i era una volta un mercant ch'aveva una fiola única, ch'aveva nom Bètta. Lú arev vlú vèderla maridâ, ma li n' in aveva voia, perchè anc i piú bi zuven ch'la vdess, i puzzaven sòtta al nas. Per passars'al dsgúst d' sta cossa so padr andava a tutt el fir, es steva lontan da cà al piú ch'al psseva. Una volta ch' l'aveva d'andar alla fira d' Sinigaia al dmandò alla tòusa, cossa la vleva ch' a i purtass. La fiola dess ch' l'aré tolt vluntira veint lir d'zúccher in pan, e veint lir d'mandel d'òulzi, e po zeinqu o sì fiasc d'aqua nansa, du gran d'músti, e du d'ambra: e anc trèntadòu bèlli perl oriental, du zafir, n' sò quant rubein e ingranat; e dòu o trèi ruddlein' d'or bòn filâ; e finalmèint un murtalein d'arzèint cún al so pistòn. So pader rideva a sentir sti fatt zirandel ch' la i urdnava, pur al la vols cuntintar, e quand al turnò dalla fira l'aveva sig tutt sti guaccher, es i el cunsgnò. La Bètta tútta alligra li tols, la s' andò a srrar in-t-la so stanza, e po s' mess prema a plar tutt sti mandel a forza d'aqua buièinta: e a pssì crèder ch' a far sta fazzènda a i vols di dé parecc'. Po andò pistand sti mandl in-t-al murtalein, tant ch' l' arrivò bèin d'co. So pader ch'sinteva tutt i dé st pistamèint s'immazinò ch'la vless far un cruccant, e ògn volta ch' l'era alla frutta

al s' vultava a vèder pùr s'a i era un cruccant sù in-t-la cherdèinza, mo al n' i vdeva mai nieint, e a n' vleva po dir alter pr en' torr alla fiola al piassèir d'un'impruvisata. La ragazza era po aqusé attanaià in st lavurir, ch' appena l' aveva dsnâ la curreva assrars' in-t-la so stanza, e la mattena la n'se vdeva mai per cà, che bèin tard. Intant qula ragazza dòp tutt quell gran pistamèint la s' mess a impastar sù in-t-un tulir tutt sti mandel cùn quell zúccher, es andava adaquand la pasta cùn l'aqua nanfa, mittèndi tramèzz al músti e l' ambra: e quand l' av mess insèm un gran pastòn la t'm'al lavurava quant mai la psseva, perchè al dvintass bèin fein. E lavòura incù, lavòura dman tant che dòp un mèis l' arrivò a sègn d'vèdr una pasta feina feina, ch' mnava un udòur, o sì una púzza d' músti ch' aveva ammurbâ tûtta la cà. Da st pastòn la tols un pzzol, es prinzipiò a far una bèlla tèsta granda cmod era la so, e qué la s' guardava in-t-al spècc'per cupiarla bèin pulid. La i fé i ucc' cùn qui zafir, i deint cùn tutt quell perel, i laber cùn i rubein, el massèll cùn el-i ingranat. Dòp la tèsta la fé al coll, e po el spall, el brazz, et zetera, et zetera, fein ch' l' av cumpé un zuvnètt piú grand d' lì, ch' a dir al vèir, era mò dvintâ bèll, mo bèll purassâ, e aqusé graziòus, ch' a n' i mancava se non la parola. Dòp ch' l' av fatt sta fattura, siccòm l' era úna d' quell ragazzi, ch' lêzen di rumanz

tútt al dé, e del fol, e tant alter mattiri, a i vegn in mèint ch'al so bambozz p'sess dvin-
tar viv, cmod d'vintò la bèlla statva d' Ga-
laté. Li dònca, cupiand Pimmaliòn, la s'mess
a pregar madò Vêner ch' i fess la grazia d'
far ch'è st om, ch' l'aveva fatt, e ch' i cu-
stava tanta fadiga, s'muress, e camminass, e
in sòmma fess quell ch' a fèin nú alter. E
qué prega incù, prega dman, ch' alla fê d'
dis quattrein al bambozz cmiuzò a mover i
ucc'. Alla prema a i pars d'stravèder, e pur
cossa vliv', la seguitò a pregar tant ch'al bam-
bozz s' muvé es i vegn incòtra. La Bètta n'
p'ssé piú dall' allgrèzza, l' era in-t-una ghiri-
gaia ch' la paré matta: la i feva di d'snom,
es en' se saziava d' mirarel'. La 'l ciappò per
man es al cundúss dal pâ. Quand la i fú di-
nanz la i dess: ch' al guarda pâ, n' hâl sèimper
dett ch' l'ha tanta voia ch'a tuga maré? Pr ub-
bidirel' a l' ho tolt, es m' al sòn fatt cùn el
mi man. So pader ch' aveva vest ch' l' era
tant dé ch' la n' era andâ fora d' cà, e ch'
in-t-la so stauzia a n' i era andâ nssún sicu-
ramèint, arstò tant maraviâ che mai, mo a
i dess: basta, ch' la seppa cmod la vol êsser,
zà ch' a v' al si fatt tulivel'. Al fé del nozz
di dé, e di dé, e del fêst da ball, e di d'snar,
ch' l' era còurt bandé. Fra qui ch' capitònn
a i fú una Regeina ch'era lé incognita. Quèsta
quand la vest quell bèll spòus la s' n' ina-
murò in-t-al ballar sig. La Bètta ch' i aveva
mess nom Dpeint-Smalt, in qui puc dé la i

insgnò el creanz, es i aveva dett, che quand andava vi dalla fêsta una qualc Sgnòura, ch' al l'accompagnass zò dal scal. Lù dònca accumpagnò zò quela Regeina, es i dé d' brazz fena alla so carrozza ch'era in-t-al curtil aspettarla. Lì i tegn strecc la man, es al tirò sù, e lù cherdènd ch'la creanza vless ch'al la mittess a seder l' intrò dèinter in lègn, e allòura li fé zègn al cuccir ch' tuccass vi, e i cavall andònn ch' i vulaven, es cundóssen quell mama-lúcc d' Dpeint-Smalt alla zittá dov la Regeina era padròuna. Lù po ch'era nuvez dèl mònd, n' savènd alter, spusò anc st' altra, es steva alligramèint. Intant la Bètta ch' in-t-la cunfusiòn d' tanta zèint n' saveva dov fúss al spòus, e vdènd ch' tutt andaven vi dalla fêsta, e lù n' i era, la'l mandò a zercar per tütta la cà dal granar alla canteina, mo i n' al pssènn truar. Tütta dsprá la s' andò a trar in-t-al lêtt, mo la n' pssé assrar un occ' in tütta la noitt. Alla mattena la fè metter i pulizein in-t-i canton per tintar tüt el strá d' attruvarèl'. Nianc quèst zuvò, e dòp ch' fú passá qualc sttmana, avènd pora ch' a i fúss stâ rubá, la s' determinò d' andarl' a zercar lì per mar e per tèrra. La se vsté da burg'gnòuna; la tols lizèinzia da so pader, e po s' mess in viaz. Dòp avèir camminá qualc mis, l' era affadigá dal girar, la s' fermò dinanz a una casuplètt d' una bona vceina, ch' era sù in-t-la porta, ch' l' invidò dèinter a arpusars'. La Bètta i cuntò i su guai, e lì s' esebé

d'ajutarla, perchè la i fé cumpassiòn. L'andò in-t-la cassa e la tols fora tri bigliettein sigillà, ch'eren sgnâ 1, 2, 3, po la i dess, ch'la s' in servess quand l'era in-t-un gran bisògn, avrènd al prem, e po al secònd, e finalmèint al terz, s'la vdess, ch'n' i fúss rimedi, e ch'la lizess ògn volta quell parol àrabi, ch'i eren scretti, ch'l'aré po vest li. E po i insgnò la strâ ch'cunduseva a un gran palazzòn cùn dòu torr es i dess ch'la s'fermass lé. Dòp un viaz bèin long l'arrivò alla zittâ d'Mònt-tònd. L'andò in piazza, e la vest st palazz real dal dòu torr, l'andò dèinter per dmandar la carità dl allozz per qualc dé. El dunnèll dla Regeina ch'eren pr el lozz a spasszar, e ch'la vestn aqusé affanâ, la ciappòn, es la cundússen in-t-una stanziola, ch'era a mèzz d'una scala, dov tutt passavn innanz e indrì. La Bètta steva po lé cùn l'úss avert, es vdeva passar tutt el zèint d'còurt, e la n'sté gran fatt ch'la vest mo passar anc al so car Dpeint-Smalt, mo dalla gran allgrèzza a i vegn un smalvein, ch'la sté stramurté piú d' dòu òur. Quand la fú arvgnú la dis: adéss a sò dov l'è; lassa pur far a me; a voi far la pruvana dèl prem bigliettein; e l' àver al númer 1, es lèz alla mei ch'la pssé qui strambocc' ch' i eren scrett, e finé ch' l'av l'ultima parola la s' vest cumparir dinanz una bèlla carruzzeina d' or tutta incastrâ d' zoi, ch' andava da per li, ch' l'era una bllèzza a vèderla. El dunnèll la vesteu

e dett e fatt el-i al dessn alla Regeina, la qual vegu súbit alla stanza dla Bètta, e vdènd sta bèlla cossa la i dmandò s' la i la vleva vènder. La Bètta i arspòus: eh a m'maravèi anc d' lì me, Sgnòura; sebbèin a sòn una puvrètta, a m' basta anc l'anem d' dunarila. L' hà d' azzarla sòul cùn st patt, ch' la s' cuntèinta, ch' a parla cùn al so sgnèr cunsort da tú e tú, ch' a-i ho di gran secret da comunicari. La Regeina ch' era furba, e ch' a i vegn suspètt d' sta burg'gnouna, la i dess: bèin, a v' mandarò a chiamar, quand a vdrò ch' l' è in libertâ, perchè l' ha tant al gran da far ch' i n' al lassen quiet un mumèint. La fé po i su cont d' buscar al regal, e d' minciunar la Bètta. La mess i su piz a sègn, e po dòp du o tri dé la mandò a diri, ch' l' andass sú al dòp dsnar ch' al Rê era in-t-al so gabinètt, e ch' al l' aspittava. La Bètta fú cundotta in-t-al gabinètt, dov al Rê era in-t-una cariga, es i vultava el spall. Lì cminzò allòura a vlèiri arcurdar la so persòuna, e a cuntari tútt i affann e 'l passìon ch' l' aveva pruvâ pr avèirel' pers, e qué s' lamintava, es pianzeva; mo lú sèimper sod; la s' fé curagg' es i andò per dinanz, seguitand i laminturi, e vdènd ch' al tgneva i ucc'assrà, es n' i deva arsposta, la pinsò, ch' al fess feinta d' durmir es al cminzò a seussar; mo scossa pur che te scossa a n' fú pussebil ch' al s' arsintess in-t-nssúna manira, e l'era l'effètt dla dormia, ch' la Regeina te m' i aveva fatt dar apposta. La

povra Bètta andò vi cùn el tròmb in-t-al sace, ch' la se dstruzeva dalla rabbia. La turnò in-t-la so stanziaola, e qu' alter dé la vols tintar d' avrir al secònd biglettein, e lêzer quell'-i alter parol ch' i eren scretti. Mo la n' stà sn' a vèder ch' a i salta lé una gabbia d' or, ch' aveva dèintr al piú bèll uslein fatt d' pred preziosi, ch' cantava all' impar d' un lusgnol. Quell pttèiguli del dunzèll al dessen súbit alla Regeina, e li còurs zò d' long; la fé l' istèssa dmanda d' cumprarel', es i fú dà l' istèssa arsposta d' dunariel', cùn l' istèss patt de dscòrrer in secret cùn al Rê. La Regeina, ch' vest ch' al prem rigir era andâ bèin, dess d' sé súbit, es purtò sig la gabbia. La fé far l' istèssa fazzènda al Rê, e la Bètta per la secònda volta s' trovò in-t-al gabinètt del Rê, es al vest durmir una bona volta, e qué la se dsprava per dsdarel', mo a n' i fú vers, ch' al durmeva tant, ch' al paré mort, e la povra quât teins turnar indrì anc sta volta piú dscunsulâ d' prema. Una d' quell Dunzèll ch' era dvintâ la cunfideinta dla Bètta a i sav d' mal d' vèderla aqusè affletta, e la i prumess d' aiutarla; perchè bisògna mo savèir ch' l' aveva per mròus al pagg' del Rê, e a i pareva che la Regeina fess i bi uccein a st zuvnètt, e aqusè qula dunzèlla n' psseva suffrir la Regeina. Al vegn in mèint a sta ragazza, ch' la Regeina dess la dormia a so maré prema ch' l' andass in-t-al gabinètt, e l' andò daccord cùn al so mròus, perchè al

fess in maniera d' barattari al bicchir, cm' a i deva da bèver l'ultma volta da dsnar. Intant la Bètta fé la terza pruvana dl ultem bigliètt, e al vegn fora un pèzz de stoffa, mo che stoffa, tssú d' sèida e or, arcamâ tûtta d'arzèint, e timpstâ d' brillant, ch' a n' s' i psseva guardar dal gran lusòur. Qula solita dunzèlla avisò la Regeina, anzi sta volta la i purtò sù la robba, dsèndi ch' la Burg'gnòuna i la regalava al solit, purchè anca li i mantgness l'istèss patt. La Regeina dess ch' l'andass pur da so marè qu' alter dé all' òura solita, perchè la dseva: va pur là, ch' mi maré po t' udirà un pzzol. Mo la dunzèlla aveva zà fatt al daccurdein cùn al pagg'e per qula volta al Rè era in-t-al so gabinètt cùn di ucc' tante fatt quand arrivò la Bètta. La cminzò la solita zanzada. Oh cusslazz, la tgné dett: a t' ho fatt me cùn el mi man d' mandl' e d' zúccer. Chi t' ha fatt i ucc' la bòcca i cavì, e ògn cossa d' robba d' tant valòur se n' mé? Srest qué adèss aqusé bèll e aqusé galant, s' a n' em' fúss dstrúttà in piant per fart'camminar e dscòrrer? Te n' sà i bi regal ch' a-i ho fatt a qula bambozza dla Regeina sèimper per pssèir pur vèdert' e fart' cgnosser tûtta i tû tort? — Dpeint-Smalt era lé tûtta murtificâ, ch' a n' savé cossa s' dir, e vdènd ch' la Bètta aveva rasòn, a s' i moss la gratitudin, es i dess: tasi mo lé, n' andâ piú innanz ch' a m'fâ pianzer. Stâ quèita stauott, e dmatteina in-t-l'alba a ve vgnarò

a torr; a muntarèin sù in du di mi cavall, es la farèin in barba a so Maestà. I andònn dònca vi, es turnònn a cà dèl pà, ch'av al piú gran cuntèint a vèdri san e salv, perchè al n'in aveva avú piú nova. La Regeina quand la s' n' accurzé ch' al maré era andà vi cún la so prema muier, la s' mursgava el dida dalla rabbia, es en' vleva cunfssar la veritá d' qula sentèinza, ch' dis:

En' far ai alter quèll ch' t' en' vress per te.

FOLA QUARTA.

La Brocca d' or.

A i era una volta un pover Urtlanètt, ch' durava una gran fadiga a campar lú e trèi fioli ch' l' aveva. Ma pur a forza d' cavars' al pan dalla bòcca al s'era inzgná d' mettr insèm n' sò quant bagaron da cumprar tri timpurlett, ch' al vlé ch' servessen d' dota a sti ragazzi. Pasquètta e Zezza, ch' era el fioli

piú grandí, n' vleven sig la piú pzneina, ch' aveva nom Palmireina, e agusé el la mandaven vi a pasquular da un' altra banda. Sta povra bagaia cminzó a andar cún la so purzeina vers un bosc, dov a i era una bona pastura, e del iand purassâ. Un dé ch' l' aveva sèid l' andò innanz di mòndi, e la trovò una funtana d' aqua frêscâ e dòulza, ch' a se sguazzava a bèverla. Li andava po giranduland, e in quèll mèinter la vest da lontan un cvèll a luser, e siccòm l' era una ragazzèlla curiòusa purassâ, la camminó là a vèder coss' era quèll. Mo caspiteina! La vest ch' l' era un albarein tútt quant d' or massezz. La tusètta tútta alligra en fé nè alter bèin, nè alter mal seu' ch' la pruvó a tirar una brocca, la qual vegn cún tanta fazilitâ, ch' al pars quasi ch' la se dspiccass da per li. La la ciappò sú, es la purtò al pâ. St povr om andò da un urèvs a vènder la brocca, e cún qui quattrein ch' al cavò l' astuppò n' sò quant bus, es turnò a cà tútt cuntèint. Al dmandò po alla fiola dov l' hat' cavâ? Li i arspòus: tasì pur pâ, gudì, e n' stà a zercar alter, s' a n' vli guastar al filatoi. Qu' alter dé, mo bona! la ragazzâ tourna cún un' altra brocca, di bacchett, e una grimbalâ d' foi, ògn cossa d' or. So pader arstò maraviâ a vèder tanta ricchèzza, e dis: a n' vré me ch' t' avess rubâ tútta sta robba? N' avâ pora pâ, ch' a n' i è dúbbi che nssún v' còrra dri, andâla pur a vènder, e cumprâ

tútt quell che v' bisògna. Al terz dé l' andò al bosc, e toppa là da qu' albarein, ch' l' aveva zà dsfuiâ e al pareva ch' la n' füss cuntèinta feiu ch' la n' l' avess dzippà tútt. La s' attaccò a una brocca piú grossa, per la gòula d' far un bòn buttein; mo s' la n' fa prêst a scappar l'alber i casca addoss, ch' al se dspiccò dal radis, es lassò dscvert un gran bus in têrra. La Palmireina, ch' a v' ho zà dett, ch' era tant curiòusa fora d' mod, la va sòuvra al bus, e la vèd una scala d' marem bianc; la vâ zò da sta scala, e quand l' è d' co la trova una grotta scura, mo in fònd a se vdeva luser un' apertura, da dov a se dscrueva una bêlla pianura; e lì innanz per sta pianura, e là in mêzz i era un gran palazzòn tútt cvert d' or, d' arzèint, e d' pred preziòusi. La Palmireina incantâ a vèder tútti sti ricchèzz, s' andava accustand pian pian al palazz, e vdènd ch' la porta era averta, e a n' i era nssún, l' intrò dèinter e s' mess a girar dapertútt el stanzi ch' eren tútti dpeinti, cún di bì apparat, e di mobil traluccheint. L' arrivò po in-t-una sala, dov i era una tavla apparciâ, e in mêzz un bêll piatt d' maccaron, ch' fumavn, es mnavn un udòur ch' feva vgnir fastidi. La ragazza ch' aveva una sghessa sperpustâ, ch' l' era d' gran òur, ch' la n' aveva magnâ, n' vdènd un can, la s' mess a seder, es tirò zò un piatt pein, es cminzò a taffiar. In-t-al piú bêll dèl gúst la s' vèd cumparir a seder lé vsein un zòuyen

grand vsté d' bianc, mo cún al mustazz nèigher nèigher; in sòmma un mor. Lì vleva scappar, part per la vergògna d' ésser stâ trovâ lé a magnar aqusé da franca, e part per la pora ch' i feva st om aqusé nèigher, ch' la n' n' aveva mai vest d' qula fatta, e la cherdeva ch' al fúss una bistia: mo al Mor i dess: stâ pur lé feirma, ch' a n' t' voi brisa far dèl mal; anzi a t' voi far la donna piú cuntèinta dèl mònd. Mo nianc per quèst la Palmireina era quieta dèl tútt. Al Mor pr ingrazianars' po cún la ragazza al fé vgnir n' sò quant semi vsté d' tèila d' or cún di abit magnefic, ch' i cavòn zò i su pagnarett, es la vstènn ch' la pareva una Regeina. Sti bisti veinsen po lé cún una bèlla carrozza d' diamant, ch' era tirâ da quatter cavall d' or, cún el-i ali d' smerald e d' rubein, el la messen sú in sta carrozza, ch' s' alzò pr aria, es la cundússn a spass, cmod srev in-t-un ballòn volant, ch' l' era al piú gran gudiol dèl mònd. Innanz ch' vgness sira el semi la cundússen per tútt el stanzi dèl palazz, es i mustròn una stanza in-t-un cantòn. La Palmireina ch' era curiosa vleva andar dèintr anc in quèsta; ma úna d' quell semi i dess guai a lì, al padròn en' vol ch' s' i vada a nssún patt, e chi al dsubidess chi sà mai cossa a i faré. El la cundússn in-t-una stanza dov i era un létta cún i su ridò, el la dspuionn, el la messn a nanna, e po i dénn la bona nott purtand vi el lám,

Quel alter dé dòp ch' la s' fú livá a i era zà prepará una bona qulaziòn , e po un bòn dsnar , e al Mor i era sèimpr a gallòn. Dòp avèir magná i miur becon ch' s' pssess mai vèder , al Mor la cundúss a spass pr al zardein , e d' quand in quand al i andava dmandand : Palmireina em' turessi mo per maré? Lì n' s' attintava a dir d' no , es en' vleva dir d' sé , perchè qula figurazza aqusé nèigra n' i piaseva brisa. Sta fazzènda durò tri o quatter dé , e lì n' psseva êsser piú cuntèinta del trattamèint , ch' era propri da regeina : mo a-i era una cossa ch' i psava in t-al stòmig , e , ch' feva ch' la n' psseva goder nient ; e l'era mo qula stanzaia dov la n' psseva andar. La curiosità n' la lassava quieta , e vdènd ch' al Mor n' l' abbandunava mai in tútt al dé , i vegn in pinsir d' vlèir dscruver cvèll la nott , ch' la n' al vdeva mai. Una sira quand el semi l' àven cundotta in-t-la so stanzaia la i dess : lassá pur qué la lúm ch' a voi far un fattizein. La sté po aspttar ch' tútt fúss quiet , e po pian pian veins fora dla stanzaia , e d' posta andò a quella fatal. L'úss era in marlèta , e planein planein l' intrò dèinter , es cminzò a guardar , e la vest un bèll sofá dov a-i era sù un zuvnètt ch' durmeva piú bèin ch' mai. Mo cossa vliv' , l' era al piú bèll zouven ch' s' pssess vèder cùn du ucc'. La s' i andò acustand per vèdrel' mei , e la i era po lé avsein incantá d' sta gran bellèzza. Quand la lúm ch' i deva in-t-i ucc' al fé dsdar. Subit ch' l' av

avert i ucc' al cminzò a cusptlar, mo a i tirava dèinter, e po i dess: oh, razza storta, per causa to a-i ho mo da star anc alter sètt ann a sta maldètta penitèinza d' èsser bianc la nott, e dvintar nèigr al dé. Perchè bisògna mo savèir ch' l' era una mali, ch' i era stâ fatta da una Fada instizzé, ch' i aveva augurâ sta penitèinza, inféna ch' l' avess trovâ una ragazza, ch' al spusass. Oh bèin, seguitò a dir al zòuven, t' n' há da pintir anca te: zà ch' t' i stâ aqusé matta, fattla bèin súbit: ch' la seppa messa fora d' qué cún i su prem strazz ch' l' aveva quand l' intrò. El semi la cundússen fora dèl tútt dalla grotta, e po assrònn al bus dla scala. La povra tòusa armas tútta addulurâ, pianzènd, e maldènd la so curiosità. L' andava po in zà in là, senza savèir dov la füss, e in vez d' andar vers cà l' aveva vultâ strâ, e dòp avèir camminâ tútta quela nott, quand fú dé la incuntrò una vceina, ch' i dess: fiola mi quant em' dspias dla to dsgrazia; me t' aveva aiutâ sagandt' trovar to furtòuna, ma la malnazza curiosità è stâ la to arveina. Adèss mo, ch' t' há fatt la frittâ bgnarâ rimediari. Me t' voi bèin, perchè t' i bona, e a t' darò di insegnameint, perchè t' poss ariussir a scappar i priguel ch' t' incuntrarâ. Tú sti sètt fusa, sètt fig secc, e st vasètt d' mel. 'Tú po sti sètt para d' scarp d' fèrr, e va d' long camminand per sta strâ sèimper fena mai che sti scarp sràn frústi, ch' a i n' andarâ in malòura un par all' ann,

e al viaz t' arà purtà a passar dinanz a una cà, ch' ha un' antana, dov t' i vdrà sú sêtt donn, ch' stan lé a filar, e li agucciâ veineu fena zò in-t-la strâ. In vez d' fus el-i arvolten al fil in-dell'-i oss d' mort. Te t' hâ da livar cùn bêlla maniera quell'-i oss e metti sti fus, dòp avèiri bagnâ in st vasètt d' mel. D' cò del fusa metti po sti fig secc, ch' faràn da fusarol. Quand quell donn han tirâ sú al fus, e ch' el s' l' accostu alla bòcca pr inspucciarel', e ch' el seinten ch' l' è dòulz, el diràn: *Chi m' ha indulzé sé bèin la mi bucheina, mo a i piova pur addoss la vintureina.* Dòp sti parol el diràn po úna dri l' altra: chi è quella ch' z' ha purtà sti coss qusé dòulzi? Lasset' un po vèder.— Te alloura t' hâ da dir: No ch' a n' sòn acusé baròuna me, ch' a sò ch' a m' vli magnar. Lòur arspundrà: vein pur vi ch' a n' t' magnarèin, per dis quattrein; e po per dina dall' u; per l' oca bisa; e va pur là; ma te fena ch' t' en' seint zurarli per *Tròn* e *Losna*, en' dar fora, ch' el te taffiarén. Alloura po va pur in cà da lòur, e n' avèir pora, che me po t' andarò aiutand. La Palmireina ringraziò la vceina, e po andò dri camminand sêtt ann cuntenov sèinza truvar mai nè antana, nè donn, d' maniera tal ch' al fú vèira ch' l' avé frustâ el sêtt para d' scarp sebèin ch' el fússen d' fêrr. La povra ragazza era dsprâ n' savènd piú cmod s' far a andar innanz; basta l' aveva tanta fèid a quela vceina, ch' la vols seguitar

al viaz, e difatti passà poc tèimp la vest da lontan el-i agucciá, ch' calaven zò da sta cà. Tútta alligra la fé quell ch' i aveva insgná la véccia, dòp la sinté tútt i scunzur del sètt donn: la sté soda fena a quell d' Tròn e Losna, e allòura l' andò sú. Mo cossa; el la cgnussénn, e quand la i fú dinanz el t' m' i saltònn ai ucc', digandi; ah razza storta, t' i mo quella, ch' per causa to, noster fradèll ha tgnú star alter sètt ann in qula grotta cùn al mustazz d' quel bèll culurein? Te n' sà ch' nostra mader t' l' ha zurá? Basta, zà ch' t' há tant paté, e pr amòur ch' t' z' há indulzé la bòcca; e po anc perchè a savèin ch' noster fradèll t' vol anc bèin, a t' prumttèin d' aiutart'; mo a t' avvisèin, ch' t' há da passar anc di alter strassein per padir la gran bagianáta ch' t' fé far la to curiosità. Adèss la n' è in cà, ma quand t' la seint arivar sú pr el scal arpiattet' dòp all' uss. Vai po dedrì e ciappla pr i cavì dla còppa, e n' i lassar mai fena ch' la n' zura per Tròn e Losna, che se no la t' magnaré. Aquisé fé la Palmireina, ch' la n' s' fidò mai de tútt i zurameint i piú stravagant ch' la sinteva, fena che n' saltò fora quell d' Tròn e Losna; allòura la lassò andar i cavì ch' la tgneva bèin strecc. Súbit ch' la véccia, ch' era una donna salvadga, l'av vesta la la cgnussé anca li zà, e la i dess: t' há rasòn, t' ha rasòn; cossa vut' ch' a t' dega me? Al zuramèint m' ha ligá el man ch' a n' t' poss far del mal; mo

però seint, s' t' n' ararâ pr al drett a sòn sèimpr a tèimp d' far quell ch' a n' ho fatt adèss. Sta diavla po ch' l' aveva cùn qula povra qutâ, zercava cùn un muclein tútt el-i uccasiòn d' farla cascar in-t-la trappla. La tols un dé dods sacc pein d' gran' d' vari fatta mesdâ insèm; a i era dla dsercia, del zèis, del mei, dla lèint, di fasù; es i dess: tù, bambozza, adliz tútt sti granlein', ch' el seppen separâ una fatta dall' altra, e fa ch' sta cossa seppa finé sta sira cm' a tòurn a cà, s' in chi no mal guai a te, me t' magn in quatter becon. La Palmireina s' mess a smergular, es dseva: oh cara la mi brocca d' or, e al mi bèll palazz, adèss a padess al spass ch' a-i av là dèinter. Oh a n' srò mega mai piú curiòusa vèh, a còst d' avèir da dscrivr un tsor. In quell mèinter ch' l' era lé mézza dsprâ a i cumpars dinanz un bèll zòuven, zioè 'Tròn e Losna. Saviv' mo chi l' era? Mo l' era quell Mor dla grotta lù, s' a v' cuntintâ, ch' aveva finé al tèimp dla so pèna, val a dir quell bèll zòuven istèss, ch' la Palmireina aveva dsdâ cùn la lùm. Li l' arvisò súbit, e la s' i tré in znocc' pregandel' ch' al la liberass dall'-i angari d' so mader. Al zòuven, sé bèin l' armagness instizzé cùn li l' ultma volta ch' i s' lassòn, in-t-ògn mod al dess d' aiutarla, perchè a savì zà quel pruverbi ch' dis, chi s' vols bèin, n' s' vols mai mal. Ossù i fatt simitòn, al dis, en' dubitar. Stà a vèder cmod s' fa. In-t-al dir aqusé

l'arbaltò i sacc in tèrra, e po cùn una bat-
 trì d' man al fé cumparir lé un dluvi d'fur-
 mig, ch' in manc d' dòu òur dsparténn el
 gran', e la Palmireina n' avé briga d' far al-
 ter che d' arcoierli a massa per massa, e
 metterli in-t-i sacc, ogni fatta da per lì. Quand
 la donna salvadga vegn a cà l' armas curta,
 es i dess: ah la mi zaquleina, quèsta è fa-
 reina d' Tròn e Losna, s' a m' poss accorzer
 d' cvèll, t' hà da star frèscà. Innanz d' an-
 dar vi qul alter dé sta vèccia streia dis alla
 ragazza: tù sta tèila e fa dòds tamarazz, e
 po adliz tútta qula penna, ch' è là in-t-la
 massa dalla puleina, e impessi; mo guarda
 bèin ch' i seppen pein per durmiri sù sta si-
 ra, s' in chi no t' em' la pagarâ. La Palmi-
 reina dspradezza al solit pianzeva, e s' la-
 mintava; mo a i cumpars lé l' amig zrisa a
 cunsolarla, dígandi; stà bona ch' a sòn qué
 me, adèss a taiarò e a cusrèin insèm i ta-
 marazz; mo in st mèinter ziga bèin fort: *Oh*
curri bèin tútt curri; ch' l' è mort al ré di
usi. Dòp ch' li av dett sti parol la vest arri-
 var un núvel d' usi, ch' s' messn a sbatter
 aqusé fort el-i ali, ch' i dsevn andar in ter-
 zola, e a in vegn zo una massa tante gran-
 da, ch' i impénn i tamarazz, e po in avanzò
 anc. La streia turnand a cà vest ògn cossa
 cumpé; la buffava, es dess: Tron e Losna
 m' vol far taruccar: a n' sà ch' l' è mi fiol,
 e ch' a in sò un pucttein piú d' lú; mo s' al
 pinsass pur ch' a m' la vless passar aqusé cùn

sta pas; mo a n' sòn quisé gnagna me; a t' mñarò bèin pr un stradlein, ch' t' en' i i mai stâ. La mandò a dir a so surêlla, ch' steva poc lontan, e ch' era una donna salvadga anca lì, ch' la i arev mandâ qula ragazza cùn un' imbassâ, mo l' era sòul per dsfarsen', ch' la n' la vleva piú tra i pi. Ch' la l' ammazzass, e po ch' la la cussess arroost, ch' la sré po vgnú anca li dòp, e ch' i s' la srén sgufflà insèm. La ciamò po la Palmireina, es i dess: va a cà d' mi surêlla camminand e dei ch' la m' manda i instrumeint da sunar, ch' a voi far una fèsta da ball sta sira, perchè a-i ho fatt al spòus mi fiol. La Palmireina ch' sinté sta volta ch' la i deva una cossa tant fazil da far la camminava vi tútt alligra. L' incònttra Tron e Losna a mêzza strâ, dis: eh povra gonza, còrr pur in frézza; te n' sâ ch' t' vâ in man al boia, ch' l' è mo la zé, ch' ha ourden d' ammazzart', mo la i andarâ busa, perchè a sòn qué me sèimper. Tù st panètt, st púgn d' fèin, e st pzzol d' preda. Quand t' i vers la cà dla zé a t' vgnarà incònttra un cagnazz ch' morsga, ch' l' è una delezia, e te trài in tèrra al pan, ch' al s' perdrà a magnarel', e al t' lassarà andar innanz. T' trovarâ po un cavall dsligâ, ch' vgnarâ a patt fatt per dart' una massa d' calz, e te apponzi st fèin, e lú n' t' abbadarà piú. T' arriverâ po finalmèint alla porta dla cà, sav' ch' t' en' préss andar dèinter sèinz' èssr asquizzâ, perchè l' è mézz' averta, mo la se sbatt sèimper:

te fecchi tramèzz sta preda, e va innanz, e t'truvará súbit la zé cùn una tusètta in brazz, e te vdrá indrett al fourn impiâ zà per cuser't'arrost. Fàì l'imbassâ, e lì t' darà la ragazzola da tgnir soda, digand ch' la va sú a torr i instrumeint, mo invez l'andarà a torr al curtèll' per scannart'; e te in quèll mèinter tassa là in-t-al fouren la ragazzola, sèinza cumpassiòn, perchè l' è zà caren salvadga; e po camminand tù sú i son, ch' ein dèintr in-t-una cassèta dòp all' úss d' cuseina, e scappa vi a ròtta de coll. Porta po a cà la cassèta para para, e guarda sòuvra al tútt de n' l' avrir, perchè t' truvaress da far purassâ. La Palmireina fé d' púnt in bianc tútt quèll ch' i aveva insgnâ al mròus, e ògn cossa andò bèin, se non che quand la fú a mèzza strâ la curiusazza zà n' pssé star d' n' avrir la cassèta per sbraghirar cossa a-i era dèinter. Appèna la fú averta a s' mess a vular pr aria tútt i instrumeint: a s' vdeva in alt un flaut, qué un mandulein, là una viola, un coren, e po una tiorba, i teimpen, el gnaccher; e tútt sti instrumeint seven po al piú gran fracass, e la piú bèlla melodì ch' mai. Mo la Palmireina aveva altr in stúffa che star a sintir la sinfonì, l' era dsprâ per ciappar tútt st instrumeint dscavstrâ per turnari in-t-la cassa; l' era un reder a vèder sta zuvnèta a ciappar al viulein, e mettrel' in-t-la cassèta, e po còrrer dri al flaut, e in quèll mèinter, ch' l' era lé per striccarel' a i sguillava

d' in man; al coren i stuffilava in-t-un' urèccia, e li s'vultava pr aganfarel', e lú scappa da qu' altra banda: l' era bèin svelta, la feva bèin di salt, e del caveriol, mo i instrumeint parevn inspirtâ, chi sà quant era ch' i stevn assrà in persòun in qula cassèta? Basta, lassèin mo lé qula bambozza a dars' all' impecc pr armetri dèinter, da zà ch' l' è stâ lì ch' ha fatt la frittâ. La vèccia quand la sinté tutt st pladur di instrumeint la s' accurzé ch' la Palmireina era scappâ cún la cassèta; l' andò alla fnèstra es ciamò al cavall e al can perchè i i curren drì, mo l'our ch' ern anc drì a magnar n' i dénn nianc mèint. La veins zò po a far el dspraziòn. Lassèin pur qué la vèccia e turnèin alla ragazza, ch' è anc lé a saltar, stracca morta, tútta in-t-un' aqua dal gran sudar. La s' tré a sedr in tèrra, ch' la n' psseva piú, e Tron e Losna ch' era dòp a un alber a starla a vèder dé in-t-una gran sghergnazzata; e po s' fé vèder, digandi: la t' stâ bèin, braghira, coss' hât' mo cavâ a vlèir battr al nas dèintr in qula cassèttâ, caia mo lé adèss: mo pur al s' moss a cumpassìon; al tré un festi, e tutt i instrumeint còursn in grèmb alla Palmireina, d' manira tal ch' la i pssé ciappar, e mettri a ún pr ún in-t-la cassèta, e turnarsn a cà. La donna salvadga vdénd la ragazza cún la cassèta a i saltò al diavl' attòuren, mo la sté quèida, perchè l' era arrivâ la spòusa nova, ch' l' aveva destinâ a Tron e Losna. Quest' era

una brútta diavla fiola d'un'altra streia amiga d' so mader, e anca li la piú mala fèrna. La vèccia fé far una bèlla zèna, e po per vèder pur s' la psseva far prigular una bona volta qula ragazza, la fé apparciar la tavla e metterla avsein a un pòzz, es vols ch' in quell mèinter ch' i znaven la Palmireina i fess lúm cún dòu torz in man, e a seder sú in-t-la dèlta dèl pozz, cún pinsir ch' i psess vgnir sònn, e in-t-al dar un crudott la i fúss cascâ dèinter, o ch' li i avess pssú dari una speinta. Quand i fúnn a mêzz dla zèna Tron e Losna, che n' psseva vèder patir qula raggazzola ch' era a sedr in-t-al murèll dèl pòzz sèinza avèir nianc magnâ un bccòn, al dess: pruvâ mo anca vù bèlla spusleina andar a seder in-t-al pòzz aqusé vsté d' sèida, a vèder che figura a fâ cún quell torz in man, e intant la Palmireina vgnarà un poc qué avsein a me. La spòusa ubbidé, e al spòus la minciunava ridènd, e digandi: oh! t' stâ mei te purassâ; n' pârla una zvétta in-t-al palazzol; mo li se stuffò bèin prèst, e la dess a Tròn e Losna: ohi per chi m' hât' tolt, per la to serva, oh! te t' i bèin affallâ veh: veinem' aiuta a vgnir zò ch' a sòn stúffa. Al spòus s' livò sú da tavla, es dis; a sòn qué, a t' turò bèin me prèst d' impazz; e taffete al t' m' i dà una speinta, e li zò a co fett in-t-al pozz. E po dé la man alla Palmireina, digandi: te t' srâ mi muier, ch' t' há suffert tant guai per causa mi, e t' i stâ aqusé

paziènta. Lì al spusò vluntira, e da lé innanz i vivènn sèimpr in pas, es vegn vèira al pruverbi ch' dis: *Chi la dura, la veinz.*

FOLA QUEINTA

Sòul, Lòuna, e Talì.

Ai era una volta un gran Cavalirazz, mo d' qui dai rugnon gruss. Qust om era appassionà per n' avèir fiù; mo finalmèint a i nassé una fiola, e lú i mess nom Tali. Quèsta era la so delezia, e l'aveva sèimper pora ch' la i muress. Per scappar tútt i priguel ai qual la psseva andar incòtra al vols ch' vgness tútt i sapieint d' qui pais a cunsiderar la so fisonomì, e a mettr insèm la so vintura dal dé e dall' òura ch' l'era nada, e da tútt quell-i alter chimir, ch' qui matt di strulg in fann tant cas. Dòp avèir dett una massa d' mat-tiri, i adlizén la piú grossa. I dessen ch' la sgnureina purtava un gran priguel per causa d'una scaia d'smèint d' lein d'quèlli ch's'trova in-t-al filarel'. Ste sgnòur ch' sinté aqusé,

dé un òurdn al piú riguròus, ch'in cà so n' i capitass mai nssúna dona cún la ròcca, nè cún dèl garzol, nè cún dal lein, sòtt pèna d' èsser cazzâ zò dalla fnêstra. Dòp di ann la Tali era po dvintâ granda, es era d' una bellèzza aqusé strampalâ ch' a s' i innamurò un fiol d' un Rê, ch' passò per dlé azzidèint-mèint. Al la vols spusar, e perchè l' aveva pora ch' la so sgnera mader n' avess da èsser cuntèinta, l' arstò lé dal pader d' Tali. L' era po passâ dèl tèimp e nssún s' arcurdava piú dla profezi dèl garzol, nè dèl lein; quand un dé la sgnera Tali, ch' aveva dà da filar dèl lein a del filadòuri, perchè la s' era fatta una brava donna da cà, sti donn i purtònn al fil, e li i cminzò a guardari, digandi: oh cmod a l' avì filâ gross, guardâ qué, s' l' è tútt una bava e un budlòn! E in-t-al dir aqusé la 'l sfergava cún el dida: e cossa suzzdé? Mo al suzzdé mo iúst ch' in-t-un fil a i dseva èsser arstâ úna d' quel scurzètti d' smèint d' lein, e in-t-al sfergar la s' i piantò sòtt a un úngia. La Tali cminzò a zigar dal gran dulòur; al cours al padr e al maré, e per quant i fessen a n' fú pussebil a cavarila, e li cascò là longa dstèisa. I mandònn a torr di duttur, e tútt la teinsen per morta. Al padr e al spòus sténn per murir anca lòur, es fénn del dspraziòn, che n' s' pònn dir. Finalmèint zà ch' a n' i era piú remedi i la lassònn in quì istèss palazz, es la fénn accumdar sú in-t-un bèll létta sòtta

a un baldacchein d' bruccâ, e po abbandunonn quèl sit. Al padr' andò lontan pr en' turnar mai piú in quèl vers pr en' s' l' arcurdar, e al spòus turnò a casa so; mo prema d' andar vi al lassò dòu dunnèll ch' stessn a far la guardia alla sgnòura, ch' sebbèin la fúss morta a n' la vols far supplir. Dèl sgnèr pader a n' s' in savé mai piú nova, e al spòus arrivâ a casa so fú arzvú dalla sguera mader cún una gran cunsulaziòn, ch' la pinsava ch' i fúss intravgnú qualc dsgrazia. La s' dé d' at-tòuren po per dari prèst muier, perchè a n' turnass piú vè lontan. Lú la tols per cuntintar la mamma, mo l' aveva cgnussú ch' quèsta era una mala bigatta, e al n' i n' era cuntèint nient affatt, es aveva sèimpr in mèint la prema. La povra Tali era po là sèimpr a lét, e quell dunnèll l' andaven visitand trèi o quatter volt al dé, perchè el la vdeven sèimpr aqusé bllèina, e frèscà, ch' al pareva ch' la durmess, e ch' la n' fúss morta. Una mattena ch' el van in-t-la stanza, el seinten di zigalein: el van a guardar; mo i ein du bì fandsein lòur, un masti, e una fèmma, ch' eren lé avsein alla so mamma; el donn i attaccònn sùbit al pètt so d' lì, e aqusé fènn per di dé. Una mattena, ch' el dunnèll s' ern indurmintâ, e ch' el tardònn piú dèl solit andar dèintr in-t-la stanza, la tusèta, ch' era piú spiritòusa, n' pssènd piú star alla pazeinza, e n' trovand al cavdèll, s' mess a succiar un did, mo la n' i cavava un sug al mònd, e

li sùccia un did, sùccia quì alter, tant succio, ch' al vegn fora quì scorza d' lein, ch' era intrà sott' all' úngia dla mamma. Tant quant fù suzess sta fazzènda, ecco dsdars' la sguera mader ch' armagné lé incantà, cmod s' la fùss sèimper stà indurmintà, la cgnusse po sùbit, che qui du fandsein eren su fiù, e la sunò al campanein perchè vgness dèintr un qualcdùn. Al saltò lé sùbit el dunnèll, ch' arstònn bèin piú maravià l'òur a vèdr una cossa sé fatta. La i dmandò dov' era so pader, e al so spòus, e quell donn i cuntònn tutt quell ch' era passà in-t-al tèimp ch' li aveva durmé. La s' mess a pianzer, es vleva dar in-t-el dspraziòn, mo la s' confurtò cùn i su du ragazzù, ch' la n' feva che basari òura ún, òura quì alter. Intant al Rê so maré n' pssé star purassà luntan dal palazz dla so Tali. Cùn al pretèst d' andar a cazza al s' tols dalla zittà, es andò d' long là dov l'aveva lassà al so cor. Quand l'arrivò in quell sit al s' maraviò a vèdr avert tutt el fnèster e la porta. L'intrò dèintr, e 'l dunnèll i andònn incònta tutt alligri, dis; ch' al vegna bèin vi, ch' al vdrà del coss, ch' a n' s' pò mai immazinar. El-i al cundússen sù in-t-la stanza dalla spòusa, e a pssi crèder cmod l'arstass; e quand al vest anc qui du bi massarein a n' i vols alter per farel' dvintar matt dall' allgrezza. A n' se saziava d' abbrazzar la so spòusa prema, e d' basar i su fandsein. Al dess sùbit: al masti è aqusé bblein ch' a

i mittrò nom Sòul, e la femmna aqusé biancheina a la ciamarèin Lòuna. I spus stènn insèm tútt qu'alter dé, e i s'cuntòn el sou vizènd passâ in tútt al tèimp ch' i n' s' eren vest; mo lú sú bèin svelt, es n' i vols brisa dir ch' l' aveva un' altra muier. Al dess po che bsgnava ch' l' andass a casa, e ch' al preparass l' anem dla sgnera mader pr arzèver la spòusa cún i du fandsein, digand alla Tali ch' l' era una donna piúttost rubèsta. In viaz a n' fé alter che pinsar alla manira d' cumbinar la fazzènda. Tgnirli tútt e dou, al dseva, la sré una mattiria; i sré mai dúbbi che dòu muier pssèssn andar daccord insèm? Lassarn úna: e quala? La prema n' al merita perchè l' è bona, e po a i voi bèin. Mandar vi qu' altra? Chi sa cmod la la tules, ch' l' è una bistia, e po una Regeina. E qué l' era imbruiâ piú ch' n' è un sart a vstir un gobb. Basta, dis: a vdrèin cmod s' mittrâ el coss. L' era po a casa, e la Regeina al vdeva tútt malincuniòus, e la n' psseva dscavari cossa al s' avess. Dòp dòu sttman al vols turnar a cazza, e aqusé fé pr un pzzulètt, e cún sta scusa l' andava a trovar Tali. Qula spirta dla Regeina mo a i tuffava st' istoria, perchè al cminzò a star vi sì dé, e starn in cà du, e a s' i cminzò a mover la gelosì. Cossa fella lì? La ciamò al camarir d' so maré, es i dess: sintim', sgnar cusslein; s' vù m' tgnarì d' man in-t-una cossa a n' srì mai piú puvrètt ai vuster dé. Mi maré quand al dorem a i seint

prufrir al nom stravagant d' una dunazza ,
 ch' a n' ho mai sintú; me vré savèir chi è
 qusti. Guardà de n' m' ingannar s' in chi no
 a v' in pintirì. Al camarir, ch' a i fé gòula
 piú el promèss, t' m' i squaquarò ògn cossa
 tal e qual, perchè al so padròn i aveva fatt
 la cunfidèinza, e anzi al i aveva dmandâ cun-
 sei. La Regeina n' fé alter bèin, nè alter mal,
 sen' ch' la dé òurdn all' istèss camarir, ch'
 andass là dalla Tali, e ch' al fess vesta d' au-
 dari da part dèl Ré, digandi, ch' al cman-
 dava ch' la i cunsgnass i su fiù, perchè l' a-
 veva voia d' vèdri. La Tali i i cunsgnò tütta
 alligra, e la surfanta dla Regeina, quand la
 i av in-t-el man la fé ciamar sù al cug, es
 i dess; tulé sti du ragazz, a v' cmaud ch' a
 i scannadi e po ch' a in-fadi tant pizz, e ch'
 a i cusadi in vari manir, part a lèss, part
 fracassâ, part arrost, e ch' sò-ia me, es voi
 ch' i s' porten tra 'l piattanz, ch' magnarà
 dman so Maestâ. Al cug se strinzé in-t-el
 spall, chinò la tèsta fena in tèrra, e po vul-
 tò vi cùn i du tuset. Qul alter dé al Ré
 ciamò in tavla, e la Regeina era tütta cun-
 tèinta per la bèlla fazzènda ch' l' aveva fatt, e
 lú mo iúst qula mattena magnava piú d' gúst
 ch' a n' suleva far, es andava digand: per
 bacco, che bòn stuvá? Che cosa iòtta st fri-
 candò! mo l' è pur squisit st arrost! E la
 Regeina tgneva dett: ch' al magna, ch' al bòn
 pro i fazza, l' è robba so. Délla una volta,
 délla dòu sta filastrocca, al Ré a i vegn la

stezza, e s'livò sù da tavla digand: mo al so me ch' l'è robba mi, dla so d' li no sicura, es andò fora d' cà tutt ingrugné, e al s' fé cundur a un so casein d' campagna poc lontan. Quèst era iúst al so pan d' li. La vols sfugar dèl tutt la rabbia, ch' l' aveva cònta la povra Tali in st mèinter ch' al Rê era fora. La ciamò un' altra volta al camarir, es i cmandò ch' al partess sùbit in-t-un carruzzein a sì cavall, e ch' l' andass a torla, cùndari ad intènder ch' al Rê l' aspptava. Al camarir esegué la so cummission, mo la Tali al fé aspptar, perchè la vols torr sù el sòu zangatttel, e anc úna d' quell Dunzèll. La muntò in carruzzein tutta alligra, pinsand d' andar a védr al so sangu, mo la n' saveva ch' a i era un alter sangu ch' l' aspptava. Quand la fú in Còurt quela streia dla Regeina s' la fé cundur dinanz, es i saltò ai ucc', ch' la l' avé a magnar. La paré una vepera, e la i dess: oh ch' la vegna, sgnera marcòulfa, ch' l' è tant ch' a desiderava d' inchinarmi. Zaltròuna, t' m' ariusess al bèll dsviadur da maré: brúttà lóuva; guardà ch' bèll zètt è causa ch' mi maré n' em' vol piú bèin! Mo basta t' i arrivâ a tèimp d' scuntar tutt i dsgúst, ch' a-i ho avú per causa to. La Tali s' vleva dsculpar digand, mo, sgnoura, me n' n' ho còulpa, me a-i era morta; cossa vol-la ch' a i faccia me? Me n' saveva ngòtta. — Eh, bèin bèin me t' voi bèin dar al ngòtta ch' t' vâ zercand. Allòn dis

ch' a s' impeia quell fug ch' è preparà là in piazza, e ch' la s' i tragga dèinter. Du facchinazz la ciappòn n sù es la strappgòn n vi per cundur la dov' era zà ammanvâ un gran falò. Bisogna mo savèir ch' al camarir, ch' in fònd era d' bòn cor, s' moss a cumpassion d' qula bèlla ragazza, e d' arpiatt aveva fatt avvisar al Rè, e in quell mèinter ch' i andavn in piazza cùn la Tali in spalla, l' arrivò a cavall d' gallop, e al vegn iüst cmod fa la timpèsta al zücc, e al dmandò coss' è sta mattiria? I i dessen ch' l' era òurden dla Regeina; e di fatti lì era là sù a una fnêstra del palazz, ch' la vleva vèder cumpé sta bèll' ovra. Al Rè fé cundur in palazz la Tali, e po dmandò sùbit alla Regeina: dov hât mess i ragazz? Lì arspòus: mo i ragazz ein lé ch' i còven; ch' al le dmanda alla so panza; al i ha magnâ da dsnar lù: aqusé l' impararà d' perder l' amòur alla muier. Al Rè, sintènd una cossa sé fatta, dé in tanta la dsprazion, ch' al pareva matt. Al s' mess a strapazzar la Regeina, digandi: ah cagna assassaina, t' hâ avú tant cor d' far murir du innuzeint, e po, s' la t' vgné fatta, t' vlev brusar sta povra fiola! Oss bèin cùn l' occasione ch' t' hâ fatt preparar te la lègna a voi mo ch' t' prov s' l' è un bèll gúst a scaldars' in quell falò. Ch' la i seppa tratta sùbit, e ch' s' i metta sig al camarir, e al cug, ch' aqusé i pruvaràn lo so bona cumpagnì. Al camarir, e al cug s' i trènn in znocç.

dinanz; digandi, al prêm: a sòn stâ me ch' l'ho mandâ a avvisar, e al secònd, dis: crèdel' Maestâ, ch' a seppa stâ aqusé baròn? Mo no sâl'. I su fiú ch' a i vèda qué ch' al i ha per man mi muier, e quell piattanz, ch' al magnò, i eren du cavrezz ch'aveva cumprâ a posta. Al Rê po ch' vest ch' ògn cossa era aggiustâ, sèinza ch' fúss nad nssùn guai, al perdunò alla Regeina, cún patt ch' l' andass bèin vi sùbit, e ch' i la cundusessen cún sig una massa d' regal. A n' se saziava po d' abbrazzar e d' basar Sòul e Lòuna es eren tutt alligher. Al fé un assègn al cug d' un tant al mèis, e po al fé zintilom d' camera. L' arnuvò al spusalezi cún la sgnera Tali alla presèinza d' tutt i curtsan, la qual dvintò Regeina, es campò d' gran ann feliz cún al so spòus e i su ragazzù.

FOLA SÈSTA

La Sapièinta.

Trèi fatta d' ignorant s' dàn al mònd: quèll che n' sa, perchè a n' pò; al secònd che

n'vol savèir; e l'ultem ch'crèd d'savèir, es n'in sa una patacca. Al prem è da cumpartir; qul alter da bastunar; e al terz da fari el-i uqulâ. In sta fola a se dscurrà d'ùn dla secònda spezia.

A-i era una volta al Rè d'Mantovel ch'aveva un fiol sòul, ch'era al cuccheiu dla mamma, e l'era tant dsnumâ, che nssùn i psseva guardar d'stort. I al mandavn a scola, mo d'studiar al n'in vleva strazza. I mester n's'attintavn a bravari per pora dla mamma, e in sta manira al pareva al piú gran zuccòn ch'fúss al mònd. L'aveva zà sèds ann, e a n'saveva nianc accumdar el letter. So padr era dsprâ, perchè a i paré vergògna ch'un par so fúss ignurant, es dseva: guardâ mo vù; vegna ch'me manca, al règn hâl' d'armagnr in man d'st'oca? A pssì crèder ch'bèll gveren aré da èsser quell. A i era mo in-t-l'istessa zittâ una Barunèssa, ch'aveva nom Zanza cùn una fiola d'quattords ann, peina d'virtú; l'aveva passâ tutt i studi pussebil: la saveva zà mo trèds o quends lèingu, e per quèst i i dseven la Sapièinta per sovernom. Al Rè ch'cgnusseva sti dou donn a i vegn in pinsir d'dar a scola alla sgnera Sapièinta al so tòus, ch'aveva nom Spasmein, e al dseva: forsi al ragazz s'vergugnarà a vèder ch'una donna in sava tanta, e ch'lú seppa aqusé indri cùn el scrittur, e a un bòn bisògn quèsta srà la strâ, ch'al farà imparar, e po 'l donn han dla

manireina, ch'el san far intrar el coss in-t-la têtta fazilmèint. La sguera Sapièinta dònca eminzò a insgnari cùn un amòur, ch' a n' s' pò dir. Mo lù n' i deva mèint, e s' perdeva a zuglinar òura cùn un nastrein dla scúffia so d' lì, oura sparguiand al spulvrein sú per la tavla, d' manira tal ch' a n' s' i attaccava nieint, e l' era zà uu mèis ch' l' andava a scola, es era una talpa cm' è prema. Al perfinid stà alla pazeinzia ancù, stà alla pazeinzia dman, e dman l' alter, ch' alla sguera Sapièinta la i scappò, e la i lassò andar un smasslòn aqusé putèint, ch' la fé vèdr el strèll al sgnor Spasmein. A i brusò tant fort st castig impruvis ch' la i dé, ch' la rabbia i fé mo far quell ch' n' aveva pssú i mester cùn la bona manira. In-t-una stmana al saveva zà lêzer, e in-t-un mèis l' aveva imparâ tûtta la gramatica a mèint. Al passò súbit al latein, al stragualzò la filosofi, i al fénn dvintar duttòur, e in sòmma l' era al zòuven piú virtuòs ch' s' dess mai. Al Rê so pader en' psseva star in-t-la pèll dall' allgrezza, e la Sapièinta anca lì, ch' s' tgneva d' èsser stâ la causa d' sta gran mudaziòn. Mo al ragazz cùn tût st gran imparar n' s' era mai pssú dscurdar d' quell scupluttòn, ch' al buscò, e s' l' era avú aqusé per mal, es s' la ligò tant al nas, ch' al n' perdunò mai piú alla Sapièinta, ch' al strulgava tût al dé quâsré stâ la manira d' vendicars' d' st gran ultragg': e intant la Sapièinta era zà dvintà

una zouvna da maré. Spasmein dònca andò dal Rê a diri aqusé: mo, sgnér Pader, a i sòn ubbligâ a li pr al prem, percchè al m'ha dâ la veta, mo dòp lù a-i ho ubbligaziòn alla Sapièinta, ch' è stâ causa ch' a sòn dvintâ quell ch' a sòn. Me n' saré ch' ricompèinsa uffriri mioura d' quella d' spusarla; purchè li in seppa cuntèinta. Al Rê arspòus: mo sé bèin, fiol mi; zerto chi vless badar la n' è brisa d' sangu real, mo l' è una barunèssa, e po l' è tant virtuòusa, ch' al pò êssr un sù per zò. I fénn ciamar la Barunèssa Zauza, i fénn la scrittura, al spusalezi e tùtt, e li allgrèzz andavn all' aria. Al Prèinzip dmandò un alter palazz pr êsser bèin d' libertâ, e al i andò a star cùn so muier. Appèna al fù lé ch' al cunfinò so muier in-t-una stanza bèin separâ da tùtt, e po dé òurden che a n' s' i dess ògn dé che una mnêstra, una mèila cotta, e da bêver quant la vleva dèl mézz vein. La povra Sapièinta era la donna la piú mal cuntèinta dèl mònd, es en saveva la rasòn ch' l' era trattâ aqusé. La dseva dèinter d' li; mo cossa i deg'h'ia mo avèir fatt, s' a m' cminzò a trattar aqusé sùbit ch' al m' av spusà, ch' al n' em' dé nianc tèimp d' fari al perchè. Da lé a qualc dé al vegn voia al Prèinzip d' vèderla; l' andò in-t-la stanza dmandandi: cossa fâla? — Eh, al mi cucchein, al po mo crèder cmod a stag cùn i bì trattameint, ch' a m' dâ. Mo a vré bèin po savèir, ch' razza d' schiribezi i saltò d' vlèirem

torr per muier per trattarm' a sta manira?
 Oh al n' impurtava brisa ch' al s' incomodass
 d' cumpartirem' st grau unòur. — Al Prèin-
 zip arspòus: mo a v' al dirò me, la mi bra-
 ganossa, perchè a v' ho vlú torr. A n' sò s'a
 savadi che chi fa un' uffèisa scriv in pòlver,
 e chi la rizèv scriv in marem. V' arcurdav',
 la mi insulèinta d' quell smasslòn aqusé so-
 nor, ch' a m' appunzassi quand a m' insgnavi
 al santiri? S' a ne v' l' arcurdâ vù, a m' l' ar-
 cord bèin me, ch' a m' par d' sentir al bru-
 sòur ane adèss. A n' savevi forse ch' a-i era
 fiol d' un Rê? Me v' ho vlú torr per muier
 per pssèir avèir manira d' farev' padir qu' l'
 insulèinza, e d' far d' vù cmod s' fa dla sus-
 sezza. — Oh bona quèsta! A n' savì ch' a-i eri
 un asnazz, e per causa d' quell stiaff a si
 dvintâ da cvèll; chi vol bèin fa pianzer, e
 chi vol mal fa reder. Guarda mo te! in pê
 d' metters' in znocc' e ringraziarem' d' quell
 ch' a-i ho fatt per lù, ch' adèss al sré lé un
 inguanguel cmod l' era, e non virtuòus cmod
 a l' ho fatt dvintar, a m' vol castigar pr al
 bèin ch' a-i ho fatt? — Al Prèinzip ch' s' aspt-
 tava ch' la i dmandass scusa, al s' maraviò
 d' st arruganza, a-i vultò el spall sèinza dari
 altra arsposta. Al cmandò po ch' s' i dess la
 mnêstra piú pzneina dèl solit per murtificarla
 sèimper piú. Da lé a n' sò quant giornat al
 turnò a visitarla, mo al la truyò arguianta,
 come prema, e lù i dess: tira pur innanz te
 ch' a tirarò anca me, es vdrèin chi srà al

prem a metter zò i sass. Sti fazzènd durònn
 un pzzol a sta maniera, e nssùn d'lòur vleva
 èssr al prem a umiliars', li aveva l'ambiziòn
 dèl savèir, e lù d'la grandèzza. La Barunèssa
 Zanza, ch' saveva zà al mal trattamèint ch'
 era fatt allà fiola, da donna prudèinta steva
 quieta, ma per rimediari in part, e ch' la
 fiola n' avess po da stintar de tropp, a forza
 d' quattrein l' aveva trovâ la maniera d' man-
 dari tûtt i dé da magnar e da bêver; mo la
 n' mancava d' suppiar sòtt' aqua in-t-el-i urècc'
 di curtsan. Intant ch' passava sti coss al vegn
 a murir al Rè, e al sgnèr Spasmein dvintò
 padròn assolut dèl Règn. Cmod sol suzzedr
 in-t-el coss novi, chi era cuntèint, e chi no
 di purtamèint dèl Rè zouven; mo tant e tant
 i tiravn innanz a ubbidirel'. L' era po tant
 superb e ambiziòus, ch' a i vegn in caprezi
 d' fars' vèder in-t-el-i alter zittâ dèl règn. Al
 fé mettr in òurden tanta milezia, el guardi
 d' unòur, el carrozz da gala, el livré, un
 gran seguit d' pagg' e d' servitur, per far vè-
 der la so grandèzza, e quèll ch' al pinsass
 manc fú al mettr in bon' man al gveren d'la
 Capital. Basta l' andò vi cùn sta gran comi-
 tiva, ch' l' aveva dspuiâ la zittâ dèl miòur,
 ch' l' era dvintâ ch' la pareva un dsert. I ztta-
 dein malinconic, e malcunteint n' feven che
 murmurar, e alla mazòur part a i saveva
 d' mal d' qula povra spòusa ch' al Rè aveva
 lassâ a cà, e trattâ a qula maniera. La Barun-
 èssa da donna svelta n' feva che suppiar in-t-al

fug, ch' era anc avlà, fein che dòp quale sttimana al saltò fora d'impruvvis. L'era d'carenval, e in quell mèinter, ch' al Rè s' diverteva es spindeva i tsor in-t-un' altra zit-tà, i curtsan, e qui ch'ern armas alla capital sbadacciaven dalla noia. A n' s' feva el fêst d' còurt, a n' i era veglion, nè opera, e la povra zèint en' guadagnava ngotta. Un qualc curtsan amig dla Barunèssa n' lassava d' tizgar al fug d' maniera ch' al giovedé grass una massa d' operari, e d' biricchein andònn a palazz, e s' messu a ziggar ch' i vleven vèder la Regeina. Lì era allòura iúst a dsnar cún la Barunèssa so mader, e cún i curtsan del so parté, e a n' i pars vèira d' còrrer alla ringhira, e d' mustrars' aqusé cmod la stava cún al tvaìol dinanz: e lòur: viva la Regeina, viva la nostra Padròuna. I preparònn di falò e dell'-i allgrèzz per la sira; po un gran veglion cún al teatr inluminâ, es era tût al paéis alligher, ch' a n' pareva nianc piú quell. I partsan del Rè spedènn sùbit qu' alter dé secretamèint un currir a farl' avisâ d' sta dsgrazia per lú; mo la Barunèssa ch' era una donna savia, e peina d'inzègn, la sira in pè d' andar a divertirs', l'era parté in-t-un caruzzein, e l' arrivò dov' era al Rè, e la i cuntò quell ch' era suzèss, prema ch' al le savess da nssùn alter. Lì po al cunsìò a star quiet du o trì dé, e po al fé turnar sig alla Capital. La 'l presentò a so fiola, ch' l'abbraz-zò, es fénn la pas. Lú po seguitò a regolars'

bèin, e cún i cunsei d' so muier e dla Barunèssa al gvernò sèimper i su súddit piú da pader che da Rê.

FOLA SÈTTIMA

I zeinqu Fradi.

A i era una volta un om da bèin, ch'aveva nom Pacciòn; quèst aveva zeinq fiù masti, ch' n' eren gnanc bon d' tors' da bèver. Al puvrètt d' so pader era dsprâ, perchè lú dvin-tava vècc', es vdeva ch' d'òp la so mort i arén tgnú dmaudar la limosna, e po anc a-i agher-vava, perchè i n' eren bon d' dari aiut a lú. Un dé a i fé un dscòurs, dsèndi: i mi ragazz, al zil sa mo lú s' a v' voi bèin, perchè, a dirò cmod déss qu'altr, a sì mi fiù, e me n' poss far a manc: mo a n' importa: me n' poss piú védrev' star lé con i deint in bòcca, e ch' a n' v' avadi mai dà inzgnar, me n' in guadagn,

e m'era vgnú in pinsir, ch' a procurassi un poc d'andar vi pr al mònd a vèder s'a pses-si buscar cvèll, e po, s' l' ha da vgnir vèira quell pruverbi, ch' dis:

Chi mett al matt da per sé,
Pèinsa la nòtt quell ch' l' ha da far al dé.

Per sta rasòn la n' v' aré d'andar mal, ch'al prev èsser, che quand a vdrì ch' al bsgnarà, cm'a vli magnar, ch' a v' ruspadi in bisacca, cherdim' ch'a v' inzgnarì in qualc manira: me vré dònca ch' a pruvassu sta cossa sòul pr un ann, ma non d' piú; andâ ún in zà, ún in là, s' a vli, e d' co dl' ann me v' aspètt, es starò a vèder chi è stâ al piú gaiard a imparar cvèll. I zuven fenn cmod i dess so pader; ògnún d' lòur s' tols qui pù d' strazz d' pagn, e d' camis, e lizenziands' da so padr, i andònn chi qué, e chi lé, e ún n' sav piú dl' altr; sen' che d' cò dl' ann, cmod i ern armas daccord, i s' trovònn tútt zeinqu a cà. Al pâ i fé algrèzza, es cminzò apparciar al tavlein per dari da magnar, perchè al vest ch' i eren stracc madur. In quell mèinter ch' i ern al piú bèll dèl dsnar, a s' sinté cantar un usèll, e al piú pznein di zeinqu fradi s' livò sù cún una gran frèzza, es andò Té fora in t' un curidur, e po sté tant a turnar in cà, ch' l' era zà dsparcciâ. Pacción so pader, ch' n' i avé gnanc dmandâ a nssùn cossa i avevn imparâ, quand st'ultem fú turnâ lé a seder,

a i cminzò a interrogar, dis: sù, fiù, cun-
 sulam' un poc, ch'a senta s'l'è pussebil ch'a v'
 pssadi guadagnar al pan! Lúzz, ch'era al piú
 grand, arspòus prema di altr, es dess: me a-i
 ho impará d'far al lader, me sòn al capu-
 rion d'qui, ch'san far di laz, e trovar dell'
 invenzion per rubar, e qusé trest cm'a sòn,
 a m' dò vant ch' a i seppa puc fraiù ch' la
 scappen, d'qui ch'a ved me, e qusé di bur-
 slein, e del bisacc, e po per sfundar del but-
 tèig, e torr zò el ciavadur, a n' i è al cum-
 pagu. So padr arspòus: o bravo alla fè! t'hâ
 bèiu trovâ al secret d'guadagnart' al pan
 fenna ch' t' camp, perchè t' in rusgarâ puc
 di grugnù, ch' i t' faran la carità d'attaccart'
 a un par d'fòurc, e qusé t' n' arâ assâ, e
 d'avanz, per fena ch' t' camp; oh puvrètt me!
 questi ein di mi guadagn lòur. Al s'vultò po
 al secònd, ch' aveva nom Tillein: e te, dis,
 cossa sât' far? Quèst arspòus: a i ho impará
 d'far el harc: oh, dess so padr, almanc què-
 sta è un'art onorata, ch' t' pù andar cùn al
 to mustazz dscvert da per tútt! E te Rizzòn,
 (ch'era ún d'qui alter) cossa hât' imparâ? Lú
 arspòus: d' tirar drett cùn la balèstra, mo
 qusé giústamèint, ch'a cav un occ' a un gall
 cùn una fazilitâ grandissima. Paccion dess:
 eh anc quèst è qualc cossa: t' pù andar a caz-
 za, e po vèndr i animal ch' t' amazz, tant
 ch' t' camp; e po s'vultò a Iacmein, ch'era
 al quart, dmandandi anc' a lú dèl so mstir.
 Lú dess: mo a i ho impará d'cgnostr un'erba,

ch'arsússita i murt me, tolé. So padr arspòus: o una búscia! mo se sta cossa è vèira, a n' i è piú dúbbi ch' a siamen puvrett: casp: ògnún vrá ch' t' i vag arsussitar i murt, ch' t' andarà al cà, ch' t' en' prà far la parà, es t' durnaràn di bì regal. Oss, all' ultem dis, (ch' l' era al piú pznein, es aveva nom Minghètt) sú, cossa sàt' far? Quèst arspòus: mo me intènd al linguagg' di usí. So pader dess: ah! n' t' maraviar, s' quand t' er a tavla t' i livá sú, quand qull' usèll cantava! mo zà donca ch' t' fà al quatter d' vaultart' d' intèndri, demm' mo cossa al dseva? Minghètt arspòus: mo al cuntava, ch' un om salvadgh ha rubbá la fiola dèl Rè d' Altgoff, es l' hà purtà sòuvra a un scúci, e i sù n' in pònn savèir nè ram, nè radis, e al so pá ha tratt un band, che chi la trova, e chi i la porta, a i la darà per muier lú: al n' ha po dett alter. Mo s' quèsta è aqusé, arspòus Lúzz, nú d' ògn' òura arein in garètt Giov, perchè me, ch' so rubbar sé bèin, a m' basta l' anem d' livarla all' om salvadgh, iúst cmod s' fa a spudar in tèrra. Al pá dess: mo avèin d' andar iúst adèss nú: andèin dinanz al Rè, e s' al z' dà la parola d' dars' la fiola per muier, nú a i avèin da prumèttèr d' trovarila. Tútt armasen qusé d'accord, e Titein fé sùbit una barca, e tútt s' i messen dèintr, es andavn, ch' i vulaven. I arrivònn a Altgoff, i dmandònn udièinza al Rè, es i fenn la prumèssa d' purtari la fiola, purch' lú mantgness la parola d' darila per

muier. Al Rè arspòus: mo sé alla fè, ch'a v' la darò, dis, a v' in daré bèin quatter del fio- li, s' a li avess: a n' fari tropp vù al gran servezi a cundurmla. Lòur tolsen sù d' run- dèlla, es andònn per d' là da quell scoi, es trovònn l'om salvadg, ch'era lé al sòul cùn la sgnòura, ch'era a sedr-in-t-l'erba, e l'om salvadgh s' era indurmintâ cùn la tèsta in grèmb alla sgnureina. Lì, quand la vest ar- rivar sta barca, la s' algrò, es se vlé livar sù dèl gùst d' vdèir arrivar sta zèint, mo Paccion i zgnò cùn un did alla bòcca, ch'la stess fèirma, e po s' i accustònn in púnta d'pè, es messn un gran perdòn sòtta alla tèsta dl'om salvadg, e po dénn la man alla sgnòura, ch' s' livò in pi, e aiutâ dalla destrèzza d' Lúzz, ch' savé sé bèin rubbar, i s' la fénu, e vi in barca, ch' i n' vdeven l' òura d' èssr a salvamèint. Mo i n' fúnn gnanc lontan quant è d' qué a lé, ch' l' om salvadgh se dsdò, e quand al vest ch' era stâ alzâ al pèzz, al guardò vers al mar, es vest la barca, ch' a- veva la Diva. Siccòm, òultra all'èssr om sal- vadg, l'era anc un sterion, cossa féll lú? Al s' trasfurmò in-t-una núvla lú, s' a n' v' è d' in- comod, es còurs pr aiar sòúvra alla barca. La sgnòura Zvanna s' n' adé, (ch' l' aveva nom æqusé la sgnòura) es dess: oh guardâ mo lé, ch' gnaccara! vdiv' qula cossa, ch' è là sù? la par bèiu una núvla, mo l' è l' om sal- vadg vdé: oh tanto benino, me so cmod al fa, es i vega tant la gran termari, ch' a s' i

moss el convulsìon, e al sangu i andò al cor, e in conclusìon la mors lé, tù. Rizzòn, ch' era quel, ch' tirava drett quand al vest avsinar la núvla, al ciappò la balèstra: e top-pa: al dé iúst in ti ucc' all' om salvadg, ch' dal gran spasm, al svulattò fora d'in t'la núvla, es dé zò, ch' al pars un mazz, ch' cascass, es fé tri, o quatter scamazzù, e po mors. Quand tútt qui omn aven finé d'guardar a qulú, i s' vultòn alla so barca, per vdèir cossa dsè la sgnòura Zvanna allòura, ch' era mort l' om salvadg; quand i vesten ch' la n' batté nè pè nè pòns, ún d'lour dess a qui altr: uhi: lumá mo: so pader dmandò: mo cossa? Tillein arspòus: mo a n' i vdi lúm? Diavl: a n' capì, ch' la sgnòura è morta? Paccìon dess, tútt affanná: oh dèini dèl nas! oh adèssò sé, ch' a dvintarèin recc! oh basta dir, ch' a sòn me! oh a spusarèin mo la fiola dèl Rè, a i ho squas dett, dov s' sol dir! Iacmein sté quèid un pzol a sintir st gran baccan, ch' fèva so padr, e po in ultim al dess; mo che nova? A n' v' arcurdá piú ch' virtú a-i ho me? A n' v' si tgnú a mèint, ch' a cgnoss un' erba, ch' arsussita i murt? Vgni pur vú mig, ch' a pssamen smuntar in tèrra, tant ch' accatta l' erba, e po n' stá a zercar alter. So padr arspòus: oh seppt' bendètt, t' m' há dà la veta. Iacmein fé vultar la barca vers al règn d' Altgoff, perchè l' aveva vest là d' qul' erba. I andònn a tèrra, e súbit ch' al l' ay colta, al la struffiunò, es striccò

d' quell sug in bócca alla prinzipèssa ; lì s' cminzò a slungar , e a sbadacciar cmod fa ún ch' ava durmè , e insòmma la turnò viva . A pssi crèder , ch' algrèzza i aven tútt ; i andònn dinanz al Rè , che n' s' psseva saziar d' basar la fiola , e d' ringraziar quel persòn' . Lòur po dessen : oh , sacra curòuna , al stà mo a lì a mantgnir la parola : nú avèin mantgnú la nostra . Al Rè arspòus : mo a dsì al vèir vù , fiù ; mo mi fiola me n' la poss dar sn' a ún : s' la fúss un purzlein , a darev un zampètt a ún , una brasadla a un alter , mo qué , a quel ch' a m' cuntà , avi avú tútt man in-t-al liberarla dall' om salvadg : cmod vliv' ch' a fazza ? Al mazòur , ch' era al pader , arspòus : al prèmi ha da èsser secònd la fadiga : ch' al giúdica mo lú chi ha piú affadigà d' nú , e ch' al daga la pútt a chi s' la merita . Al Rè dess : oh t' parl pur po bèin ! ossú , cuntám' ogn ún d' vù cossa avi fatt . Tútt cminzònn : me a i ho fatt quèst , e qu' altr , e me in-t-al tal mod , e in-t-al tal ; quand i fúnn d' cò , al Rè s' vultò al pader , dmandandi : e vù nunein , cossa aviv' fatt ? Paccìon arspòus : mo a m' par ch' a i ho fatt piú me , ch' i n' han fatt tútt lòur insèm , perchè a m' sòn inzgnà d' dari da magnar , tant ch' i arrivn a st post , ch' i han pssú imparar sti art , ch' s' a n' i avess mantgnú , i sreven tant usvei , ch' n' arén avú fià da star in pì . Al Rè , ch' sinté sti rasòn , pinsò un pzol , e po dess : savì , ch' a fà ? Tuliyla vù so pader , mèinter

ch' a si stâ vù, ch' avi fatt sti ragazz la s' v' aspètta a vù. A i dé una massa d' miara d' lir in dota, es dvintò una cà recca. Al vegn po vèira al pruverbi, ch' dis:

Cm' a s' è in dù a ragagnar,
Al veinz quell, ch' n' i ha a ch' far.

F O L A U T T A V A

Ninlein e Ninleina.

Dis, ch' a i era una volta un om, ch' aveva nom Zanètt; quèst era armas vèdev cùn du fiù, un masti, e una fèmna; al masti aveva nom Ninlein, e la fèmna Ninleina. St om vleva sé gran bèin a sti dòu creatur, ch' lù s' sré cavâ al cor per dariel', e iúst perchè a i vleva sé gran bèin, al pinsò a torr un' altra muier, perchè i fússen tgnú arstâ, e ch' i avessen qualcùn, ch' i cunzass i sù

pagnarein, perchè l'our eren pznein purassâ,
 e lú tgneva andar a buttèiga, e sti tus n'ern
 abaglié cmod lú arev vlú. E qusé dònca per
 mala furtòuna d'sti tuset al tols una diavla
 d'una donna, che n'fú sé prèst dèinter dall'
 uss, ch'la cminzò a mettr fora al bsei d'una
 teinta, ch' a v'sò dir me, ch' la n' ingannava
 nssún, ch' la s' feva cgnosser quant la psava,
 e tútt al dé, cm' a la vlevi, a n' s' sinteva alter:
 cossa sòn-ia vgnú in sta cà? Per sbduciar i fiù
 di alter? Oh a m' mancava a me i parté d' chi
 m' aré tolta, es n' arev avú sti bambuzz da
 smerdar; oh guarda mo te! a m' pssé pur piú
 tost anngar, cm' avé da vgnir a far sta veta;
 a n' sâ mega vgnú per far la massara, e me
 assolutamèint, cm' a n' i trovâ remedi vú, mi
 maré, me andarò vi, quand n' i vaga i ra-
 gazz. Al puvrètt d' so maré, ch' da una ban-
 da al vleva bèin a i fiù, dall' altra al n' aré
 vlú, ch' qula braganossa se dsgustass, a n' sa-
 vé ch' parté s' piar, e alla prema al dess assâ
 lú, ch' la n' i stess mega a far tant pladur,
 ch' a i n' avè pein al fus; mo al vest po,
 ch' la piava ògn volta piú fug, al cminzò
 a caiar, es i dess: stâ mo quèida, ch' innanz
 a dmatteina a òura de dsnar a sri cuntèinta,
 tasi mo, e n' alzâ piú l'orghen. E in effètt,
 una matteina, ch' la sira innanz i era stâ una
 gran vergna, al ciappò sú qui du puvr in-
 nuzintein, es i insfilzò in t'al brazzein al so
 panir, ch' i adruvaven d' andar a scola, ch'
 a i l' aveva impé d' pir secc, d' nus, e d' u

sècca, e po i cundúss fora d' una porta in t' un bosc. Quand i fúnn là, al pâ i dess: i mi fandsein, stâ mo qué, e magnâ sta bona qulaziòn, ch' avì in-t-al panirein, e po i dé anc un fiaschètt d' vein, dsèndi: tolé: bvi, e magnâ: quand avì finè, s' a vli turnar a cà, a v' fazz la strâ cún una stressla d' zènder, quèsta v' insgnarà la vi, a cas ch' a n' savessi truar l' úss: adì l' mi creatur: a i dé un bas pròn pianzènd, ch' a si spzzava al cor. I fandsein sténn là tútt quell dé, ch' in s' mossen, mo quand i vesten vgnir sira, i aven pora che n' vgness qualc bistia a magnari, es cminzònn a tgnir dri alla zènder, tant ch' i arrivònn planein planein a cà dal pâ, ch' l' era zà mézza nott. Quand la madreña i vest, la dé in del smani, ch' la n' pareva una creatura, ch' avess l' us d' rasòn, mo la paré una tìgra. La cminzò a dir e ch' madesé, e ch' zà, e là, e ch' al pinsass pur a prudèri, ch' li n' vlé piú star cún lú, ch' la srev andâ a cà di sù, ch' la n' era vgnú in qula cà per limosna, ch' la i aveva purtà calzèidr, e caldareina; in sòmna, la bragunò tant, ch' s' al povr om vols campar, bisugnò ch' al turnass a torr sù i su tus, e ch' a i cündusess un' altra volta in t' al solit bosc; al i impé un' altra volta al panirein, e al fiaschètt, e po quand al fú per separars' da lòur, a i dess: i mi car fiù a vdi cossa a sòn sfurzâ a far, al zil sà s' a m' in crèppa al cor: túttavì me crèd ch' a starì sèimper mei que

in st bosc, ch' a n'faressi in man a quila razza storta d' mi muier: quand avi finé al pagnirein, lassála cantar, e turnà da me, s' a in avi voia; a v' fazz al sentir d' rëmel, tgnì dri a quèst, ch' v' iusgnarà la cà, me vdrò d' porzerv' cvèll, da star però fora dall' úss. Quand l' av dett sti parol, al vultò in là la tēsta, perch' i n' al vdessen piauzer e per n' i vdèir lú lour. I puvrein quand s' i fú finé al magnar, vleven turnar a cà, mo un asen ch' era passà per d' lé, avé magnà al rëmel, es n' savèn truvàr la vi. I sténn po di dé, e di dé zirand pr al bosc, mo i s' sluntanaven ògn volta piú, es campaven d' ianda, e d' castagn. Mo al zil, ch' n' abbandòuna po mai nssùn, fé ch' la furtouna purtass lé un prèinzip, ch' andava a cazza; quèst aveva i can, ch' abbaïaven, e Ninlein av tanta la gran pora, che n' savènd quèll ch' al s' fess, al s' ficcò dèinter da un gran alber ch' aveva una gran cava in-t-al pè, e la Ninleina n' vest dòv füss scappà al fradlein, e pinsand d' tgnì dri, què currènd per la pora, la ussé fora dal bosc, es andò vers la mareina, e alla riva a i era di cursar, ch' eren vgnù a tèrra. Questi, vdènd sta bèlla zaquleina, ún d' lour ch' era al patròn, la ciappò sú in brazz, es la partò a cà da so muier, ch' s' allgrò a vdèir sta fandseina, perchè l' era dscunsulà per la mort d' una so fiola, ch' era suzèssa poc innanz, e què i fénn cònt d' tgnì sta lousa in lug d' quèlla. Oss a lassarèin mo

la Ninleina in man a sta zèint, es turnarèin là da qu' alber, dov era arpiatâ Ninlein. I can andaven abaiand lé d' intòuren, perchè i vdeven ch' a i era cvèll lé dèinter, al prèinzip, ch' sinteva st pladur, ch' feva i can, dé òurden, ch' a s' guardass cún diligèinza lé dèinter; i i guardònn, es trovònn st bèll mamein d' fandsein, che n' sav dir d' chi l' era fiol, sen' ch' al dseva, ch' l' avé nom Ninleiu. Al prèinzip al fé torr sú in brazz, es al fé purtar alla còurt, e po al fé mandar a scola, es vols ch' s' i insgnass d' ogn cossa, e quand al fú grandsein, a i fé imparar d' far al scalc, ch' al taiava el piattanz, ch' a n' s' pssé far d' piú. In st mèinter mo quell' cursar ch' a-i ho dett ch' avé tolt la Ninleina, fú dscvert pr un bèll lader, es aveva dri i sberr, ch' i feven la rònnda per cundurel' in persòun, mo lú s' inzgnò, es dunò la manza al barisèll, e qui ch' al zercaven, asrònn i ucc', tant ch' al pssé scappar dal lug dov l' era, e mudar paèis: almanc al vlé prubar a mudarel'. Mo al purtò al cas, ch' mèinter ch' l' era imbarcâ lú cún tûtta la famèia (mitten-di anc la Ninleina) al vegn una timpèsta, ch' arvultò la barca d' sòtta in sú, e tût s' angònn, ézzètt che la Ninleina, perchè al zil salvò quella, ch' n' avé còulpa d' quell mal ch' feva qui alter. Súbit ch' fú prigulâ tûtta sta zèint, al vegn lé vsein vsein alla barca un gran pèss; mo e ch' mustazz d' pèss! l' era grand cm' è una cà, es era affadâ. Quèst

avers una buccazza granda cm' è un fòuren, es tols la Ninleina in bòcca. La povra tusètta zigava, ch' là cherdé ch' st pèss la vless magnar, mo l' armas curta, quand la vest ch' dèinter da sta bistia a i era una casa la piú bèlla ch' a vlessi vèder, e un ort, ch' era tant grand, ch' l' andava infèin alla piazza, e un zardein pein d' fiur, e del delezi, ch' la Ninleina n' savé cossa s' desiderar, ch' la steva da prinzipèssa. St pèss la purtava a spass vsein a un scoi, dov i arspundeva al zardein d' quell prèinzip patròn d' Ninlein, ch' a i steva sig per scalc. Un dé, ch' l' era ún di piú gran cald, ch' fússen gnanc stâ, al vegn zò al prèinzip a piar un po d' frèsc in quell mèinter ch' l' aspttava ch' s' amanvass al dsnar, perchè qula matteina al feva tantara, ch' a i aveva d' andar di su amig. Ninlein in quell mèinter era sú in s' l' antana a aguzzar i curtì, perchè l' avé premura d' fars' unòur, ch' a s' tratta d' dir, ch' al taiava sé bèin i animal, e tútt el piattanz, ch' l' aré infèin taiâ a mèzz un cavèil. La Ninleina mo era lé, ch' al pèss i l' aveva purtâ, es steva po lé st pover pèss alla pazeinzia cún la so bòcca avèta, tant ch' la Ninleina s' divertess a vèder cossa s' feva lé dlà dal prèinzip, e siccom, cmod a-i ho dett, st pèss era affadâ, al saveva lú quand era òura d' purtar la tóusa, e quésé l' intravegn, ch' la Ninleina vest al fradlein, es l' arvisò, sebbèin ch' l' era passâ di ann, o ch' forsi la l' sintess ciamar, o ch' la

fada, zioè al pèss, i al dsess, o ch' so-ia me; basta, la conclusion è, ch' d' là dèinter d' in-t-al pèss la zanzò fort quant mai la pssé, digand:

O fradlein! o car fradlein!
 I curtì ein aguzzâ,
 Tútt el tavl ein apparciâ:
 Mo a n' importa: a me m' rincrèss,
 Ch' sèinza te a sòn dèintr a un pèss.

Ninlein la prema volta n' i dé fantasi, mo al prèinzip ch' era sòtta a una loza, s' vultò a sentir sta cossa in rema, es vest al pèss, dis: guardâ un pèss ch' parla in rema; al dess ai servitur, dis, guardâ un poc s' al pssi tirar cùn manira. In quell mèinter ch' i s' accustaven, e la Ninleina tuccava vi cùn la so canzòn:

O fradlein! o car fradlein!
 I curtì ein aguzzâ,
 Tútt el tavl ein apparciâ:
 Mo a n' importa: a me m' rincrèss,
 Ch' sèinza te a sòn dèintr a un pèss.

Al prèinzip cùn vucò tútt i curtsan, es cminzò a dmandar a ún pr ún, chi avé pers una surèlla? Ninlein arspòus: mo me a m' è d' avis, ch' quand a i era pzuèin, e vostra Al-tèzza m' atruvò là in quell bosc, ch' avess mig una surleina, ch' era anca lì pzuineina,

e me n' in ho mai piú savú nova. Al prèinzip dess: mo vgni un poc qué a gallòn a st pèss: chi vol savèir, ch' la zanzada n' si detta per vù? Ninlein s' accustò al scoi, es andò vsein al pèss, ch' era lé cún la so buccazza averta, ch' era larga si brazza, es spudò fora la Ninleina, ch' a s' dess iúst arvisar a una cumedia, ch' del volt a s' è vest vgnir fora una quale neinfa d' in bocca a un mòster; mo l' è mo, ch' l' era tant la bèlla ragazza, ch' l' innamurava. Al prèinzip dmandò po cmod era mo stâ st imbroi, e la Ninleina arspòus: mo s' a n' al sò: a m' arcord aqusé in berlúm, ch' una volta a i era in-t-un bosc, e ch' aveva un panirein pein d' bon' coss mo a n' sò po nè al che, nè al com, es sò ch' a i ho sèimpr avú nom Ninleina, es m' arcord d' una madregna, ch' aveva, ch' z' sculazzava tant me e mi fradlein, ch' anca lú aveva nom Ninlein, mo a n' sò po cmod s' ciamass al pâ. Al prèinzip per ciarirs' mess fora un band, ch' dseva: s' a i era qualcún, ch' di ann indri avess pers du fiù, ch' avessen nom ún Ninlein, e úna Ninleina, e ch' i avessen pers in-t-un bosc, ch' i vgnessn al palazz, ch' i n' arevn avú nova. Zanètt pader d' sti tus, ch' da qu' òura a quella, ch' a i lassò, al n' aveva mai piú avú bèin, per pora ch' i luv i avessen magnâ, al còurs cún una gran allgrèzza, es dess al prèinzip: Altèzza, a sòn me quell, ch' pers i fiù, es i cuntò, ch' l' avé bsgnâ lassari là per causa d' qula streia d' so

muier. Al prèinzip arspòus: o a fessi veramèint una bèll' ovra! a dsi èssr al gran barbazagn, avèir pora d' una fèmna: mo dis, a n' la savevi bastunar? Bsgnaré ciaparla lì, e po darven tant a vù, sena mai, ch' a fessi la stòppa lù vdé, e insgnarev' d' strafantar du ragazz, cmod era qui. Zanètt steva po lé cún al capèll in man, es n' savé cossa s' dir, e quand al prèinzip fú andâ dri un gran pèzz rumpèndi la divuziòn, a i dess: oss basta: a v' voi mo far vdèir i vuster fiù. Quand al vest ch' i ern i piú garbat zuven, ch' s' psessen vdèir, al pianzé dall' allgrèzza, es n' s' psseva saziar d' basari. Al prèinzip al fé po vstir da cavalir, ch' a n' al vols vdèir cún qula gabanazza; al mandò po a chiamar qula berghintòuna d' so muier, es en' vols brisa ch' al pâ s' partess dalla so presèinza, dand òurdu a tútt che nssún parlass a quli d'quèll ch' era suzzèss. Quand sta braghira i fú dinanz, a i mustrò qui du zuvnett, dsèndi: vdiv' lé quel dòu cheriatur? Lì dess: lustressem sé; e lù, o bèin dònca, a voi ch' a m' fadi servezi d' direm' cossa s' meritaré una donna, ch' i avess straniâ tant, ch' i fùssen fein audâ a priguel d' èsser magnâ dai luv, o d' murir d' fam. La dunazza, che n' s' aspptava brisa d' èsser lì quella, l' arspòus: cossa? Mo úna ch' avess fatt una cagnitâ sé granda, mo a n' faré alter bèin, nè alter mal, sen' ch' a la vré assrar in-t-una bòtt, e po la vré ruzzlar zò da una muntagna me; quèst

è quell ch' a faré. Al prèinzip dess: o bravo, t' l' há iúst pronunziá la sentèinza cmod l' andava. Vit' la mi streia? T' füss te, ch' t' arduess pr el tòu stranièzz quell mamalucc d' to maré a ficcar fora d' cà sti du tus, ch' i ein dá bélla andar in bòcca al bisti là in-t-al bosc: me, ch' sòn al prèinzip, e ch' ho da castigar chi fa dèl mal, a dag òurden es cmand, ch' iúst in st púnt t' sepp ficcá in sta bòtt, e prezipitá zò da una muntagna. Qusé fú súbit fatt. Al dé po una gran dota alla Ninleina, ch' tols un maré ricchessem, al fé un gross assegnamèint a Ninlein, ch' spusò una sgnòura, e so pader sté sèimper cún l'our, es campò cún altertanta allgrèzza, quant' era stá l' affann ch' l' aveva avú. La madre-gna, quand la fú asrà in-t-la bòtt, prema d' murir, la dess:

A m' psseva veramèint aspittar sta strètta;
Perchè chi fa dèl mal, dèl mal s' aspètta.

FOLA NONA

I tri Zider.

Al Rè d' Torr Longa aveva un fiol, ch' al n'al vdeva quant l'era long; tútt el sòu speranza era in st fiol, e un'òura i pareva mell ann, ch' dess fora qualc Rè, ch' i vless apunzar una fiola per spòusa, tant ch' al pless dvintar nunein. Ma pr al cuntrari mo al fiol n'era brisa cmod era al pader; quèst muveva d'voia d'vdèir per cà la spòusa del fiol, e quell a n' i impurtava un coren d'avèirla; l'era un cos salvadg, ch' n' i bastava l'anem d'piar amòur a ngòtta, e quand s' i dscurreva, ch' bsgnava pinsar a torr muier, e ch' l'era òura, al scussava la tèsta, es arspundeva: o zerto, e quaio: o me voi muier vè. Al sgnèr padr era propri dsprà, e quèst mo i pareva un guai grand, cmod srev quell d'un pover om, ch' n' avess pan da purtar alla so famèia. Lú i metteva dinanz al bisògn, ch' i era, ch' durass la so razza, es i pianzeva

dinanz, dsèndi: o, fiol mi, è pussebil ch' a ne m' vldi dar st gúst! mo al fiol: ehibò: piú dur d' un giaròn; l' era una têsta aqusé cucciuda, ch' a n' s' truvava al cumpagn. Mèinter ch' la cossa steva aqusé, al suzzêss un cas, ch' fé crêssr anc piú l' affann a quell puvrein dèl pader. Una mattena quand i eren tutt a tavla i avevn un' arcotta, e al préinzip in vols taiar zò una fètta, es s' fé un tai in-t-un did cún al curtèll, ch' a s' mess a spissinar al sangu; mo al steva tant bèin quell culour ròss cún quell bianc dl' arcotta, ch' al préinzip s' innamorò d' qui du cular, es dess: oh s' a m' dsessi mo ch' a i füss al mònd una donna bianca, e rossa cmod è st' arcotta, e st sangu, e ch' i m' la vlessen dar per muier, a sòn bèin d' accord, es i deg mo tant inanz, sguer pader, ch' a sòn propri in ghi-rigaia d' zercarn úna sé fatta, es i dmand adêss lizèinza d' andar pr al mònd a zercarla, sin' chi no a i vol nasser dèl mal. Al Rè arspòus: oh d' un' altra fatta! fein adêss a n' avì mai vlú ch' s' parla d' muier, adêss a v' la vli mo andar a zercar iúst vú: a-i ho bèin tant a car, ch' a la tuladi, mo me n' vrè, fiol mi, ch' andassi vi, perché a savì i gran pri-guel, ch' ein pr al mònd, e cossa incòtra chi viaza: ah nò, fiol mi, n' abbaudunâ voster pader, e lassâ ch' vaga dla zèint a zercarla per vú: la so cà n' s' trova mai vdé, fiol mi; e qué i feva di simiton, perchè al n' andass, mo al fú tutt ún, l' era zà ustinâ

cm' è un brecc, al s' impuntò, es la vols a so mod. So pader, ch' vest ch' l'era risolut, a i dé una bona quantitá d' zchein, e du o tri servitur, e pianzènd al le lizenziò, ch' lú a vdèir partir quell fiol, a s' i strappò al cor; a i sté a guardar dri sú da una fnèstra fena mai ch' al s' vdeva. Al prèinzip dònca lassò al padr agusé addulurá, es s' mess a truttar per del campagn, e di busc, e del vall, e del zittá, ch' a iu vest magara, e da per tútt al guardava al donn per vdèir s' a in accattava úna sé fatta, e mai i deva dèinter. Quand fú passá di mis, i servitur s' amalonn, e lú i andava lassand al spdal d' man in man ch' i deven zò, e po n' in vols piú torr nssún, es s' imbarcò in Gibiltèrra. Al tols un vassèll, es andò in-t-el-i Endi, e qué sèimper zercava in tútt el zittá, e in tútt el cà s' l' avess mai accattá úna cmod l' aveva lú in-t-al cor, e tant mnò i pì, ch' finalmèint l' arrivò all' Isola del donn salvadghi. Al smuntò a tèrra, es trovò una vèccia vèccia, sècca sècca, mo sècca, mo ch' era la piú brúttà figura, ch' fúss allòura al mònd; lú la salutò, e po s' i mess a cuntar per cossa l' era arrivá lé, zioè a i cuntò al bèll mutiv, ch' l' aveva d' girar al mònd, e ch' dal gran girandlar, l' era po arrivá lé. La veccia s' maraviò d' sta mattiria d' ún, ch' psseva star sé bèin a casa so, e ch' s' vlé strassinar per zercar una muier iúst mo sé fatta; la i dess po: o quell fiol! ch' al s' arpiátta pur, perchè a

i dirò: me a-i ho trèi fioli, ch' mal guai s' el s' accurzessen ch' al füss qué, el-i al magna-réun spzzâ in tant brasadel mêzz in-t-la tèia, e mêzz in-s-la gradèlla; ch' al scappa vi, perchè qué a n' stà bèin; mo s' l' andarà un po piú innanz, al truvarà quell ch' al zèirca. Quand al prèinzip udé sta cossa, a n' s' mess gnanc a sedr, es cminzò a còrrer vi. L' arrivò in-t-un alter paèis, dov al trovò un' altra vèccia piz dla prema per vi d' bruttèzza; anc a quèsta a i cuntò cossa l' aveva in tēsta, e li i arspòus: mo a n' stà zà bèin in sta cà lú, perchè el mi ragazzi, se bèin ch' el-i ein tusètti, el-i al magnaran, ch' al parrà únt, mo gran fatt ch' al vaga innanz, al truvarà quell, ch' al zèirca. Al prèinzip s' la fé a gamb bèin e prèst, es arrivò in-t-un lug, dov i era un' altra vèccia, ch' era a sedr in t' una roda, es aveva un panir insfilzâ in-t-un brazz, ch' era pein d' bscuttein, e d' cun-fètt, es deva sta robba da magnar a di asen, ch' l' aveva lé in so cumpagnì, i qual, quand i aveven magnâ, s' mttevn a saltar in-t-una riva d' un fiúm, e po deven di calz a di tucc, ch' eren lé. Quand al prèinzip fú dinanz a sta vèccia, al s' i mess a cuntar tütta l' istoria dèl so pellegrinagg'. La vèccia al cún-sulò, e po i dé una qulaziòn, ch' a v' imprumètt ch' al s' unzé i baffi, perchè l' aveva una fam ch' al mureva. Quand l' av finé d' magnar, la vèccia i dunò tri zider, ch' pareven iúst colt allòura d' in s' la pianta, la

i dunò anc un bèll curtèll, e po i dess: al po mo d'ògn'òura turnar a casa s'al vol, perchè a m'inmazin ch'l'ava pein al fus d'st viaz: zà l'ha accattà quell ch'al vleva, ch'a n'zèirca piú alter: bas la man a sgnèrì. Dis, ch'al vaga a bon viaz, e quand l'è vsein al so règn, ch'al s'feirma alla prema fontana ch'al trova, e ch'al taia ún d'sti zider, ch'al vdrà vgnir fora una bèlla fada: quèsta i dirà, ch'a m'daga da bèver, e lú sùbit ch'al seppa prònt cún l'aqua, s'in chi nò la s'sfumarà cmod fa al véint. Ch'al guarda po almanc d'èsser prèst quand al taia al secònd zèider, ch'anc d'in quell i ussirà una bellessima zòuvna, ch'i dmandarà anc quèlla da bèver; mo s'al diavel vless po mai ch'al fúss tant inuccà, ch'al lassas scappar anc quèlla, a i è po l'ultem zèider da taiar, ch's'a n'tein po adaccatt l'ultima, a n'sò cossa m'i far: pr'alter, s'al la pò aguantar, ch'al crèda ch'l'ha trovà d'posta la muier ch'al zèirca. Al prèinzip av tant la gran algrèzza d'st regal, ch'a n'saveva da ch'là s'cminzar a dar di cuntrasegn alla vèccia dèl so gradimèint; a i basò prema d'tors' d'lé, piú d'zèint volt la man, ch'era una manazza tutta plòusa, ch'la parè un rezz purzlein, al la ringraziò, es i dess tant: s'a sòn bon a servirla, ch'la m'cmanda, e li po i arspundé dell'i alter zirimoni, e in feiu lú s'cminzò aviar vers al so paèis. Per viaz a i intravegn qualc prigulúzz, cmod intravein a

chi viaza, mo a n' i fú cossa da faren cas. Quand al fú sòul lontan una giornata dal so règn, e ch' al passò pr un buschètt, dov i era una funtana, al s' mess a sedr in-t-un prà cvert d' malgaritein, e d' papaver ross, e lé al vols far la pruvana dla muier ch' avé da saltar fora. Al cavò d' in bisacca al cur-tèll, es cminzò a taiar al prem zèider: mo bona: d' manc en' fú d' quell ch' i avé dett la vèccia. Al saltò fora all' impruvis prèst cm' una losna la piú bèlla zòuvna ch' a n' i è mai dúbbi, chi avess vlú dpenzerla, ch' l'avess savú far aqusé bèlla, la pareva d' latt, e d' fravel. Quèsta súbit dess: dam' da bèver; mo al prènzip era qusé pers a guardari, ch' al n' udé gnanc quand la parlò, e lì topa, scappò vi cm' una saièta. A lú po a i vègn tant al gran affann, ch' a s' vlé infein dar di púgn dalla rabbia, ch' al s' era lassà scappar sé bèlla galantari d' in man; basta, l' avers al sègond, e puntualmèint al fé l' oca anc sta volta, es lassò andar vi anc quella, per n' èsser prèst a dari da bèver. L' era aqusé inspirtâ, ch' a s' dsé del villanì da can; al dsé: mo mai ai mi dé! Aviv' mai vest piz? Me crèd ch' al bsgnaré darm' in-s-la tèsta cmod s' fa a una bessa: s' a n' fúss stâ avvisâ, a srè da cumpatir: oss, dess, sú pur, a l' alter, ch' a fazza anc sta volta una qualc prudèzza. Al taiò l' ultem, es ussé fora una blèzza; mo una cossa, ch' era veramèint iotta; a n' i è piú dúbbi ch' s' in vèda úna sé fatta.

L'aveva tutt el blèzz ch' s' pònn avèir; quèsta i dmandò al solit da bèver, e lù sta volta n' i sté a pinsar, es i in dé. Quand l'av byù, l'armas lé da lù, ch'al la cuntimplava da un cò all' alter, ch' l' era iúst tal e qual al s' l' era figurâ lù, bianca em' era qu' arcotta, e ròssa, ch' la parè d' zinaber, di cavì biond em' è l' or, e di ucc' nigr amurâ, una bèlla bòcca, bèll nas, e insòmma bèlla da un cò all' alter. Al prèinzip s' andava sfergand i ucc', ch' l' avè pora de n' s' insuniar, mo al vest po ch' l' era veramèint una donna emod va, es s' i mess a far carèzz, e po i dess: mo sgnureina, a n' la voi mega cundur a casa qusé sèinza squarci, ch' a i la voi cundur conza da Regeina, e po bsò ch' a la fazza vstir, perchè aqusé dspuiâ, a i sré tropp guardâ dri; dis: fèin una cossa; a i è qué un alber, ch' è incavâ qué zò bass in-t-al pê, ch' al par iúst fatt a posta pr un stanziol, ch' la s' arampiga, ch' a i darò me la man, e po ch' la m' aspètta, ch' la pò crèder s' a m' inzgnarò d' turnar prèst a torla, es srò accumpagnâ da i mi servitur, e carrozz, e abit, e tutt quèll ch' i vol; li dess: mo sgnour sé, mo sgnour sé, ch' al s' serva pur. Lù andò, e li armas in-t-l' alber, al qual era propri dri alla spònda dla vasca, dov i cascava l' aqua dla funtana, e l' alber s' vdeva in-t-l' aqua, e qusé anc a s' vdeva la so figura d' li. Allòura a i era in qula zittâ una scia-va mora, ch' fù mandâ dalla so patròuna cù

un calzèider a torr d' qu' aqua d' qula fun-
tana da far una savunà. Qusti vest là zò in-
-t-l' aqua la figura d' quèlla, ch' era in-t-l' al-
ber, la pinsò d' èsser lì medesima, ch' fúss sé
bèlla, es dess in-t-al so linguaz (ch' i disen
mo, ch' è murèsc):

Cossa veder? Mi star sfortunata!

Dòncà sì bella star,

E patrona mi mandar

Tutt al dì aqua a pigliar?

Quand l' av dett aqusé, la cuzzunò cùn quant
fià l' av in tutt dòu el man al calzèider in
t' una masègna, ch' al dvintò una fritèlla, e
po seguitò:

Mi non dover tal cosa comportar.

Quand la fú a cà, la patròuna i dmandò:
mo e qusé, dov è mo al calzèider? La scia-
va arspòus:

Aver per desgrazia battut calzèider,

Essers' rott come fa 'l veder.

La patròuna i cress sta sfrappla, e qu' altra
nattena la i dé una barilleina, dsèndi: tù,
eimp mo quèsta d' aqua; lì andò là, es vest
un' altra volta in-t-l' aqua qula gran bèlla fio-
la, e cherdènd d' èsser lì, la cminzò a su-
spirar per cumpassion d' sè medesima, ch'
stess a far la serva:

Esser quisi bella!

la cminzò a dir:

Ah non esser propri pcà,

Che bellezza si sfundà

Sippa semper destinà

A servir! mo n' esser pcà?

E taff: quand l'av dett aqusé, la sbatté tant fort la barilleina in di cuden, ch' l'andò in mell brisel. Quand la fú a cà, la patròuna s' mess a zigar, cmod s'pò crèder, es i d'maudò cossa la i n' aveva mo fatt d' qula barilleina? Li arspòus:

Essr arrivat li vsin un asen:

*Mi barill aver posat,
E lù calz aveir dat,
E barill tutt quant sfundat.*

La patròuna n' pssé star a i segn dalla rabbia, es ciappò al mattarèll, es i dé tant bastunâ in-t-la scheina, ch' l'andò dri feiu ch' la fú stracca, e po vols ch' la turnass vi al loura cùn una brocca d' têrra, es i dess s' te n' em' vâ a impir sta brocca cùn qu' aqua, mal guai a te. La scciava turnò là tûtta in-grugnâ, l'impé la brocca caminand, mo in-t-l' andar vî, la guardò una bona volta in-t-l' aqua, la s' vest, o ch' la pinsò d' vèders' aqusé bella, es cminzò a esagerar la so dsgrazia d' avèir d' andar tra i pi alla patròuna, ch' era iustizzé, dis:

Mo esser pur mi matta:

Mi padrona star stizzata:

Mi non voler più udir bravada:

Star sì bella, e po servir?

Ah non vler più quest soffrir.

Quand l' av dett aqusé, la cminzò a sfuracciar la brocca cùn un aguccion gross gross, ch' l' aveva in têsta, e la brocca cminzò a trar vi l' aqua da tûtta qui bus, ch' la spissinava

da tútt i lâ. La zòuvna, ch' era in-t-l' alber arpiattâ, n' pssé star a i sègn dal gran redr, es fé una sbaccalarata fort, tant ch' la mora sinté, es vultò la tèsta in quell vers, dov l' aveva sintú reder, es vest qula gran bèlla cossa: la i dess:

Ah: cosa vedir?

Mi credir esser sì bella!

Mo capir ti dover donca esser quella?

Ma che far?

Perchè via non andar?

Qula zuvnèta, ch' era tútta curtsi, la i arspòus: mo s' a n' poss, ch' al bsò ch' aspètta un prèinzip, ch' m' ha da vgnir a torr, ch' l' è andâ a pruveder di abit, ch' a m' vein po a spusar, e perchè a n' vol ch' a seppa vesta in-t-al so règn aqusé nuda, a m' porta di abit, ch' sran bellessem: a n' sò mega mo d' ch' robba i sran, mo a crèd, ch' zerto i sran bi purassâ. La mora ch' sinté sta cossa, fé súbit i su cont d' vlèir far un tradimèint, e buscars' li, s' la psseva, quell bcunzein; l' arspòus alla zòuvna:

Marit nobil donca asptar?

Perchè testa non cunciar?

Mi voler, mi saver far,

Mi voler, ch' ti bella star.

La ragazza arspòus: mo sé bèin, mo sé bèin, vgnì pur vî, ch' a m' farì un gran servezi, perchè al perucchein s' è tútt sgumbiâ, e s' fé dar la man per pssèir smuntar dall' alber, ch' a vdèir quell dòu man uné insèm al parè

un pèzz d' caviar, e una zuncâ. La mora cminzò cùn un aguccion a cumpartir i cavi per far vesta d' vlèiri arrizzar; l' era un aguccion da un quattrein; (forsi qu' istèss, ch' l' avé adruvâ a sfuracciar la brocca) la tegn el dida un poc, cmod a dseva in-t-i cavì, e po ficcò dèinter in-t-la còdga dla tèsta l' aguccion, propri in-t-al zervèll, ch' la povra ragazza cridava quant la psseva dal spasm, es cminzò a dir; *oh clumbeina clumbeina*; in-t-al dir aqusé, la dvintò veramèint la piú bèlla clomba, ch' s' pssess vdèir, es vulò vi. La mora tútta alligra s' dspuiò da un cò al l' alter, pr arvisars' almanc in quèst a qula bèlla ragazza; la fé un fagúttazz di su pagn, che n' valeven dòu gazètt, es i tré vi luntan quant psé trar al so brazz, e li arstò lé dèinter da qu' alber pr asptar al prèinzip, ch' la pareva una statva d' carbòn. Intant st prèinzip turnò cùn una gran quantitâ di su cavalir, e un gran seguit d' altra zèint a cavall, al s' accustò all' alber, es trovò lé sta cossa. Al dé indrì, ch' al cherdé d' avèir barattâ alber, mo al vest ch' l' era po quèll, es dess: mo a deg, qula zòuvna, a ch' zug zughèn-ia? siv' vù, o n' siv'? La mora, ch' vest ch' l' era ingrugnâ fort, la i arspòus:

Ti restar tant maraviâ?

Mo tropp tard esser turnâ:

Perch' mi aria n' psser soffrir,

E far aqusi negra vegnir;

E ti causa esser d' st malann:

Star to dann, star to dann.

Al prèinzip dess: mo una búsca! a i dsi una bagattèlla vù a quèsta: oh quèst è stâ un bèll guadagn vé. Basta, qué a n's' pssé far alter: al ciappò sú qustì, es la cminzò a vstir cùn qui bi abit, ch' l' era bèin po un pccâ; a i deva di straputt in-t-al vstirla, es en' parlava, ch' l' avé un zuffazz, ch' s' sré ligâ cùn un cavzal, e po s' aviò cùn tûtta qula zèint alla zittâ, e tût i vgnevn incòtra, perchè a n' i era mai d' avvis d' vdèir qula bellèzza ch' al i aveva descrett. Quand al prèinzip i vest, a i cherssé piú la rabbia dalla vergògna, perchè al vdeva ch' al Rè, e la Regeina s' guardavn, e po s' strinzevn in-t-el spall. Al sinteva po dla zèint pr el strâ segònd ch' i passaven, ch' s' andaven dmandand l' ún a l' alter: mo èla quèsta? Oh la vol èsser la ladra Regeina! ohibò: ohibò: di alter dseven: mo n' sât' s' l' ha asiâ tût al mònd pr adlizerla, mo sé, es l' ha cattâ in-t-al mazz. Lú a sentir sti coss, a i vgnè mell rabbi attòuren. Non per quèst al Rè so pader, ch' i avé sèimper vlú un gran bèin, i fé la rnúnzia dèl règn, es al curunòn Rè, e alla sgnòura bambozza anca lì i i messen la curòuna in tèsta, ch' zigava misericordia. I volsen po far un gran dsnar, ch' i tolsen fein di cug in prèst, perchè a i era un gran da far; chi pistava el pulpètt, chi feva la tòurta, chi plava di tucc, chi cuseva el lasagn. In quell mèinter ch' i era st gran tiritost in cuseina, al vegu dèinter pr un fenstrein la piú bèlla clumbeina

ch' a vlessi vèder, la qual parlò, es dess: o cug, emod stà al Rè, dòp ch' l' ha spusà la so mora? Oh ch' bèlla figureina! Al cug alla prema n' badò a sta cossa, perchè l' aveva tropp da far, ma sta bstiola turnò un' altra volta a dir el-i istèss parol, e po anc la terza volta; al s' cminzò po a maraviar ch' una clomba parlass, es andò sù alla tayla a cuntar dla bistia, ch' era vgnú. I eren tutt lé a seder, e la sgnòura dl' alba cmandò, dis:

*Pigliarla, pigliarla,
E mi d' lung magnarla
Cotta che la sarà,
Mezza sopra un brodett,
E l' altra in tant polpelt.*

Al cug turnò zò, es andò cùn tanta destrèzza, ch' a i vegn fatt d' piarla, e po i striccò la tèsta, es la bagnò in-t-una caldareina d' aqua calda, es la plò; al tré po l' aqua cùn el pènn in-t-un curtil, ch' era dedri dalla cucina. A n' passò trì dé, ch' in quell lug, dov al i aveva tratt l' aqua, a i nassé un bèll alber d' zèider. La sgnòura zà s' magnò la clumbeina, e in fúss anc stà dell'-i alter. Al prèinzip mo non sòul n' aveva vest ch' la la magnass, mo al n' avé gnanc udé ngotta d' quell ch' era vgnú a cuntar al cug, perchè l' avé tant la gran louna d' avèir sé brúttà spòusa, ch' a n' magnava, es steva sèimper cùn al grúgn. Un dé l' era a una fnèstra a sbadacciar; sta fnèstra guardava iúst in quell curtilètt, dov i era nad st zèider; al s' maraviò

vdènd lé sta pianta qusé bella, ch' lú n' i avé
 mai vest, es dess: oh vé! mo cmod è nad lé
 quèll bèll alber d' zèider, che n' i è mai stâ?
 Al ciamò al cug, es i dmandò: da quand in
 zà è nad quèll zèider? Lú i cuntò la cossa
 dla clumbeina, e ch' l' era nad dòp ch' lú
 avé tratt lé el pènn, e l' aqua. Al prèinzip
 dess: oss teint a mèint, ch' l' ha da dar fora
 cvèll da st zèider. Al dé òurden sòtt pèna dla
 veta, che nssùn avess ardir d' ruspigar at-
 tòurn a qula pianta, e ch' s' avess una gran
 premura, ch' a n' s' guastass, anzi che a voi
 ch' al s' adacqua cún tútta la diligèinza. Da
 lé a puc dé l' alber mess fora tri bellessem
 zider, iúst cmod era qui ch' avé dunâ la don-
 na salvadga al prèinzip. Quand i fúnn d' qula
 grandèzza, al prèinzip i fé coier, e po s' as-
 srò in-t-una stanza, es tols sig una tazza
 d' aqua, e cún qu' istèss curtèll, ch' i avé
 dunâ qula donna (ch' al l' avé sèimper tgnú
 in bisacca) a i cminzò a taiar, es intravegn
 iúst quèll ch' era intravgnú alla prema; zioè
 d' saltar fora una bèlla fada, ch' dmandò da
 bèvr, e po dl' èsser lú qusé oca de n' i in
 dar. Dòp al prem, al taiò al secònd, e me-
 desimamèint vegn la fada, e dai pur cún sti
 fad, e dai pur a èsser lú un gran zuccòn.
 Finalmèint al taiò l' ultem, al saltò fora la
 bèlla ragazza, a i dé da béver, e lé i armas
 una bèlla tóusa tal e qual era la prema ch'
 l' avé lassâ là in-t-l' alber. Quèsta s' i mess
 a cuntar al tradimèint, ch' i era stâ fatt dalla

mora. A n' s' pò descriver l' allgrèzza in-t-la qual era al prèinzip pr avèir turnâ a trovar la bèlla ragazza; quèsta era tant granda, ch' a n' pssé sentir la rabbia, ch' i arev avú da far vgnir l' invenziòn d' qula streia dla mora; zà a st tradimèint l' avé pinsir d' remediari tant prèst, ch' a n' vols mo gnanc ch' sta cossa al dsturbass. I s' fénn po di squas, e del finèzz, ch' zà sèinza ch' a li cònta, a v' el pssì figurar. L' av po frèzza d' far una burla a tútt qui dla còurt, mustrandì sta bèlla fiola, e qusé caminand al s' fé purtar di pagu, es la vsté, e po la ciappò per man, es la cundúss in-t-la sala, ch' era tútta peina del sòu zèint d' lú, e d' nobiltâ, perchè a s' aveva da far una fèsta da ball, es i era l' invid. Al dmandò a ún pr ún, dis, dsim' un poc, ch' sorta d' castig meritare chi avess fatt un tort e un mal grandessem a sta sgnureina, ch' a i ho qué per man? Tútt arspundeven del pènn tamogni. In ultim al prèinzip ciamò la so bambozza d' Regeina, es i dmandò anc a li cossa l' arev fatt a chi avess tradé qula sgnòura. Li arspòus:

Brusar, brusar,

E po gli ossa tutt gettar

Zò da un mont:

Acciochè mai più trovar

La memoria d' tant affront.

Al prèinzip arspòus: oh bèin dònca: cún l' occasion, ch' t' i stá te, la mi braghira, ch' t' há tradé sta sgnòura, usurpandi la curòuna,

e fagandt' te Regeina, ch' a n' sò da ch' lèz, aqusé, la mi zaltròuna, t' pruvarà anc al castig, ch' t' merit, es voi ch' al si qu' istèss, ch' è stâ propost da te. Fecchet' mo dedri qu' aguccion, ch' t' i ficcass a li in-t-la têtta, e magna mo adèss qu'la súp'pa, e quèl brudètt ch' t' urduass cùn el sòu caren; lòuva dèl boia, te n' sâ ch' la fareina dèl diavel va tûtta in rêmèl? Sùbit finé la rumanzèina, al fú esegué la sentèinza, la fú brusâ, e po sparguiâ el zènder zò da una muntagna. La sgnòura nova armas li patròuna assoluta d' ogn' cossa, es fénn la so fêsta da ball cùn gran allgrèzza, e allòura al prèinzip turnò a far el nozz cùn altertant gúst in-t-el secòndi, quant l' aveva avú dspètt in-t-el premi.

FOLA DEZIMA



La finadga d' tûtta el Fol.

Tùtt sténn a udir cùn el-i urècc' bèin dretti st' ultma fola; mo s' a v' arcurdâ, quand i cminzonn a dir sti fol, a sarì ch' tûtta sti donn li cuntaven dinanz a un prèinzip, ch' avé

spusà una mora, ch' avé fatt una fufegna, ch' era iúst in-s-l'andar d'quèlla, ch' avé fatt gusti, ch' s' è descretta in st' ultma fola: e s' a n' v' arcurdassi bèin bèin al fil, tuliv' la pazeinza d' turnar a lêzer la prema fola, ch' a v' vgnarà in mèint ogn cossa. Allòura, cmod a-i ho dett, tútt sténn atteint a sintir st' ultma; mo siccom l'era zà cgnussú al tradimèint, ch' avé fatt qulì, ch' era dvintâ prinzipèssa, aqusé a i fú tra qui, ch' eren lé, ch' sbiasmònn qula zanzira, ch' era andâ a dsfurnar una fola, ch' pareva in púnt messa insèm per rinfazzar a qula sgnòura el sòu bugâ. Quell'-i alter donn el dseven: oh la n' avé mai da cuntar quèsta, presèint úna ch' ha sporc la camisa: diavel! l' è iúst iúst quell, ch' l' há fatt lì, e zerto quèlla ch' l' ha detta, l' è stâ un miraquel ch' la n' búscà di púgn in-t-al mustazz dalla prinzipèssa. Cmod in effètt, s' a n' vli mo alter, s' la n' buscò di púgn, almanc a s' vest ch' sta fola i vgné in garètt, es en' fé mai alter che aranzinar al mustazz, e s' la n' fúss stâ qusé nèigra, a s' srev vest ch' la sré dvintâ d' mell culur. A v' dsi zà arcudar, che qula bambozza i aveva mess attòuren tant al gran asiol d' voia d' udir del fol, ch' la n' psseva far a manc; pr alter, s' la n' fúss stâ sfurzâ dalla fada, ch' dess dar qul isteint alla bambozza, l' arev fatt dsfar la conversaziòn, quand la sinté gust' ultma. Al pò anc' ésser, ch' la stess lé pr en' dar suspètt al prèinzip so maré: basta, tra

quell e qu'alter, bisugnò ch' la bvess st si-
 ruppein, mo la dess in cor so: lassa pur far
 a me, s' t' hà cònt la fola, t' la padirà bèin
 vé. Al prèinzip, ch' a i piaseva mo purassâ
 al spass d' sti fol, n' sté a zercar s' a i era
 chi fúss dsgrustâ, perchè lú n' capé ngotta,
 es zgnò alla Zoza, ch' dsess un po sù quell
 ch' l' avé da dir. Sta Zoza era mo quella,
 ch' a i arev avú da tucçar al prèinzip per giu-
 stezia, s' quli n' i tuleva al post. Allòura
 dònca quand al prèinzip i urdnò la fola, la
 s' livò sù, es fé un bèll inchein, e po cmin-
 zò. Dis: i è mo dúbbi, Ezzellèinza, s' a la
 cònt cmod l' è, ch' a vegna po in garètt a
 qualcún? Perchè me i deg al vèir, a sòn úna,
 ch' bsò ch' a l' amòlla cmod a m' la seint:
 quell ch' a i ho in-t-al cor, a l' ho in-t-la lèin-
 gua. Al prèinzip arspòus: mo chi ha mo da
 ésser quell ch' i vegna in garètt ngotta? A
 sòn me ch' cmand, es n' ha da vgnir in ga-
 rètt a nssùn, cm' a ne m' vein a me: dis, dsì
 pur sù quell ch' a vli, ch' a sò me, ch' da
 quell bèll buchein a n' i ha da ussir sen' del
 coss ch' accomdn al stòmng. Sti parol ch' dess
 al prèinzip, fúnn tant stiltâ, ch' dénn in-t-al
 cor alla prinzipèssa mora, e al mssir i pip-
 pava, e in quant a li l' arev vlú éssr a dzún
 d' avèir fatt dir el fol, es dubitava purassâ
 ch' l' ùlma fúss al prinzeppi dla dseverta del
 sòu bugâ; la tgné dett: teint a mèint, ch' al
 mál tèimp se dscarga adoss a me. La Zoza
 intant cminzò a cuntar tùtt i su affann: prema

dla gran malincuni ch' la pateva, e po dl'aguraz ch' i fé qula véccia; al viaz ch' la fé pr atruvar al prèinzip; la funtana ch' la trovò, e in sòmma tútt quell ch' è in-t-la prema d' sti fol, ch' a la pssi turnar arlèzer. Quand la mora sinté sta tantaná, la dess tra i deint: oh una búscia! e po cminzò a cridar:

*Ti star zitta non parlar:
S' ti permetter d' seguitar,
E mi pugn in panza dar,
E to fiol vler ammazzar.*

Al prèinzip ch' capé ch' la sré dònca stâ la Zoza quella ch' i sré tòcca in scambi d' qulì, a i vegn tant sù i ciù, es i cherssé la rabbia a vdèir ch' la n' vleva lassar finir la parlada, ch' al s' i vultò cùn un dspètt, es i dess: alòn, a chi degh-ia? Chi it' te? A voi ch' la cònta ògn cossa da ra a ròn: s' t' em' ròmp nieint nieint dònd s' sol dir, a t' ficcarò cvèll in-t-al mustazz: al s' vultò po alla Zoza, es i dess: seguitâ pür vù, e lassà rangiar qulì. La Zoza seguitò a dir dla mastèlla, ch' la trovò peina quand la s' dsdò, e in ultem zgnand vers la stiava, dis: a m' è po stâ fatt l' ingann d' avèirèm' tolt Vostra Ezzellèinza. Quand la fú a numinarel' lù, la s' mess tant fort a pianzer, ch' la n' pssé piú finir. Al prèinzip capé allòura dèl tútt al trèintùn, es guardò alla scciava ch' s' era mess la tèsta in sèin cùn un grugnazz long long; al s' i mess a dir del villanì, ch' andònn dri dell' i

òur, e po vols ch' la cunfsass li d' so bòcca tútt al tradimèint. Al cmandò po ch' s' fess una busa in tèrra in-t-un prá, e ch' la i fúss supplé fein alla têsta, azziocché la stintass piú a murir. Al spusò po la Zoza, es fé avvisar al Rè d' Vall Plòusa, ch' era so pader d' li, ch' vgness al fêst, ch' fúnn zelebrá cún una magnifizèinza grandissima. Qusé finé la grandèzza d' qula sgnurazza pusteza, e qusé finess anca me el fol, ch' v' arànn sècc vù, ch' el-i avì lètt, anc piú ch' el n' m' han sèce me, ch' el-i ho scretti.

FEIN DÈL PENTAMERÒN.

**EL DSGRAZI
D' BERTULDEIN
DALLA ZÈINA**

MESS IN REMA

DA G. M. B.

ACCADÈMIC DÈL TRIDÈLL

D' BULÒGNA.

Handwritten text, possibly bleed-through from the reverse side of the page. The text is extremely faint and illegible.

Handwritten mark or signature, possibly a stylized letter or symbol.

L' AUTOUR

A CHI È DISCRET, E CH' VOL LÉZER.

L'è sèimper stâ un natural di bulgnis, ch' quand i vèden, o ch' i seinten qua s' voia cossa, a i vein súbit voia d' farla ancor' a lòur; e ch' al s' vèira, al s' è vest in tèmp dla guèrra, ch' tútt ein dvintâ suldâ, e cún piar geni a una naziòn, o all' altra, zà ch' a n' s' psseva cumbatter cún el-i arem, a s' cumbatteva cún el ciacher, e del volt anc d' tropp, ch' s' a n' i fúss stâ al priguel d' fars' mal, a s' sré vgnú spèss al brútt dèl sacc; e fein i ragazz pr en' savèir in altra manira far da suldâ, cún del lanzol e di bacchett, s' mtteven in urdinanza, es favn anca lòur al so mochel, e i feven tún cún la bòcca


per n' avèir altra pòlver da far di ciucc. S' l'è in tèmp d' pas, al suzed in tútt el coss l' istèss, e cm' a s' cmèinza una qualc qutà, la n' s' finess mai piú; ultimamèint la canzunètta, ch' dsé: *Tognin, tì me l' ha fatta*, sùbit, ch' la fú sintú cantar da du o tri d' sti urciant, ch' canten d' bòn gúst, a n' i è stà, che n' la cantass, e d' dé e d' nozz, e a dsnar e a zèna. A m' arcord, ch' una volta al vegn un Zarlatan in piazza, ch' sunava un teimpen d' lègn, e sùbit ch' i ragazz l' aven sintú, cùn un oss da marlett stiappà per mèzz, mttèndsl' alla bòcca, cmòd s' fa a sunar al biabò, i al cuntrafeven, ch' al pareva lú d' posta. Appèna anca me ho vest ussir d' sòtta al torc' dla stampa d' Léli dalla Vòulp al poema famòus d' Bertold, Bertuldein e Cagasènn, cumpost da tant valèintumon tútt virtuus, ma d' qui dal cular e d' prema bússla, e ch' a-i-ho sintú al gran strépit, ch' l' ha fatt per tútt al mònd, a m' è sùbit vgnú voia d' far al mi Bertuldein ancor' a

me, sèinza però al cattar d' arpur-
tarn' applaus e lod, ma per diver-
tirm' in mancanza d' fazzènd per la
mi profussion: Juli Zèiser Cròus,
ch' è stâ l' autòur e inventòur dèl
sudètt Bertold, fé un alter liberzol,
intitulâ: *Le disgrazie di Bartolino
dalla Zena*, e me ho tolt da quèst
la materia per fari sù i mi vers. El
rasòn, pr el qual a m' sòn attaccâ
a quèst, ein divers; prema, perchè
da ragazz l'era ún di piú famus li-
ber ch' a studiass, ch' al saveva squas
a mèint, e po perchè a-i-ho vest,
ch' el truvad d' st Autòur ein piasú
a di alter; e perch' al tratta d' una
figura nada in-t-al Cuntâ, e allivâ
in Bulògna, ch' a poss leberamèint
parlar bulgnèis sèinza studiar la Crú-
sca; sicchè dònca d' st Insturièta
tal e qual l' è, me en' n' ho nè me-
rit nè demerit, e a procur d' cun-
tarla tal e qual sèinza nssúna alte-
raziòn, fora d' qualc cargadurèta
per rèndr al liberzulètt piú alligher.
A m' sòn servé dèl nom d' Bertul-
dein, perchè l' è un nom piú gustòus

da proferirs', ch' n' è Bartulein, e po perchè l' è piú cgnussú da tútt, massm' in sta congiuntura. A sò, ch' al darà in-t-l' occ' a qualcdún l' avèir fatt tant sestein', e non uttav, quand quèsta è la maniera piú nobil e piú frequentâ quas da tútt. La rasunzeina perchè a-i-ho fatt aqusé l' è stâ per n' m' ubligar a trèi rem pr uttava, perchè, sebbèin ch' in-t-el sestein' a n' n' ho avú se n' dòu, piú volt a sòn stâ intrigâ a trovar anc quèlli, ch' m' han ubligâ, cmod a vdrì a far di stopa bus secc e ladr arrabbiâ; figurav' mo, s' a fúss stâ ubligâ a trèi? Ch' roba! massm en' s' trovand un rimari dla lèingua bulgnèisa, e po perch' a n' s' dega, ch' a sòn vlú intrar in duzeina cún l' autòur dèl Tass in bulgnèis, e d' la Vienna liberâ, perchè me n' sòn da metter cún quila zèint, ch' saveven cvèll, e me n' sò ngòtta, e po anc perch' al par, ch' el coss novi daghen piú gúst, e per far una cossa differèint dai alter, o bèin o mal ch' la s' staga, per tasèir

tant alter coss, ch' a pssré dir sòu-
 vra d' quèst. L' únic fein ch' a-i-ho
 avú, l' è stâ d' mettr alla lus una
 minciunari da divertir qualcdún ch'
 ava un' òura da trar vi, e ch' seppa
 stúff d' lêzer di liber bon. Sicchè a
 v' arcmand ch' arzvadi sta mi secca-
 gin' per quell ch' l' è, e ch' a tgnadi
 per fèirem, trovand qualc cargadu-
 ra, ch' a n' ho tolt d' mira nssún,
 e ch' a-i-ho fatt pr andar d' cò cún
 qualc cossa ch' divertessa, s' l' è pus-
 sebil. S' atruvâ po qualc nom d' Dei-
 tâ, o d' alter gargantelli, arcurdav'
 ch' a sòn cstian, e ch' per grazia d'
 Dì bendètt, a crèd in quell' ch' va
 cherdú da bòn cattolic. Sicchè ne m'
 ludâ ch' a n' al merit, cumpatim'
 s' a pssì, n' em' minciunâ s' a v' par,
 perch' a v' assicur ch' a perdì al tèimp,
 es minciunâ poc d' bòn. Stiavo.





On amig dl' Autòur i ha mandà da
Modna al seguènt

SUNÈTT.

Aressi mai pinsà , al mi Zèiser Cròus ,
Ch' a mèzz squas iúst al secol dèl sèttzèint ,
Vgness in-t-la tèsta a dla qusé brava zèint ,
D' rènder quel voster qutà ciar e famòus ?

I han pur fatt saltar fora el coss prezìous
Da quell pastòn ch' a i fessi , sti valeint
Furnarch's'ein mess a mnarel? A v'zurch'a sèint
Far i evviva da tùtt a peina vòus.

Qui dalla Crúsca han fatt del brazzadèll
Cùn el-i ov e cùn i ansein d' gúst sé perfètt ,
Ch' a n' i n' è arstà gnanc úna in-t-al scabèll.

E quand s' cherdeva ch' al tulir fúss nèt ,
L' è vgnú in buttèiga po quell dèl tridèll ,
E s' ha fatt cùn al rèst dèl pan buffètt.



CANT PREM.

A n' voi cantar nè d' arem, nè d' amur,
 Nè d' instori, nè d' fol; sòul a voi dir
 Per passar l' ozi, s' a m' starì a sentir,
 Alla bulgnèisa quatter cargadur;
 Es cantarò, s' al tgnarà sod la vèina,
 El dsgrazi d' Bertuldein dett dalla Zèina.

Vú Mus, ch' stâ là in Parnas per dar sentèinza
 Ai vers ch' ein sagattâ, e ch' n' ein d' misura,
 A v' preg a n' em' mandar a far cattura,
 Perch' a n' sòn d' l' art, es en' pag l' ubbidièinza,
 S' al vgnarà i mess, i turnaràn indri,
 Ch' in buttèiga a n' i è usvei da purtar vi.

Avàm' mo per sta volta cumpassiòn,
 Cmod avì avù tant volt per dl' altra zèint;
 Al prem a n' sòn, nè gnanc srò quell di zèint,
 Ch' aven dà qusé ne vlend' in-t-al minciòn;
 A s' è vest di alter vers ladr arrabbiâ,
 E qui ch' i han fatt, en' n' ein zà stâ impiccâ.

S' a deg quatter rimazzi alla strapì,
 Sèinz'òurden, sèinza rèigula, e sèinza intènder,
 Del luzzel per lantern a ne v' voi vènder;
 E s' l' è vèir quèll ch' a deg, a v' n' adari.
 Me n' sò ngòtta in-t-ngòtta, es en' sò d' letra,
 E per cantar, a n' sò accurdar la zetra.

Quèst n' è quèll Bertuldein, ch' fú dla famèia
 D' Bertold e d' Cagasènn; d' quèll a i è stâ
 Ch' n' ha savú dir qusé bèin, ch' l' è zà dvintâ
 Famòus al mònd, es ha rèis maravèia;
 Ma quèst e quèll en' n' ein pareint fra d' lòur,
 I ein bèin però tútt fiù dl' istèss' Autòur.

Al noster Bertuldein nassé in cãpagna;
 Vintura Mattarèll s' ciamò so pader,
 La Zé Lucheina Batla fú so mader;
 E pr arma i fevn un stlòn e una lasagna;
 In-t-al Cmún d' Granarol i steven d' cà,
 Dri alla Zèina, fiumètt ch' ògnún al sa.

Un mulein ch' si mis dl' ann masnava a sècc,
 Cún una ciusa feva andar Vintura,
 E cún l' avrir e srar la paradura,
 L' aqua ch' i vgneva, al feva star a stècc;
 Al guadagnava in st mod, pan, vein, brusar,
 E tútt al rêst ch' i psseva bisugnar.

La Zé Lucheina gravda in-t-i nov mis
 La ciusa dèl ciavgott andò pr avrir,
 Es i saltò i dular da parturir
 Per la fadiga tant all' impruvis,
 Ch' la n' psseva piú tgnir strecc, e la cridava,
 E la castlà svinò quand manc s' pinsava.

Cmod fa i zedron salvadg dla muntagnola,
 Quand un qualcún s' i accosta per tuccari,
 Ch' i squeezzn all' impruvis squas a guardari,
 Agusé fé la Lucheina, e s' n' è una fola,
 Ch' appèna al la tuccò la paradura,
 Ch' alla lus la squizzò la cheriatura.

La povra donna in mêzz a st gran spettaquel,
 Vdènd vguirs' al bògn a cò sèinza pulter,
 Truvands' lé da per li in quèll sgumbei,
 La dess: s' a n' mor sta volta, l' è un miraquel;
 E ciappand sú al ragazz ch' era in-t-al priguel,
 In frèzza còurs in cà a ligari al bliguel.

A quèst i messen nom po Bertuldein,
 Ch' aveva al mustazz long, e l' nas asquezz,
 Cún i ucc' losc purassâ culòur d' perdezz,
 E una bucheina cmod ha i rundanein.
 Al nassé tra 'l mulein e la cadèina,
 E per quèst al fú dett po dalla Zèina.

L' aveva ott ann, es era grass e bèll,
 Quand so padr accusâ fú sú in Turròn,
 D' avèir a poc a poc sèinza dscherziòn
 Magnâ in gnuc la fareina d' quèst e d' quèll,
 E dòp avèirl' i sberr piú volt zercâ,
 Al fú cmod s' dis, mal prèis, e bèin ligâ.

E quand al fú persòn, al prem esamen,
 Sòul per mustrar la sussezza d' canva,
 E ch' per tirarel' sú al sberr s' amanva,
 Lú arspònd a tútt, e s' dis al vèir s' i al ciamen;
 E perchè 'l ladrari eren stâ poc,
 L' av sòul l' eseli, es l' av cún tútt i fioc.

A i cunvegn malipand andarsen vi,
 E lassar la famèia sèinza guida,
 La mader pr al dulòur stiamazza, es crida,
 E al ragazz anca lú s' sgúmbia i cavì;
 Nssún pinsava ch' bsò abburir al vezi,
 A chi n' vol sblisgar zò per al przipezi.

L'era altèimp ch'in-t-l'Abrúzz s'feva la guèrra,
 E d' campagna sta guèrra era ciamâ,
 Dov Vintura i andò aqusé da dsprâ,
 Caminand part a pi, e part per tèrra.
 Perch' in-t-al pòzz al feva vdèir la louna,
 In poc tèimp al s' trovò la so furtouna.

Un uffizial franzèis al so servezi
 Al tols, perch'a i gvernass ogn dé al cavall.
 L'aveva un bòn salari, e di regal,
 Es campava molt bèin cún st eserzezi;
 Ma una stiuptâ sparâ da un furibònd,
 Fé fari un scamazzol a qu' alter mònd.

La védva ch' av sta nova, per dspraziòn
 S'vleva amazzar, s' l'amòur dèl fiol n' la tgueva,
 E la vindé tutt quell po d'stèint, ch' l'aveva,
 Es vegn a star qué dèintr a cà a pisòn;
 Dov la viveva sèinza avèir un sgdozz,
 Allivand cún miseria al so bambozz.

Tútt el fèst, la puvrètta po s' inzgnava,
 D' far da magnar a divers muradur,
 Tant ch' la campava, e po s' cminzò a introdur
 In-t-i suldâ d' palazz, e i pagn lavava;
 E Bertuldein dsé a tutt per cosa rara:
 La sguera mader fa la bugadara.

Sta povra donna, ch' n' era brúttá d' fatt,
 E praticand la còurt ch' s' usava allòura,
 L' aveva di spuracc' attòurn ògn' òura,
 Ma li i scurzeva tútt, iúst cm' è tant matt;
 E sòul un Mor, ch' serveva al prem cuccir,
 La persuas un poc cún al so dir.

Al s' intrudúss da li cún bèlla rasa,
 E cún bèll mod l' era dvintâ al patròn;
 L' andava e al stava in so conversaziòn,
 Es fé purtar rispètt alla so casa;
 Ma Bertuldein ch' era vgnú sú grandsètt,
 Pareva ch' n' avess geni cún st murètt.

L' aré vlú baccaiar, ma a n' mteva al cònt,
 Perchè s' a n' vgneva al mor, l' andava sbrisa,
 E premèndi al zibòn piú dla camisa,
 Ògn cosa per magnar s' mandava a mònt;
 Ch' pur trop anc al dé d' oz l' è vgnú l' usanza
 Al dvintar orb e mútt pr impir la panza.

Al mèster d' stalla ch' penetrò al trazètt,
 Cminzò a badar, e a tguiri l' occ' adoss,
 Es cgnussé ch' al rubava a piú non poss,
 Per mantgnir la Lucheina, e 'l so tusètt.
 La biava a dé per dé s' vdeva mancar,
 E ai cavai po tuccava d' sbadaciar.

E òultr a quèst a s' i attaccava al man
 Del fiúbb e del curèz di finimeint,
 Di burazz, e del spòng, e di frameint,
 D' la sonza, di frustein, fein di gaban;
 Ma al finé prèst al spass d' sti sù traloc,
 Perchè 'l nozz di baron zà duren poc.

D' sti truffarì al fú infurmâ la Curia;
 E Bertuldein fú súbit tolt d' mira,
 Ch'interrogâ da ún d' qulòur cún brúsca zira,
 Al cuntò ogn cossa bèin piú prèst che d' furia;
 Es se spianò al pruverbi ch' ògnún sà,
 Che 'l gallein' e i ragazz insporen el cà.

Poc dòp suzzêss, ch'al Mor a cavall dl' asen,
 Cún la metria e 'l patafi andò per piazza,
 E al boia dava al mòsc a qulà carnazza,
 Cúndiculp ch' vgnén dal ziliúst cm' è tant masen;
 E cún rasòn psseva dir l' African,
 Ch'al so amòur av al fein, c'ha quèll di can.

Uné po a sta tal fêsta la Lucheina
 Av i prezêtt de n' praticar piú al mròus,
 E per tútt al vsinâ a se spars la vòus,
 Ch' la svergugnò piú ch' s' la fúss stâ in berleina,
 Talmèint ch' l' a n' s' attintava piú a andar vî,
 S' n' in-t-l' òura quand vein fora i palpastrì.

Per tors d' in-t-i ucc'a quèll flazèll d' braghiri
 Ch' stavn in-t-al camp di bú, dov l' abitava,
 Tútt el strâ la zercò, es en' trovava
 Un qualc malèid, dov tgnir i su strafiri,
 E per sfugars' qand l' era qusé inspirtâ,
 La bagnava al ragazz del sculazzâ.

La dmandò tant, la s' arcmandò qusé fort
 A tútt qui ch' l' incuntrava e ch' la cgnusseva,
 Ch'a i ariussé po un dé, ch' la n' al cherdeva,
 D' trovar in-t-la so dsgrazia un po d' cunfort;
 Es andò a star per spènder puc quattreim,
 A mèzz dèl Frassinog al magazein.

E qué l'era ubligá sèimpr a servir
 Tútt qui puer dsgraziâ ch' magnaven là,
 Per guadagnar ògn dé da mettr in cà,
 Bèn e spèss di strappazz bsgnava soffrir;
 Cgnussènd qula verità ch' i savé dura,
 Ch' la miseria è una gran brúttta figura.

A st magazein un dé a i capitò
 Sètt birichein a far una tulliana,
 Ch' s' eren dsgrustâ cún dl' altra tribuldana;
 Perch' i n' avén avú tútt al fatt so;
 I avén di gatt scurdgâ d' qui di plizzar,
 Ch' i i vlén far cusr, e quèll era al so dsnar.

Ún avé nom Fasol, ún al Brusâ,
 E un alter i al ciamaven Quartdagnèll,
 A ún i i dsén la Vèccia, a ún Vermizèll,
 A quèll Nasturzi, e a qul alter Squatanâ,
 E a ún ch' fra d' lòur pareva al capural,
 Per sover nom i i dsén Magnazinzal.

In quèll mèinter ch' i aspttaven ch' s' amanyass,
 Du zugaven di stanta a taruchein,
 E du altr a caplètt in s' un tavlein,
 E du a batt mur; e ún d' lòur stava a spass,
 Ch' s' i trovaven del lit, al sentenziava,
 E tútt el differèinzi l' accumdava.

Quand pofú all'òurdn al dsnar, la Zé Lucheina
 I andò a apparciar la tavla sèinza tvaia,
 E qué a s' sinté un gran oh da sta canaia,
 Cmod s' al fúss arrivâ ún dalla Cheina;
 La i mess i su tond d' tèrra, e di tvaiú,
 Ch' eren tant nett, ch' i parén lisnarù.

E po la purtò in tavla a sti figur,
 Un mnêster d' manfattein in-t-al brod d' gatt,
 E dl' alter mnein alèss in-t-un gran piatt,
 E dl' astuvà ch' era d' tútt i culur;
 Ma in-t-al purtarl' a lì s' i arghegna al nas,
 E al stòmng s' i arvolta, per l' udòur ch' n' i pias.

Qstòur sguazzòn, a i dispiasé d' lassari el-i oss,
 Es bvènn dèl terzanèll ch' era da rê,
 E po dòp dsnâ i avènn al so caffè,
 Ch Zesmein i al dé, che vgné d' in Brochindoss;
 E cún la panza peina quant è l' ov,
 I s' messn aqusé fra d' lòur a dir del nov.

Sta mattena in-t-i Urevs i era un villan
 Dess al Brusà, ch' vlé vèndr un par d' tuchein
 E una mnâ d' qui buttgar ch' han al murbein
 S' ein mess d' accord per minciunar st bagian.
 Ún i ha dmandâ: quant vut' d' quèll par d' cappon?
 I ein tuc (i ha arspòus al gang) es ein d' qui bon.

E aqusé ún dòp l' alter fénn sta cantafola,
 Tant ch' al villan i messn in cunfusiòn.
 Qustú s' cminzò a sfergar i ucc', es dsé: me n' sòn
 Mega imberia, cuspètt, ch' a n' deg d' mi lola;
 Ma lòur i han fatt la burla da vulpon,
 Oh! l' ha bsgnâ ch' i tuc a i vènda per cappon.

Me v' in dirò una bèlla, dess Nasturzi,
 Ch' m' è mo suzzèssa a me l' alter diazzazz,
 Qué fora d' Saragozza al Palazzazz;
 Ch' al bsò ch' a reda, cm' a m' arcord al scurzi,
 A trovò un muntanar cún dòu furmèlli
 D' furmai in man, ch' eren famòusi e bèlli.

A i dmandò quant al vleva, e lú m'arspòus:
 Tant lir, tant sì bulgnein, e me i dess: Ahi!
 S' al val poc d'più la fòurma, it' merdakai?
 Me al tols in man nasandel' pinsiròus,
 Al gònz em'guardava, es bveva al so brod d'oca,
 E me stava lé frúgn fagand al moca.

E quand' a m' la vest bèlla, cmod a vleva,
 A in ruzzlò úna in sú e qu' altra in zò,
 Úna vers al Mlunzèll, e qu' altra andò
 Vers la Porta tant fort, ch'squas piú la n's'vdeva;
 Al muntanar cunfus curre drì a úna,
 E me drì a qu' altra, e po fé, adì furtouna.

Fasol cuntò, ch' la fiola d' un fundghir
 Ch' sta in Predalâ, s' avé da far la spòusa,
 Ch' al la tulé l' urtlan ch' stà alla Zertòusa,
 È ch' dapertútt a s' in feva un gran dir;
 Vermizèll saltand sú dsé ch' al n' è vèira,
 Ch' al la tol l' ost dèl Srai sta premavèira.

Cmod ch' al n' è vèira? dess Fasol allòura,
 S' a m' l' ha dett so fradèll, ch' fa al carzadòur.
 Vermizèll dess: me 'l sò ch' al n' è dòu òur,
 Ch' a m' l' ha dett al barbir ch' stà dall' Auròura.
 Una parola taccò l' altra, e i vegnen
 Al man iúst cm' è du gatt quand i s' sgranfegnen.

Fermav', Magnazinza! cridava fort,
 E Quartdagnèll vlé tgniri, e a n' i ariusseva;
 Squatanâ i strappazzava, e qué al chersseva
 Al pladur, perchè nssùn vleva avèir tort,
 Fèirma, dai, ciappa, lassa, para, peia,
 Chi s' sgúmbia, chi s' arversa, e chi s' sgarmeia.

La Lucheinà a sintir st gran badalúcc,
 Ciappa al ragazz per man, es va in s' la porta
 Ciamand aiut, e a n' i era un razza storta,
 Ch' i dess mèint, ch' i parén tutt tant alúcc;
 In st mèinter sta canaia saltò fora
 Cún tanta furia, ch' l' av una gran pora.

I s' trénn ai sass, es cminzònn a sfrumblar
 D' qui grustein in zà e in là ch' m' è tant stiuptâ,
 E al zil sà quant in longa la sré andâ,
 S' qui dal manètt n' se vden qué arrivar,
 Ch' i dénn la fuga in fein fora dal casser,
 Ch' al pars iúst al falchètt ch' dess in-t-el passer.

La Luchaina inspuré mêzza in dspraziòn,
 Perchè gustòur n' avén pagâ innanz d' andar vi,
 I era saltâ in pinsir d' vlèir corr'ri drì,
 S' al n' arrivava allòura al so patròn,
 Ch' era om d' st mònd, mo l' avé bona cunseinzia,
 E intèis al cas, al dess: a i vol pazeinzia.

In st mèinter Bertuldein vgneva in etâ
 D' savèir pr al so adruvar quas al fatt so,
 Ch' sèinza fadiga nssúna l' imparò
 D' cumprar dl' oli, del zris e dl' insalâ;
 E lì al tirava sú goff sé, ma scaler,
 Cmod a sintrì no zà in st cant qué, ma in st alter.

FEIN DEL PREM CANT.

CANT SECÒND.

Pur trop l'è vèira, ch' quand nass un puvrètt,
 Al nass un asn alla Comunitá,
 E perch' a n' campa a st mònd aqusé dsgraziá,
 Al bsgnaré mnari in co cún un stanghètt;
 Perchè s' al viv, nssún mal piú i bisògna,
 E a i còrr dri tútt el mòsc cm' è a una carògna.

Spèss capitava un orb pr al magazein,
 Ch' avé prèis amizezia dla Lucheina,
 E in quèll mèinter ch' al dsnava una matteina,
 Al mustrò d' avèir geni a Bertuldein,
 Es i dmandò s' l' a i l' avess mai vlú dar,
 Ch' al n' avé iúst bisògn per fars' mnar.

E li che n' vdeva l' òura d' liberars'
 D' quì intrig, cún grazia la s' i mess a dir:
 Quand al si bòn e ch' al v' possa servir,
 A v' al darò, ch' mei d' vù n' psseva truars',
 Ch' si om da bèin, ch' al pssrì tirar innanz,
 Cún insgnari al bèin vivr, e 'l bon' creanz.

T. VII.

L'orb che n' fú mútt, nè sòurd, azzò al parté
 Cùn mell palazz prumess d' trattarel bèin,
 Po dess: oss Bertuldein sú pur andèin,
 Ch' a st mònd a n' i è om furtunâ piú d' té;
 E lú guardand so mader vlé smergular,
 Es s' arcmandava ch' a n' i aré vlú andar.

Al la ciappò per la stanèlla strecca,
 Es s' i arpiattò bèin prèst sòtta al grimbal;
 A qula puvrèta i in saveva d' mal,
 Es al basava anc dov l' avé la crecca;
 Ma chi n' arisga n' ròusga al mi cor bèll,
 La i dess: bsò far o merda, o granadèll.

Va pur mi fiol, e arcordet' dla Lucheina,
 E d' to pader ch' era om d' garb, d' impurtanza,
 Ch' mors in guèrra al servezi dèl Rè d' Franza,
 Sebbèin ch' l' era nassú d' zèint cuntadeina;
 Av giudezi, stà svelt, alligr', e intòn,
 E al zil t' daga per me la so bendziòn.

Allòura Bertuldein tútt dscunsulâ
 Cminzò dinanz all' orb a caminar,
 E lú i insguava cmod l' avé da far,
 Per mparel' sèimper per la bona strâ;
 E a forza d' qualc scabúff, l' imparò prèst
 D' mnarsel' dri dapertútt, e d' èsser lêst.

Dòp qualc dé ch' i andònn dri zirand Bulògna,
 E ch' al guadagn dla hirba i paré poc:
 Oh Bertuldein, dess l' orb, a dèin all' i oc,
 Ch' a n' truvèin qué per nú quell che z' bisògna,
 A n' voi ch' a stàn piú qué a sbactar la louns,
 Ch' muda paièis, sol anc mudar furtouna.

E qué al s'arsols d' partir al dé ch'arvneva,
 Es volss ch' l' andass so madr a salutar;
 Ma al là zeroò, es en' la pssé truar,
 Ch' l' era andâ d' fora, sebbèin ch' al piuveva,
 E al turnò all' orb cún qula sudisfaziòn
 Ch' da i sberr a qui puvrett ch' ein mnâ persòn.

La mattena i s' livònn ch' l' era dòds òur,
 E s' prinzipiònn a caminar d' bòn pass,
 Is'fermonnsòtt a un portg tant ch' dess zò un squass,
 Po andònn fora dla Porta d' strâ mazòur.
 E appèna passâ 'l casser, l' orb i insègna
 Du Liou ch' stan lé azacâ fatt d' masègna.

E a i dess: oh Bertuldein púnza l' urèccia
 A quèlla d' qu' animal, ch' t' sintrâ in quèll mèinter
 Un' armòur strampalâ ch' è fecc lé dèinter,
 Ch' per maravèia t' farà arstar d' cavèccia.
 Al ragazz còurs al bcòn, e a i l' apunzò,
 E l' orb cún un spintòn i al euzzunò.

L' armas imbazzurlé quèll pover gnagn,
 E 'l vècc' ridènd i dess: aqusé s' imparà
 A savèir al fatt so; l' è cossa ciara,
 Che chi è trop cherdinzòn, fa d' sti guadagn;
 E Bertuldein cún la tèsta arvinâ,
 Armas d' strazz lé cunfus piú che ubligâ.

Ma però sta burlèttà i fé dèl cas,
 Es cminzò barbuttlànd fra lú a pinsar
 Ch' al dseva al vèir, e ch' al bsgnava imparar,
 E qula botta in-t-la tèsta al persuas
 D' mod tal, ch' al pars ch' s' i avress un po la mèint
 Dop ch' l' av avú dall' orb quèll teintamèint.

Mèinter ch' i andavn innaaz, l'orb amurèvel
 Cminzò a smesdgars' cùn al so ragazzol,
 E a i cuntò tant luchein', fandoni, e fol,
 Ch' a i fé capir al mod d' n' ésser currèvel;
 Ma la fadiga po ch' al feva a insgnari,
 Al vleva ch' la servess pr al so salari.

E zertamèint lù psseva appruftars'
 Cùn st orb, ch'era al piú drett ch'andass pralmònd,
 Ch' aveva un intèllètt aqusé profònd,
 Ch' saveva cùn bèll mod tutt captivars',
 Quand' al cuntava cvèll, quèst era zerta,
 Ch' tutt staven pr ascoltarl' a bòcca avèrta.

Alter ch' n' era Scarneccia a i su bon dé,
 Quand l' únt pr el scuttadur, e 'l lattuari
 Ai cuntadein vlé vènder, ch' pr incantari,
 A i mustrava i braghir, po avé finé;
 E cm'a n' feva quattrein, ch' al s'instizzeva,
 Di villan becc e vi in ultim a i dseva.

St orb avé sèimpr una zert fazza alligra,
 Es parlava cùn vòus grossa e sonora,
 Al s' mustrava devot, ma tutt per d' fora,
 E la lèingua a sfrapplar en' n' era pigra;
 Al vsteva d' culòur scur, mudèst, cumpost,
 Es aveva amizezia cùn tutt quant i ost.

Qualc volta al feva i su rugulett in piazza,
 Es dspiusava pr i deint l' erba carleina,
 Al s' vantava d' savèir anc d' medseina,
 Es fé crèder ch' Galen' füss d' la so razza;
 E incantand qusé la zèint a forza d' ciacher,
 Al cavava i quattrein anc dai piú splacher.

Al dseva al donn ch'a i guariré al mal d'mader,
 Ch' l' avé un secret per farel' parturir;
 Ch' al savé s' quell ragazz ch' avé da vgnir,
 Srev masc' o femna, e s'al vgnaré zò d'squader.
 E quell ch' piú i feva guadagnar di pavel,
 L' era al dir ch' al cmandava infein al diavel.

E cún st crédit el fèmen matti andaven
 A pregarel' ch' a i fess' turnar al mròus
 Ch' era dsgustâ, ch' i era prumess per spòus,
 E qué i tston d'Ròma nuv spess spess vulaven;
 Ma pr en' smaccar sta so negròmanzi,
 Dai pais d' sùtt in sùtt l' andava vi.

Cún tütt però ch' al guadagnava tant,
 L' era d' so natural larg cm' è una pegna,
 E a Bertuldein feva spèss vgnir la tegna
 Pr al poc magnar, ch' al stava in pì pr incant;
 E la fam i aguzzò tant al zervèll,
 Ch' al dvintò a poc a poc un furbastrèll.

L' orb avé una ribòlza d' bòn curam,
 Assrà cún un lucchètt, e la so ciav
 Fatta in-t-la delma propri d' una nav,
 Antiga tant ch' la s' arcurdava Adam.
 Dèintr' a i purtava pan, carn, e furmai,
 Camis, brag, scarp, e scfon, zivòll, e ai.

L' era qusé accort quand al l'avreva e assrava,
 Ch' gnanc una brisla i srev andâ a da mal,
 L' armnava tütt el coss, d' maniera tal,
 Ch' l'inventari in-t-la mèint sèimper i arstava,
 Es en' suzdeva a lú, cmod fú in quell prâ,
 Ch' al lòuv magnava el piguer ch' ern armnâ.

La part ch' tuccava al pover Bertuldein,
 Era quisé miserabil, ch' in dú bcon
 Al s' sbrigava d' biassar, e in fugatton
 Bveva d' l' aqua del pòzz in cambi d' vein.
 Al prinzipiò a studiar mattenà e sira
 Per pssers' cavar la fam in qualc manira.

A i ariussé d' rubari un bagaròn
 D' in qui quattrein ch' la zèint trava per tèrra,
 E da mursgott l' arpiatta prèst, e 'l sèrra
 Fra mèzz a una dscusdura del zibòn,
 E po al fé barattar in quattrein mnud,
 E un zuglein prinzipiò ch' n' andava a vud.

Quand al turnava a coier dalla zèint,
 E ch' i era dà qualc bagaròn d' limosna,
 Al le feva sparir prèst cm' è una losna,
 E un quattrein dava all' orb ch' n' era cuntèint.
 E aqusé cún sta manira al fé dvintar
 I bagaron quattrein, sèinza bravar.

Al seguitò un pzulètt a far sta folà,
 E l' orb ògn poc i dseva: Bertuldein,
 Dòp ch' t' stà cún me, me n' búsc se n' di quattrein,
 In dov ch' i bagaron vulavn a viola;
 E in tant al furb cún sta so bèlla usanza,
 Al s' cavava vi el crèsp ch' l' avé in-t-la panza.

Quèsta andò bèin perch' al n' i vdeva el man,
 E a lú ai cherssé l' argoi pr un' altra volta;
 Ma s' al pizzòn al pullarol s' arvolta,
 La bessa anc sol mursgar al zarlatan.
 L' era ciar al pruverbi ch' dsé so mader,
 Ch' l' è trop cattiy rubar a cà di lader.

L'avé un'usanza al vécc' quand al magnava,
 Ch' al s' tuleva le apprèssa al fiase dèl vein,
 E d' avèirn' una gòzza Bertuldein
 A n' i era dúbbi, s' anc al i avanzava;
 E lú pèiusa, e lú arpèiusa, e po cunsidra,
 Per pssèirn'avèir un poc cùn quale sgualmidra.

Una cannúccia al s' atruvò d' arèlla,
 E quand i eren tútt du lé per magnar,
 Pian pian la mté in-t-al fiase, e po a succiar
 Durava tant, fein ch' al s' la vdeva bélla;
 Ma l'orb ch'era un bev'dour ch'n'andava in fal,
 S' accurzeva ch' al vein feva un gran cal.

Prêst prêst tols al cumpèins d' mudari lug,
 E tra 'l gamb al s' al mess per star piú san,
 In s' la bòcca dèl fiase tgneva uua man,
 Es tols l'aqua al ragazz d' far piú quell zug;
 Ma lú però che n' s' pers d' anem, strulgò
 Un alter mod d' turnar prêst in s' al so.

Quand l'om ch'è inclinâ al mal, cmèinza andar sú
 Per la scalazza dell'-i iniquità,
 A n' rêsta al prem pirol, nè a mèzza strâ,
 Ma a còst d' ròmpers' al coll a n' s' fèirma piú;
 Sòul quell che n' cmèinza mai s' trova cuntèint,
 Perchè sèimper dri al mal i è al pentimèint.

Al ragazz s' inzgnò tant, ch' al sav trovar
 Un truvlein da un sò amig e un poc d' zira,
 E quand al s' la vest bélla qusé una sira,
 Un bus in mêzz al fiase i ariussé d' far,
 E po cùn qula po d' zira a i fé un stupai,
 Pinsand d' fari star l'orb ch' n' era un sunai.

Quand era òura d' magnar Bertuldein desva :
 A i ho pur al gran frèdd, d' grazia patròn,
 Lassám' vgnir lé tra 'l gamb per cumpassiòn;
 E lú tra l'gamb pr en'spèndr in fug, s'al mtteva;
 Al ragazz ch' i vdé lúm, al tèmp ciappava,
 E cún destrèzza pian pian, al fiasc tettava.

L'orb ch' in-t-al bèver n' i truvava i cont,
 E ch' sinteva ch' al fiasc sèimpr era alzir,
 Al l' attastò qusé attèiut, e in tant manir,
 Ch' in fein l'atruvò al bus, e s'andò al pùnt;
 Ma 'l mustrò de n' s' n' accorzer nieint affatt,
 Perch' al puntghein turnass in bòcca al gatt.


La mattena seguèint sèinza pladur
 Al gaien dl' orb dsinvolt che n' paré lú,
 S'mess Bertuldein tra 'l gamb ch' guardava in sú,
 Per torr al tèmp da far al surbidur;
 Ma l' vècc l' urèccia tgneva a la campana,
 Aspttand ch' la vòulp andass alla so tana.

Al ragazz trop ingòurd d' bèver dèl vein,
 S'azacca es dstopa, e al s' cmèinza a deliziar,
 E lú pr un bòn pzulètt al lassa far,
 E po al fiasc ciappa, ch' n' era mo gnanc pznein,
 Alzandl' in aier cún manira lèsta,
 E da urbazz un gran còulp i dà in s' la tèsta.

Al puvrein cascò lé mèzz tramurté,
 Cún al mustazz dai sgduzz tútt arvinâ,
 La tèsta ròtta, e tútt' insanguinâ,
 E in-t-una botta sòul i armas piú fré;
 Ma l' orb che n' vdeva sta famòusa arveina,
 Dal gúst d' un sé bèll còulp feva zriseina.

Al i aiutò, ma d' redr a n' s' psseva tgnir,
E quel piag a i lavò cún dl' alter vein,
Digand: cossa t' in par mo Bertuldein;
Al vein t' ha fré, e al vein t' ha da guarir;
E al ragazz dalla strètta in-t-una braga,
Truvò ch' i era scappâ fatt la teriaga.

FEIN DEL SECÒND CANT.



CANT TERZ.

Arg ch'aveva zèint ucc' (cònta l'Istoria)
 N' fú bòn d' far la guardia a la so vacca,
 E qust orb sèinz' ucc' ch' n' i vèd una patacca,
 D' n' èsser mai stâ ingannâ al s' vanta, e s' gloria,
 E d' star a cà e buttèiga al n' i rincrèss,
 Perch' al sà che chi dorm en' peia pèss.

A poc a poc s' armttéva Bertuldein,
 D' la tantanâ arcurdèvla ch' l' avé avú,
 Ma l' era dèbel mort ch' a n' psseva piú,
 Cún al mustazz ch' paré quèll d' Arlichein;
 Al s' tirava dri 'l gamb a far du pass,
 Cmod s' al fúss stâ un cadaver ch' caminass.

A n' psseva piú la nòtt durmir squas gòzza,
 Dai lunari ch' i vgneven per la gnúcca;
 Al s' distillava al zervèll ch' l' avé in-t-la zúcca,
 Per far una vendètta che n' fúss mòzza;
 E dòp ch' l' av bèin pinsâ, al turnò a pinsar
 Ch' al tèimp è galantom a chi 'l pò aspttar.

Ma Porb a dé per dé al trattava piz,
 E sèinza avèir rasòn al l'arfilava,
 El spunsunâ, e i pzigutt ch' al i affiubava,
 Al favn andar innanz vultâ d' schibiz,
 E tant ern el bergnoqu e i nezz ch' l'aveva,
 Ch' l'inguèint dèl spzial dèl gnec, gnanc al guareva.

Tùtt arrabbiâ al ragazz sgranava l' ai,
 E zà ch' a n' psseva in alter vendicars',
 In tùtt 'l bus, e 'l pòzz ch' psseven truvars',
 I guazzaven tùtt du, cm' è tant cavall;
 E chi avé i ucc', vluntira in perdeva ún,
 Perch' l'alter in perdess du, che n' n' avé nssún.

Ma 'l vècc' ch' era susptòus d' so natural,
 Cún al bastòn tastava da per tùtt,
 E em' al trovava ch' i era al sentir sùtt,
 E lú al tuccava sú bèin e no mal;
 Tant ch' sta vendètta a i cunvegn d' lassar star,
 Perch' a n' la pssé nè veinzer nè impattar.

E al fé cmod intravegn a quell puvrètt
 Ch' andò a cà per magnar, es n' era fatt,
 Ch' al s' mess a litigar fein cún al gatt,
 Es vleva far cún tùtt el sòu vendètt;
 L'era mantvan, e al s' ciamava *Rugier*
 Ch' tré vi 'l-i ov per far dspètt alla muier.

S' la forza mònta addoss a la rasòn
 Ch' s' lamèinta, è un can ch' abbaia vers la louna,
 El cart stan per pzurar cm' a n' s' ha furtouna,
 E i strazz van sèimpr all' aier; in cunclusiòn
 L'usarà sèimper cmod s' è usâ, e cmod s' usa,
 Ch' sòul chi è dsgraziâ, al locc porta alla ciusa.

A Genva l'orb aveva sintà dir
 Ch'a i era d'gran richèzz, bòn pan, bòn vein,
 E al dess ch'a i vleva andar cùn Bertuldein,
 Perchè là po i sreven stâ da cavalir,
 Ch'dov i è dla robba a s'búsca sèimper cvèll,
 Per quèl pruverbi ch'dis, c'ha zucc, fa stèll.

I s'messen a caminar per del muntagn,
 I cavalcaven zèd, saltaven fuss,
 I guazzòun di fiumett ch'eren stâ gruss,
 Es traversòn di camp e del cavdagn;
 E se bèin, ch'tutt al dé tant caminòn,
 A Scargalasen d'nott sòul i arrivòn.

E lé s'piantò al vanghètt a una casèta
 D'zert muntanar ch'feven la so pulèint,
 I magnòn es hvènn alligramèint,
 E a bsgoi durménn sòuvra a dla paia nètta;
 E la mattena innanz ch'i andassen vî,
 L'orb i ringraziò tútt per tant curtsi.

I passòn vsein a un lug, dov a s'vindmava,
 Ch'a i era d'quel ragazzi muntanari;
 L'orb s'i accustò, es cminzò a cantari
 D'quel quâtà curiòus, ma nssúna i abadava;
 E qula volta poc bèin andò i fatt su,
 Ch'al buscò in tútt per tútt sòul un grapp d'u.

Qusé mal cuntèint d'st regal s'mess a pinsar
 Al mod d'purarla, perchè la n's'amustass,
 Ma al n'al trovò zà mai, bèin ch'al strulgass,
 Es arsols lé in quèll púnt d'vlèirla magnar,
 I s'messn'a sedr all'ora d'una ròuvra,
 E l'orb cminzò sté dscòurs a fari sòuvra.

Bertuldein sèint, al dess: in cumpagni
 A voi sta volta ch' a magnamen st' u,
 Ch' a la partamen iústa fra nú du,
 E ch' andamen d' accord da bon fradi,
 Una grana ún dòp l' altr avèin da torr,
 Questi ein i patt, arcordet' bèin ch' a s' mor.

I cminzonn, e pr un poc enssún mancò,
 Ma l' orb dòu gran' insèm s' in mess a bccar,
 E 'l ragazz ch' vest aque sé, cminzò a spesgar,
 E trèi e quattr ogn volta a in trava zò:
 Ch' m' a s' ròmp i patt, e ch' s' è cgnussú l' ingann,
 Allòura chi è minción, l' è po so dann.

E quand al fú finé d' far st bèll duètt,
 L' orb arstò aque sé cún la graspuia in man,
 Scussand la tèsta, al s' livò sú pian pian,
 Digand a Bertuldein cún un ghignètt:
 Te m' i há fatt star ch' a m' in sòn bèiu adâ,
 Trèi gran' t' n' há tolt ogn volta, e t' m' há ingannâ.

Al ragazz zà sicur ch' l' orb n' avé vest,
 Tgneva dur ch' al n' è vèira, e al sustintava,
 Es i dmandò d' in dov mai al cavava
 St suspètt qusé mal fundâ, busadr e trest.
 Lú i arspòus: t' n' há tolt trèi, e zert l' è aque sé,
 Perchè t' m' há vest toren dòu, e t' n' há zitté.

A sentir st acutèzza, Bertuldein
 Armas, e al s' mess allòura a cunsidrar
 Ch' al n' accadé pruvars' per fariel' star,
 Perchè l' era trop astut, accort, e fein;
 E l' aspttava bèin d' cor ch' vgness l' uccasiòn,
 Per pssèiri far quell ball ch' s' ciama al piantòn.

Chi vless cuntar d' sti astúzi e furbari
 Ch'suzzdeven squas ògn dé, a in sré del miara;
 Mo me che n' voi andar a la Lungara,
 A fazz per far piú prèst un' altra vi;
 E a Genva a una lucanda a m' fermarò,
 Dov l' orb cún Bertuldein un dé arrivò.

Qué una volta al bòn vècc' un pzzol d' sussezza
 I feva cuser sòuvra a quatter bras,
 Ch' mnava un udòur ch' i cunsulava al nas,
 Mo alla bòcca e al palat la feva stezza,
 Perch' al savé ch' a n' i in tuccava brisa,
 Ch' l'era trop al gran lòuv quèll so amig zrisa.

Quand la fú mèzza cotta al s' la fé dar,
 E fra dòu mulèin' d' pan tant la striccò
 Ch' tutt al grass ch' i era dèinter l' i cavò,
 E po d' nov in-t-al spdètt la fé turnar;
 E al ragazz ch' i abadava ch' la n' s' brusass,
 S' sinté mancar sòuvra al fúm d' quèll grass.

Intant cún un gran gúst l' orb sganapava,
 E Bertuldein stava lé a bòcca sùtta,
 Al cherdeva d' murir aqusé alla mútta,
 E in s' qula sussezza a i feva sù la bava;
 Al s' vlé azardar a toren, e po avé pora.
 Cm'è i pondg di spzial, l'alcava al vas per d' fora.

L' orb ch' avé una gran sèid, dé di quattrein
 Al ragazz, es i urdnò ch' l' andass currènd
 Alla prema ustari ch' fúss lé in quell band,
 A cumprari da bèver un bucal d' vein.
 Fa prèst a i dess: e lú da bòn mustazz
 Tols al tèimp d' minciunar prema al luvazz.

A i dé in-t-l'occ' pr azzidèint un pzzol d'radis
 Ch'al zil sà lú quant è ch'l'era in qula cà,
 E al l'insfilzò in-t-al spèid pulid cmod va,
 Turnandla a metter lé sòuvra quell znis,
 E po pian pian in púnta d'pê sta znì,
 Cún la sussezza in man al scappò vî.

E sebbèin ch'l'era quésé mézza scuttèinta
 Tra i deint e i laber quand la fú un po trida,
 Al fé d'nètt in-t-un soppi, es s'alcò 'l dida;
 E chi sguazza una volta, sèimpr en' stèinta.
 L'andava d'cor alligr e tútt cuntèint,
 Digand: chi scappa un púnt in scappa zèint.

Cún al vein tòurna a cà ch'al còrr es trotta,
 E al trova l'orb ch'fra mézz a dl'alter pan
 Striccava la radis fort cún el man,
 Cherdèndla la sussezza ch'l'avé cotta;
 Ma Bertuldein ch'vdè 'l núvl in mézz al srèin,
 Al s'truvava tra 'l fòurc e 'l pònt d'Rèin.

L'orb ingòurd dé un mursgott al ravanèll,
 E in-t-al sentir quell frèdd, s'tirò indri prèst,
 E maraviauds', al dess: mo cossa è quèst?
 Chi ha fatt sta barunata? Ah furfantèll!
 E al ragazz dess da franc: me n'sòn stâ zert,
 Un qualcdún srà vgnú in cà ch'l'úss era avert.

A n' pol èsser, dess l'orb, quèst è impussebil,
 Perch'al spèid sèimpr'ho tgnú qué tra sti greff,
 Per rubarmia s'al fúss anc vgnú sbergneff,
 Me l'aré zert sintú, e l'è infallebil;
 Mo d'in dov vein al mal quèst al sò zà,
 Perch'a n's'pò mai guardar dai lader d'cà.

Chi fa mal, mal aspètta, es en' i è rúsc;
 Ch' la fa sòtt' alla nèiv, un dé la s' dscruv;
 E questi d' st mònd en' n' ein pruverbi nuv,
 Ch' al s' accòppa in-t-i trav chi n' bada al búsc.
 Chi spera d' avèir bèin fagand dèl mal,
 Cún sta speranza va a mürir' al spdal.

Bertuldein se scusava, e po pianzeva,
 E al s' mess anc a zurar e a sperzurar;
 Ma l' orb per quèst en' s' lassò zà infnucciar,
 E per quant coss al s' dsess, lú n' i cherdeva.
 Qusé tútt all' impruvis al l' acciappò,
 E cún el man la bòcca a i spalancò.

E al so nasazz ch' l' avé long una spana,
 Sèimpr' inspurcá d' tabacc, puzzlèint, e ch' còula,
 I cazza dèintr infein al cann dla gòula,
 E po i strecca la panza, es i la dvana;
 Ma la sussezza ch' era poc luntan,
 Turnò tútta in-t-al grúgn a qu' orb tiran.

Ch' peind' rabia e d' stezza cminzò a dari addoss,
 (Sebbèin ch' al rubamèint i era stá rèis),
 E sgrafgnandi al mustazz, al l' avé prèis,
 Mnandi zò a ròtta d' coll per ròmpri el-i oss,
 S' la zèint ch' còurs all' armòur prèst n' arrivava,
 Al zil sa lú sta volta cmod l' andava.

Ch' i arrivònn iúst cm' è la timpèsta al zúcc,
 E cm' è 'l zinquantazeinqu in s' la primira,
 Perchè l' aveva addoss tant la gran ira,
 Ch' al l' aré staiuzzá cm' è i limon túcc;
 Ch' un orb púnt in-t-la gòula è un animal
 Piú arrabbé ch' en' n' è i can drì ai purc zignial.

Quel cheriatur i al strappòn vi dal man,
 E d' sta poca dscherziòn cridavn al vcciazz,
 Digand: che v' vegna un caucr in-t-al mustazz,
 Èl' quèst al mod per castigar un cstian?
 E lù eminzò a cuntari qusé bèll bèll
 La burla dl' u, dèl fiasc, dèl ravauèll.

A i fé cherpar squas tütt dal redr allòura,
 Tant cuntòl' cùn bèll mod tütt sti zangattel,
 E Bertuldein ch' aveva altr in-t-el scattel,
 Stava argutté sòtt al zèirc' d' una sgnòura
 Ch' era patròuna d' cà, e a forza d' squas,
 La vols ch' i fessen fra lòur du la pas.

E qu'istèss vein ch' per bèvr era cumprà,
 Servé a lavari el fré, 'l bott, e 'l percoss,
 Es i tiròn un pê ch' l' aveva smoss,
 Cùn dscherziòn, cùn amòur, cùn carità;
 E l' orb dseva ridènd: oh ch' bòn udòur!
 Qstú púzza d' oli cmod fà un brintadòur.

L' andò a far i fatt su tütta qula zèint,
 Part ridènd, e part moss a cumpassiòn,
 E 'l vècc' per mettrel' bèin in derisiòn
 I feva far un bèll ringraziamèint,
 Digand: ch' i cunpatessen sgnòuri al tedi;
 Iust cmod s' fa in púnt quand' è finé 'l cumedi.

Bertuldein ch' era pest piú ch' n' è la caren
 Quand s' invstess i salam, o ch' s' fa 'l pulpètt,
 Pr el bott ch' l' aveva avú da qu' orb maldètt,
 Ch' a dmandari pietá l' è un battindaren;
 Dai sgrafgnutt al mustazz i era dviutá
 Ch' al pareva un arvers d' robba arcamá.

E quisé cúnz a i cunvneva a forza d'calz,
 Cún i su rezz, e cún el sòu bergnoquel,
 Servir d' divertimèint a Ptroni e a Proquel,
 Ma l' aspttava però la balla al sbalz;
 Ch' l' aveva sintú dir da ún ch' n' era matt,
 Ch' la vendètta d' zèint ann ha i deint d' latt.

L' andava in tútt i lug fantasticand
 Al mod e la manira ch' s' psseva tguir,
 Per far un scherz a st orb, ch' i fess finir
 D' andarel' dapertútt quisé minciunand;
 L' asptava al còulp, es stava lé ragn ragn,
 'Tant ch' a i cascò al furmai in s' el lasagn.

E un dé ch' i ern alla birba, a s' mess a piover,
 Ch' l' aqua pareva tratta zò a palâ.
 Sòtt' a un portg a i cunvegn d' star sequestrâ
 Fein squas a sira, sèinza mai pssèirs' mover;
 L' orb dess a Bertuldein: cmod s' ha da far
 Pr andar a cà, s' el strâ còrren cm' è un mar.

E lú allòura che n' fú brisa smarré,
 I dess: me v' cundurò dov l' è piú strètta,
 Perch' a pssadi in-t-un salt passarla nètta,
 E a qusé una volta nú andarèin vi d' qué;
 E al zercò bèin d' tirarl' a la taiola
 Per minciunarel' sòtt' alla parola.

L' orb pinsò un pèzz, po dess: a i vrâ pazeinzia,
 Insègnem' pur dov è manc larg al foss,
 Ch' a m' inzgnarò d' saltar al mei ch' a poss;
 Ma arcordet' d' mettr in ovra la cunseinzia.
 E al ragazz dsé fra lú, ch' n' era piú un gnoc,
 Sta volta i payer mèinen a bèvr el-i oc.

E in drett a un gross pilastr al fé fermar,
 Es dess: quèst ch'è quisé que è'l lug piú strètt,
 Me andarò innanz, e vù cùn un saltètt
 Sèinza bagnarv' a pssri per dlà passar.
 Cònt'r'al so solit, l'orb cherdé al sòu zanz,
 E cm'è un brecc stava al moss per trar un slanz.

Bertuldein passò l' aqua, es s' adduppò
 Per de dri dalla clòuna, es al ciamava
 Cùn diri: saltâ fort. L'orb ch' s' amanvava,
 S' tirò in dri, prèis la scòursa, e po saltò;
 D' posta al dé in-t-al pilaster cùn la têsta,
 E tútt infrant al casca, e dstèis lé rêsta.

Al bardassola i dess, cuntèint dèl cas:
 Dla sussezza l' udòur t' savess sentir,
 E t' n' hà savú dla clòuna al túff capir?
 Impara un' altra volta a tirar d' nas.
 Dla zèint, ch'vegn pr aiutarel', s'cminzò ardur,
 Lú s' la fé a gamb, es lassò l'orb lé al bur.

D'quèll po ch'intravgness dl'orb, enssún alsà,
 Perchè l' instoria n' dis alter; d' Bertuldein
 Adèss adèss asptâ d' grazia un brislein,
 Ch'in st alter cant cvèll alter d'lú v' s' dirà.
 Me intant m' arpussarò perchè a sòn stracc.
 A m' soppi al nas, es toi un po d' tabacc.

FEIN DÈL TERZ CANT.

CANT QUART

Fidars' è bèin, ma s' fidar brisa è mei,
 E al tòurna al cònt avèir l'occ' al fatt so;
 Stimar tùtt l'è bèz fatt sèimper, cm'a s'po,
 Perch'anc el pùb, e 'l mòsc han al so bsei.
 In pòlver scriv chi uffènd, dis al bulgnèis,
 Es sol sculpi in marmer quèll ch'è uffèis.

Dòp aveir Bertuldein fatt sta vendètta,
 L'aveva pora d' n' èsser castigà,
 E al s' tol al palì fora dla zittà.
 Sèinza pinsar mai piú a qu' orb dèl brètta.
 Vers Pontrèmel al s' mess a caminar,
 E a tùtt el cà s' andava a far strulgar.

Appèna in quèll paièis l' era arrivá,
 Ch' l' intuppò in-t-ún ch' pareva un suldá d' Prússia,
 E al l' aburdò per dmandari la trússia,
 E qstú in-t-al grúgn i pianta una filá,
 Cún diri: pézz d' birbant, dsgraziá, zaltròn,
 Demm', chi t' ha insgná sta vela da pultròn?

Bertuldein che n' savé cossa s' arspònder,
 Feva la gatta moia, e quèll i dmanda
 Dònd al vein, dov al va, e da quâ banda
 Lyol' andar, es al cminzò a cunfònder,
 Perchè l'aveva dari arsposta, e a n' trovò vers,
 Perchè om s' sol dir: om assaltâ mèzz pers.

Quèll p... dess cùn el bon' ch' l'era un sinsal
 Ch' trovava iazzi a tutt el mercanzi,
 Ch' a gli aré da un patròn a mod, e vi,
 E ch' s' l'aveva vlù star sig a n' sré stâ mal,
 Ch' l'era om s' sol, sèinza donn, e sèinza brig,
 E ch' in cà so l'era bandé 'l fadig.

Bertuldein ch' sinv, iúst quèll ch' i piaseva,
 La cucagna i paré d' veir cattâ,
 E sùbit al dess d' sé ch' a i srev andâ,
 E ch' per servirel' al faré quèll ch' al psseva;
 Pinsand' al gonz che qustù kss al so cas,
 Al saltó dla padèlla in mèzz a bras.

Quèst era un imbruion ch' al so veir mstir
 Era d' far tutt al dé di zug d' tèsta.
 Al mteva a quèst e a quèll cm' al psé la vèsta,
 E guai a chi s' fidava del so dir;
 In sòmma l' era ún d' qui dla vèira razza,
 Ch' meritarén d' far un brútt salt in piazza.

La so avarezia n' s' pò significar,
 Basta savèir ch' l' urbazz aqusé tirá,
 Era Alessander d' generositâ
 Apprèss' a qustú; al rèst s' po imazinar.
 Al studiava la lèisna, e per far cvèll,
 Un pdocc' l' aré scurtgâ pr avèir la pell.

L'aveva in cà una cassarazza antiga,
 Ch' al i avé sù una bona ciavadura,
 La ciav al la tgné attacc alla zintura,
 Che n'vgné mai alla lus, sen' cún fadiga,
 Dèintr a i mitté al pan, al vein, e al cumpanadg,
 E fein per d' fora la savé d' rumadg.

La dspèinsa d' Bertuldein era un stanziol,
 Dov attaccâ al tassèll pr al so bisògn,
 Sèimpr a i era zivòll, ai, e scalògn
 In libertà da pssèiren torr cm' a in vol,
 La so bòtt era d' preda, e la canèlla
 Era d' corda passâ pr una zirèlla.

Al so pan era sèimper da curròtt,
 E al s' sré pssú trar zèint volt fort in-t-al mur,
 Ch' a n' s' in sré spzzâ un bccunzein, tant erel dur,
 E una manara cert en' l' aré ròtt,
 Al straccava el ganass a vlèir biassarel',
 E, cmod s' fà el pellol, bsgnava stragualzarel'.

La canteina, e' l granar eren tútt ún,
 Ch' a n' i era un stècc in cà da pssèir brusar;
 A létta innanz ch' vgness sira bsgnava andar,
 Per n' impiar lúm, e perchè s' i andava a dzún;
 La biancarì n' s' frustava in-t-la bugâ,
 Ch' ogn mèis in-t-l' aqua sòul l' era lavâ.

E aqusé s' viveva cún sta parsimonia,
 E a n' i era dúbbi mai a far di dsurden,
 Perchè st patròn vol ch s'tegna tútt sti urden,
 Altrimèint al va in stezza, es s' indemonia,
 Ògn cossa al fa cún pèis, misura, e meta,
 Tant quant al fúss l' astant sòuyra la dieta.

Anca lù stava alzir, pur pur qualc dmènga,
 Cùn una tèsta d' pigura al feva nozz,
 Ch' al magnava al zervèll, e' l garganozz,
 Cùn qula po d' caren, ch' i è, ch' appèna s' sènga;
 E a Bertuldein a i dava un grustein d' pan
 Cùn quell'-i oss avanzà, ch' srén stâ pr i can.

E al dsé st atanaia, quand al i el dava:
 Tù pur, impest', magna, sguazza, triònta,
 A sò me, ch' a t' vgnarà la panza tònfa:
 E un mònd paré, ch' a i dess, es i al bruntlava;
 Quand a s' pré dir, séinza dvintar busader,
 Ch' l' era al regal, ch' feva Berta a so Mader.

S' a n' i fúss la superbia, l' avarezia
 Sré li generalèssa d' tútt i pccâ;
 Basta savèir, ch' la tein fein incadnâ
 Tútt qui ch' ein bon, e ch' par ch' n' aven malezia,
 E ch' pèinsen d' campar i ann d' Matusalém,
 E i zèrchen d' asparmiar..... magari un rêm.

D'in quand, in quand a cà d' un qalc so amig,
 Cùn un fiascòn mandava Bertuldein,
 A dmandar per favòur du bicchir d' vein,
 Da far un bagn', o per qualc altr intrig.
 E l' asparniava d' andar alla bètla,
 Attaccand al hòtt d' i alter qula sanguèttla.

Cùn dú terz d' aqua st vein era mistiâ,
 E po allòura se bveva alligramèint,
 I staven sèimpr a sègn cùn la so mèint,
 E a n' i era dúbbi a far ix per la strâ.
 E qustú per cruver d' l' avarezia al dfètt,
 Al dsé, ch' l' è una spurchezia al bèver stiètt.

Mo la n' era po aqusé, s' l' andava a dsnar
 Fora d' cà una qualc volta da un qalcdún,
 Ch' una tavla al spazzava in quatter bcon,
 E al vein sugava, ch' al n' aveva par;
 L' arrivava per tutt sèinza creanza,
 E fein cún i ucc' magnava a crèppa panza.

Intant la fam, ch' aveva Bertuldein,
 Era fora d' misura, e per cavarla
 A n' i era mod, però bsguava passarla
 Cún dsinvoltura, e starn a vdèir al fein.
 E al dseva suspirand: d' quèst a m' cunsoul,
 Ch' dòp ch' è piuvú l' ha po da vgnir al Soul.

L' è un cattiv cunsulars' in mèzz al dsgrazi,
 E pur l' è nezessari, es cunvein d' farel';
 Quèll, che n' s' pò vèndr, al bsò savèir dunarel';
 Sperar sèimpr in-t-al zil, ch' lú dspèinsa et graziz;
 Altrimèint' a chi s' dspera, l' è zà ciara,
 Ch' prèst prèst a s' trà dri al mang alla manara.

Un dé quand l' Avaròn n' era piú in cà,
 Al passò per la strâ ún d' sti magnan,
 Ch' han tutt al capital in spalla, es van
 Zercand da lavurar aqusé in zà, e in là;
 E a i saltò all' impruvis un schiribezz,
 Quand' al sintè cridar: Conzalavezz.

Dèintr in cà al le ciamò tutt affannâ,
 Digandi, ch' per so dsgrazia l' avé pers
 La ciav d' qula cassarazza, e ch' a n' i è vers
 D' trovarla in-t-ensún lug, e ch' l' era dsprâ.
 Ch' l' avé pora, quand' vgneva a cà al patròn,
 Ch' al n' cminzass a sminciar al rê d' bastòn.

Al magnan, ch' un mazz d' ciav avé cún lù,
 A úna, a úna el prinzipiò a pruvar,
 E tant al mnò, ch' a i ariussé d' trovar
 Quèlla, ch' avreva iúst, ch' a n' s' pssé far d' piú;
 E al la tols Bertuldein, ch' fú molt cuntèint,
 Ch' i dé un furmai d' la cassa in pagamèint.

E po cún st' invenziòn, al cminzò al spass,
 Cún torr d' ògn cossa un poc, ma cún manira,
 E per qualc dé po al tegu la man piú alzira,
 Pr eu' plar la gazza tant po, ch' la cridass;
 Má la gòula, e 'l rubar ein dou passìon,
 Che n' tèmen nè la brèia, nè al cavzòn.

L' andò tant dri, ch' al s' n' accurzé al sinsal,
 Ch' fé mell lunari per truvari i cont;
 Al susptò perch' i pontg ein luv dri all' únt,
 Ch' i fússen lòur, ch' avessen fatt al mal.
 Al s' mett i bernardon, guardand la cassa,
 E a n' trova bus, nè fess, ch' un pòntg i passa.

L' era cunfus d' sta cossa, e a tútt i vsein,
 Al dmandò in prést del trappl, e di garbúi,
 Cargá cún del furmai, e di garúi,
 Pr acciappar sti animal, e dari ai mnein.
 Al buffava, e per cà a n' trovava lug,
 E al squizzava dai ucc' la rabbia, e al fug;

Nonostant Bertuldein seguitò innanz
 A livar d' cassa, e la robba rusgava,
 Cmod aré fatt i pontg, e sòul pinsava
 A impirs' la panza, es n' abadava al zanz;
 E per dar bèin culòur a sta so sfrappla,
 Al magnava anc tútt quell, ch' al mtté in-t-la trappla.

L'arrabbiâ, ch' la so robba vdé mancar,
 E ch' in-t-la trappla mai s' ciappava ngotta,
 Al turnava a guardar, e d' sòuvra, e d' sòtta,
 E al pé del mal a n' psseva mai trugar;
 Al maldeva quant pontg s' attrovu al mònd,
 Es biastmava l' infèrn, e quant i è in fònd.

Ògn poc, e ògn bris, ciamava i pisuneint,
 Per dmandari cumpèins, es s' i arcmaudava,
 E chi cùn una fola al cunsulava,
 E di altr i daven mell avvertimeint;
 Ma un so cumpar i dess: ch' avé nom 'Trèspel,
 Ch' la paia, e 'l tèmp sol madurar el Nèspel.

Parècc' Donn còursen fora in-t-un sgumbiott,
 A cuntar, ch' el-i avén vest una bessa,
 Ch' sòtt al so stiar un dé la s' era messa,
 E ch' per cà la se vdè tùtta la nott.
 Lù da franc cherdé súbit la panzana,
 E in tùtt i bus l' andò a zercar la tana.

Chi pèinsa a mal, pr al piú sèimpr i sol coier;
 Ma chi trop l' asutteia, la scavèzza;
 Ch' va pian, va san; ma chi fa fug in frèzza,
 La pgnatta fa cherpar, e a n' la fa boier.
 Ch' n' la misura, n' la dura in tùtt el coss,
 E alla galleina ingòurda a i crèppa al goss.

Tùtta la nott al stava vigilant,
 E ògn po d' armòur, ch' l' udess, súbit s' livava,
 E po cùn un bastòn di culp al muava
 Zò per la cassa, es feva dl' armòur tant,
 E al vgneva ai vsein, ch' per quèst en' pssén durmir,
 Dov s' cmèinza el sport, e ch' s' finess i panir.

Perch' al savè, ch' el bess van dri al calòur,
 Ch' a s' n' è truvâ in-t-i lêtt fein di ragazz,
 L' andava a bastunar anc al paiazz,
 Dov Bertuldein durmeva cùn savòur;
 E al se dsdava quasi fort inspavintâ,
 Ch' al se mltava a cridar, cm' un inspirtâ.

La ciav sùbit i vegn in fantasi,
 Per pora, ch' al Patròn n' i la truvass;
 E in quell mèinter, ch' al feva st gran fracass,
 A n' truvò pr allugarla mod, nè vi,
 E in bòcca al l' arpiatò, dov al la tgneva
 Tútta la nott, sebbèin anc ch' al durmeva.

Ma l' aveva quell vizi d' surnacciar,
 E una nott, ch' al durmeva a bòcca averta,
 La ciav vegn fora un poc; quell ch' stava all' erta,
 Sinté, ch' al fiâ la feva stuffilar;
 Al pinsò, ch' al fistiass aqusi al Bissòn,
 Es saltò zò dal lêtt cùn al bastòn.

Po cùn l' urèccia seguita quell sègn
 Pian pian al bur cùn al bastòn alzâ,
 E quand a i pars a tir d' èssri arrivâ,
 Al mnò zò un còulp, ch' al pars un Stèllalègn.
 E dop ch' l' av battú fug al turnò lé,
 Es vest, ch' n' era al Bissòn quell ch' era fré.

Caspita al dess: l' è alter, che al Bissòn!
 Oh puvrètt me: mo cossa ho-ia mai fatt?
 Er-ia imberiaq, o er-ia dvintâ matt?
 Quèsta srà la mi ultma dspiantaziòn!
 Cmod sràla mai? cuspètt, ch' a n' deg d' un lader,
 Quèst è alter, che dir bècc a so pader.

A Bertuldein i era tuccà qula clura,
 Ch'avé la tèsta sòuvra al pissadur,
 E ch'paré un porc scannà d'qui dèl pladur,
 Ch'l'era un spettaquel a vdèir qula cheriatura.
 Al sinsal incantâ n'savè piú ch's'dir,
 Ch'al paré un baccalar d'qui da barbir.

E mèinter ch'al le stava a cuntimplar,
 L'usserva, ch'dalla bòcca a i salta fora,
 Una ciav tùtta sangua, ch'leva pora,
 Ch'pareva, ch'alla so s'psess arvisar;
 Súbit la tol, e per la mèint i passa
 D'pruvar, s'la s'assess mai alla so cassa.

In fatti al la cunsidra, es la cunfrònta,
 Al la spazza, es la mett dèintr in-t-al bus,
 E sbèin ch'fra tutt sti coss l'era cunfus,
 Al prova, ch'l'è pr avrir badial, e prònta,
 E trovand dscvert l'ingann, al balla, es salta,
 Iúst cmod fa un cavriol fora dla malta.

E piú d'aqusé n'psè avèir sudisfaziòn,
 Perch'al trovò, a s'pò dir, tùtt in-t-un còulp,
 I pontg, e i luv, in cumpagni d'la vòulp,
 Es aveva ciappâ d'posta al Bissòn;
 Alligr al ciama i vsein, e a i cuntò al fatt,
 E tùtt insèm i risen, cm'è tant matt.

El donn, ch'd'so natural ein squas tùtt tènder,
 S'messn attòurn al ragazz, es al curònn
 Cún di ingueint, e di impiastr, es al fassònn,
 E lú cminzò quale poc a arvgnir, e a intender;
 Al s'maraviò in-t-al vdèir qula cunfusiòn,
 E a sentir sghergnazzar al so patròn.

L'aré pur vlù savèir, cmod l'era stâ,
 Mo a n's'attintava de dmandarl'a nssùn,
 Al sinteva, ch'tútt faven di cuncùn,
 Es en'psseva indagar la verità.
 Intant al stava a lètt guardand ai trav,
 E a n's'arcurdava al lavurir dla ciav.

Dòp qualc dè, ch'al cminzava un po a star bèin,
 Al so patròn al fé livar da lètt,
 E po pianèn cùn grazia, e cùn rispètt,
 L'accompagnò fein zò dal scal a trèin;
 E sèinza diri una parola storta,
 Pr un brazz al tols, e al mess fora dla porta.

E a i dess: a t'ho cgnussù, birbòn ladrazz,
 Vá fa i fatt tu, ch'a sper d'vdèir sèinza fall,
 Al boia fart' un minuè in s'el spatl,
 Es i assrò fort la porta in-t-al mustazz.
 E lù innucâ pr avèir dri 'l dsgrazi a bzéff,
 Armas quisì lé cùn al malann, e 'l béff.

Dop ch' l'av fatt quatter pass, al s' vultò indri,
 A guardar, s' al patròn per dsgrazia al ciama,
 E in-t-al vèder qula cà per lù qusé infama,
 Al s' mess cùn quant fiâ al psseva a còrrer vi.
 S'a vli savèir in dov l'andò a arrivar,
 In-t-al cant, ch' vein, al sintirì cuntar.

FEIN DEL QUART CANT.

CANT QUEINT.

Quand'ùn dis, dà a quèll can, tútt i ein adoss,
 Ch'a n'i è piú lug per lú da pssèir scappar;
 E quand la dsgrazia tol ún a sbactar,
 La i fa perder la pèll, la carn, el-i oss;
 E guai a quèll, ch'la i cmèinza a dari dri,
 Ch'l'al fa puzzar d'ògn cò, cm'è i sulfani.

Bertuldein qusé arvinâ, sèinza patròn,
 Piú intrigâ di pulsein, ch'van per la stòppa,
 Grattands'cún una man zò per la còppa,
 Al dseva da per lú la so rasòn,
 Es prinzipiò a pinsar, guardand in sù,
 Ch'bisogna far d'nezessità virtú.

Cún la so dsgrazia, al s'fé un bòn capital
 Pr andar in birba, sèinza avèir cavai.
 E per mustrar d'èsser pein d'piag, e d'guai,
 Al s'fassava anc in dòv al n'avé mal;
 El persònn, ch'al cherdevn un lazarètt,
 Chi i purzeva un quattrein, e chi un panètt.

Al s' mess andar pr al mònd a sta manira,
 E a spèis di altr al vest tèrr, castì e zittâ,
 E a tûtt el cà dmandand la carità,
 Al s' cavava la fam mattena e sira,
 E a forza d' laz, d' imbroi, d' pacciug e d' zanz,
 Da Genva l' andò a Napel cm' è d' sbalanz.

Al truvò in st zittadòn, pr un cas bisbêtic,
 La carastì, ch' n' i sol mai abitar,
 E 'l sòu ganass, ch' n' avèn da lavurar,
 Al favn essr zò d' strâ, e molt patêtic,
 E sebbèin, ch' l' era a Napl, al s' arcurdava,
 La torr di Asnì, la Mozza, e 'l portg dla biava.

L' incuntrò per so dsgrazia un parigein,
 Ch' avé la camisola arcamâ d' sneglia,
 E un bèll fiuchètt d' arzèint pein d' canuteglia
 In-t-al capèll, ch' paré propri un turtlein,
 El scarp l' avé affiubâ in-t-el-i úng di pi,
 Ch' a i saltava i garette fora per d' dri.

Dòu fiúbb d' pred a gli avè d' vari culur,
 Cún dedri la cumpagna in-t-al gulètt,
 L' aveva un giustacor, ch' i era tant strètt,
 Ch' l' andava a brazz avert drett drett, dur dur,
 E la zizzer l' avé què impastrucciâ,
 Ch' la paré propri un piatt d' gnuc cún l' aiâ.

A Bertuldein al s' mess a guardar dri,
 E a i dess: ragazz andarest' a servir?
 Lú arspòus: lustressem sé, quèst è 'l mi mstir,
 L' è quèll ch' a zèirc. Mo t' i iúst cascâ in pi,
 Dess qu' altr, a t' toi in st púnt al mi servezi,
 Pur ch' t' ay voia d' far bèin, e ch' t' ay iudezi.

Aquésé cún sti po d'ciacr a s'fé st cuntratt;
 A i dess: teinem' pur drì, e n' t' dubitar,
 E al s' mess cún dl' aria tanta a caminar
 Dòu òur d'cuntinov iúst emod faré un matt,
 Tant, ch' i arrivònn al fein, quand' era tard,
 In-t-un stradlètt armort pein d' quai lombard.

E qué i era al palazz dèl Cavalir,
 Ch' avé d' una casètta la fazzâ,
 Cún una porta vèccia tútta arpzâ,
 E un bachètt fú la ciav, ch' l' adruvò a avrir,
 L' intrada era una loza strètta, e scura,
 Tant úmda, ch' la paré una sepoltura.

E po intrònn in dòu stanzi, al prem pian d'sòtta,
 Acumdâ veramèint d' gúst soprafein,
 Ch's'a i passava un cavall, ch' fúss carg d'anzein,
 A n' i era dúbbi, ch' al s' tirass drì ngòtta.
 Ch' i mobl eren dòu scrann vècci d' pavira,
 E un paiazz dstèis in tèrra sèinza altira.

Al s' dspuiò tútt, e cún gran diligèinza
 Al s' fé aiutar a spazzar bèin i pagn,
 Es i pigò pulid; al dé al tèil d' ragn
 A un' assa, ch' i serveva per cherdèinza
 Murâ in-t-al mur', e lé a i pussò pian pian,
 Ch' quèst' era la so cassa, e al cantaran.

Al s' mess a sedr, e po l' interrogò
 D' zèint coss tútt in-t-un fiâ, e lú i arspòus
 Cún zèintúna busì, sèimper sòtt vous,
 E ògn parola al s' chinava fein là zò.
 Quèll sgnòur cún gran sussiegu al sté ascultar,
 Ma intant a n' se dsurreva mai d' magnar.

Sta cossa a Bertuldein i rincherseva,
 E 'l budèll anca l'our fén di lameint;
 A i dspiasé d' star in ozi cùn i deint,
 E al guardava per tútt, e mèzz dsprá al dseva:
 Cossa è quèst? in dov son-ia capitá?
 I è mai dúbbi, ch'la fúss la cà incantá?

Al nobil Om, ch' stava per cà spaszand,
 Andò a cavar fora d'in-t-al paiazz,
 Una paiugula, e cmod farè un sgnurazz,
 S'antava i deint alligramèint cantand;
 Taut quant l'avess magnâ starn e fasan,
 Sebbèin ch'in corp a n'i era intrâ un bcòn d'pan.

E po ridènd, al s'vòlta a Bertuldein,
 Es i dess: dem'? hât' dsnâ, o hât' fatt qulaziòn?
 Poss-ia arrabir, s'a i ho gnanc magnâ un bcòn,
 Lú i arspòus: sì maldètt s'a i ho un quattrein.
 Al patròn, ch'anca lú avé vud al quaier,
 Mòstra dspiasèir, es trà vi'l brag all'aier.

E a i cuntò, ch' l'avé bvú la cioccolata
 In-t-l'anticamra del Marchèis dla Ròtta,
 E ch' per quell dé lú n' magnava piú ngòtta,
 Ch' l'avé la cumplessiòn trop delicata.
 A m' dspias, a i dess, a vdèirt'a star quésé in pèna,
 Ma n't' dubitar, ch'al srà prèst òura d' zèna.

Quand al ragazz sinté sta pertantèigula,
 L' av a murir d' dulòur cgnussènd all'òura,
 Ch' la dsgrazia l'avé drì trop traditòura,
 E ch' per scapparla, a n' i è nè mod, né rèigula,
 Trì pizz d' pan, ch' i avanzòn quand al birbava,
 S' mess a magnar, mèinter ch' al suspirava.

L'affamâ Cavalir, ch'al vest biassar,
 S'i accustò cún manira, es i dmandò,
 Coss'al magnava d'bòn, e lú i mustro
 Quèll pan d'limosen, ch'l'avé pssú asparmiar.
 Al pêzz, ch'era piú gross i tols quèll Sgnòur,
 Es l'anasava, dsènd: oh, ch'bòn udòur!

Quèst è un pan molt preziòus, dov l'hât'avú?
 S'a cherdess, ch'al fúss nèt, al vré sintir;
 Ma al n'asptò, ch'Bertuldein i al pssess gnanc dir,
 Ch'al s'al mess a dvurar piú in frèzza d'lú.
 Al ragazz, che n'fú un'òlla, fé d'nèt prèst,
 Per pora, ch'al patròn n'i dess dèl rêst.

I parén du stianchein, ch'ptnassn al garzol,
 Quand i i tiren bèin dèinter zò alla dsprá,
 E intant iúst ch'a se spara un'arcbusâ,
 A s'finé al dsnar sèinza dspigar tvaio!
 I colsen fein el brisel sú pr i pagn,
 Es n'inspurcònn maiolica, nè stagn.

Per beber po i andònn all'ost dèl pòzz,
 Sèinza adruvar la tazza, o l'bicchir d'veider,
 A una mzèta sbuccâ, ch'servé d'calzèider,
 Ligâ pr al coll, perchè al mang era mòzz;
 E a sta manira s'finé la gran fèsta,
 Sèinza ch'al vein i ingarbuiass la tèsta.

Al sgener Cònt Castracúcc, ch'acusé s'ciamava
 St Zintilom dall'aptit, s'mustro cuntèint,
 D'avèir magnâ quèll pan quèll pr azzidèint,
 Ch'l'era di ann, ch'sèinza gúst (dess lú) al magnava;
 Cuntand, ch'un cug av a dir a zert dam:
 Ch'a n'i è al miòur cumpanadg, quant è la fam.

Fagand divers d'sti dscurs, l'arrivò sira,
 Ma la zèna n'se vdeva a cumparir;
 Bertuldein, ch'dalla fam s'sinteva svgnir,
 Cminzò a pinsar, ch'quèst'era una chimira;
 E al sgnèr Cònt arrufâ, cm'è una cò d'gherr,
 S'cgnussé, ch'l'arev magnâ al stiopp a un sberr.

Al i insgnò d'far al lètt, ch'era un gran sacc
 Pein d'stòppia, e souvra a i stava una stiaveina,
 Cùn la cverta zibâ d'indiana seina,
 Ch'a forza d'bus paré fatta a zec-zac.
 Po per cavzzal l'arversava una scranna,
 E quèsta dèl sgnèr Cònt era la nanna.

Dòp, ch'fú fatt sti zattein, qusé mèzz al bur,
 Per tgnir sù un po'l sòu cart, e'l so decor,
 Al dess al pagg': me t'mandarev a torr
 Da zèna in piazza, ma te n'sress sicur.
 Perch'la nòtt al cameina i sbursarù,
 Ch'assalten tùtt, es i toln i fraiù.

L'è mei, ch'andamn a lètt, e po dmatteina
 A s'farà pruvisiòn d'tùtt quèll, ch'z'bisògna,
 E Bertuldein s'grattava, es n'avé rògna,
 Ch'a i brusava al currott, ch'era in cuseina.
 I andònn a lètt ún da cò, e ún da pi,
 E i n'pssènn durmir dalla malincuni.

Ún d'pinzè la miseria una figura
 Sèinza pi, sèinza un brazz, cùn poca panza,
 Vsté culòur d'fam, in att d'poca creanza,
 Vergugnòusa in-t-al sgnèff, pzneina d'statura,
 In s'un pedstall, ch'aveva un cattiv sgavel,
 Fora dla porta arisg dla cà dèl Diavel.

Me a m'par l'artratt d'ste Sgnòur. Appèna dé
 Al s'livò cùn al stòmng digêst, e alzir,
 In s'al gùst d'quèll, ch'avé Masein Barbir,
 Ch'aré magnâ di cudn, e digeré.
 Al s'fé aiutar a vstirs'a Bertuldein,
 Ch'i arversò 'l brag, es n'i cascò un quattrein.

Dòp, ch'al s'fú pttnâ, e lavâ cùn diligèinza,
 Al dé ourdn al so pagg', ch'spazzass cmod vâ,
 Ch'al pruddess dl'aqua, e ch'l'abbadass a cà,
 Ch'a n'i intrass mai i pontg in-t-la cherdèinza.
 Bertuldein, ch'i guardava dri cunfus,
 Cgnussé, ch'a st mònd al n'è tútt or quèll ch'lus.

Al turnò in cà per far quèll, ch'l'avé dett,
 E al vlé spazzar, ma a n'pssé truvâr granâ,
 Al tols la mzètta, es audò per la strâ,
 Per zercar dl'aqua nètta a zert urtsett,
 Ch'eren dalla so casa pœc luntan,
 Dov prèst al fé amizezia cùu qui urtlan.

Al vest al so patròn cùn dòu sgnurein'
 Tútti insbeltâ, ch'el parén mascaron,
 Cùn scáffi, perucchein, e zert zercion,
 Ch'seven crèder, ch'el fússen dòu sgualdrein'
 Vgnú lé a posta a zercar un qualch minción,
 Ch'i pagass, cmod s'usava, la qulaziòn.

Al sgnor Cònt qué s'dsnumava a panza vuda,
 E lòur i favn attòuren mell carèzz,
 Pinsand po in fein d'cavar da sti finèzz
 Quèll, ch'el zercaven, e ch'lú aré fatt l'arzvuda;
 Ma quand el s'accurzénn, ch'l'era un dspiantâ,
 El scappònn vi, e lú aruas lè incantâ,

Al pagg', ch'rideva a vdèir al mróus estatic,
 Cascò dal gúst dèintr in-t-un fussedèll,
 Dov al trovò del mèil colt pr un purzèll,
 E al s'el parò, cún bona grazia, al natic.
 Al tols dl'aqua in-t-la mzètta, e a cà l'arriva,
 Digand pian pian: in fein ch' la va, l'è viva.

L'asptò al patròn un pèzz dòp al mèzz dé,
 Ma a n's'vest mai cumparir; lú dalla ghega,
 Truvands'in sta miseria cún sta bega,
 Piusò, ch's'l'andava in longa al sré sbasé.
 Per la zittà al turnò in birba a zirar,
 Ch'è un mstir quand al s'è cmèinz mai s'lassa star.

In poc òur al trovò per carità
 Dèl pan pr al so bisògn, e zert trippari
 A forza d'ciacr, a li arduisé a dunari
 Una zampa, e dla treppa d'qu'avanzâ,
 E al turnò a cà cún sta po d'pruvision,
 Ma prema d'lú i era arrivâ al patròn.

A tütta prema al vlé tirar da brúsc,
 Ma in-t-al sentir, ch'al fa l'udòur dla treppa,
 D'un alter sentimèint al par ch'al seppa,
 E a farsen prò al s'amanva, es n'i fa rúsc.
 Bertuldein per finir tütta l'instoria,
 Al s'mess sig a magnar, es fénn baldoria.

Per qualc tèimp i campòn a sta manira,
 Ch'al patròn vgnè mantgnú dal servitòur;
 Ma la dsgrazia turnò prèst cònta d'lòur,
 Tütta d'rabbia avampâ, e prègna d'ira;
 Ch'un band andò pr èsser la carasti,
 Ch'i birbant, e i uzius andassen vi.

Bertuldein, ch'in vèd quattr un dé per piazza
 Scubar dal boia, a i casca al cor per tèrra,
 E dèintr in cà per la gran pora al s'sèrra;
 Ch'a n' vol piú ussir taut hâl'avú scagazza.
 I turnòn a dzunar sèinza nssún merit,
 E in ozi tgnènn la bòcca, e anc al preterit.

Un dé quand Bertuldein manc s'al pinsava,
 Vest vgnir a cà al patròn in furia e in frèzza,
 Ch'ansand, n'pssè finir d' dir dall'allgrèzza,
 Ch'l'aveva trovâ un flepp, e po saltava,
 E al dsè: sta volta a guastarèin al dzùn,
 Ch'al zil en n'abbandòuna mai nssún.

Ún ch'avess trovâ un tsor en'sré sé alligher,
 Cmod'era st zintilom mort dalla sghessa:
 Cameina, al dess al pagg', all'ost dla Bessa,
 Va pruvèd da magnar, e n'èsser pigher;
 Bertuldein, ch'i pareva d'insuniars',
 Tols al flepp, es còurs vi sèinza fermars'.

Mèinter ch'al caminava per la strâ,
 L'incuntrò un mort, ch'i purtavn a supplir,
 Accumpagnâ da torz, e da candlir,
 In s'un tavlazz, es era vsté da frâ.
 Per dari lug, al s'affermò dri al mur,
 Es guardava a tûtt qu'òur, ch'eren vsté d'scur.

Per dedri al mort a i era una dunnòuna
 Cverta cún un vèil nèigr insen'ai pi,
 Cún zèint fèmen, ch'i seven cumpagni,
 E tûtt cumpassiunaven sta persòuna,
 Ch'sbattènd insèm el man fort la pianzeva,
 E la cridava cún quant fiâ l'aveva.

*Povero mio marito, bene mio,
A quella casa buia, e trista vai,
Dove, oh meschino, non si mangia mai,
E là dovrò lasciarti? ah caso rio!*
Quand Bertuldein av intèis sti parol,
Sèinza asptar alter ciacher, al s'tols el viol.

Al mess sù d'sòuvra al mort, e chi'l purtava,
E a cà d'carrira in-t-un mumèint vulò,
Po la porta dinanz bèin prèst l'assrò,
E'l patròn in so aiut fort al ciamava,
Ch'tùtt sbigutté, n'savènd cossa s'pinsar,
Còurs cùn la spada, mo a n'la pssé sfudrar.

A i dmandò, perch'al feva tùtt st armòur,
E lù i arspòus: sgnèr Cònt i porten qué
Adèss adèss un mort, ch'a l'ho vest mé,
Ch'l'è per la strâ, es vein cùn grand unòur.
E al Cònt turnò a dmandari: cmod sât'quèst?
Me crèd, ch't'l'av vest, mo chi t'ha dett al rèst?

So muier, ch'i tein dri, i arspòus al pagg':
Dis, ch'i al porten alla casa bura e tresta.
Piú dsgraziâ, e bura d'quèsta me n'l'ho vesta,
Dòncia qué al vein sèinz'alter; fèins curagg'...
Al Cònt, ch'i sinté dir sta gran mattata,
Bèin ch'l'era a dzún, al fé la so risata.

Ma Bertuldein n'arstava persuas,
Per quant i savess dir al so patròn,
E al stava sèimper fess in-t-l'upiniòn,
Ch'al mort vgness lé, es en'se pssé dar pas;
Al Cònt tant dess, ch'in ultim a i al fé intènder,
E un'altra volta al mandò d'noy a spènder.

Quand al turnò, i s'messen a diluviar,
 E per du o tri dé i la passònn molt bèin;
 Ma poc durò al bòn tèmp, e poc al srèin,
 E al s'mess per l'our, no a piover, ma a timpstar;
 Ch' una vèccia arruganta, e un umarètt
 Vegnen per la pison dla cà, e dèl lètt.

Al Cònt fé sig i cont d' tútta la sòmna,
 Ch' era piú che n' valeva al capital,
 E a i dess ch' a i pagaré, ch' dèl banc real
 Al stava aspittand el-i armess ch' i vgnén da Ròma.
 Ma al s'intindé li armess dov sta el carrozz,
 Perchè a st mònd lú n'avé quell ch' val un sgdozz.

I creditur cminzònn a far dèl fiacc;
 Che n'vlénn savèir nè d' banc, o sì d' banchètta;
 Ma i s' i astricavn adoss qusé alla maldètta,
 Ch' l' era per nassr al Cavalir un smacc;
 Al qual per fari aqudar cún bona zira,
 I dess: turnâ ch' a srì pagâ innanz sira.

Cún gran fadiga alfein, i andònn pur vî,
 Es lassònn al sgner Cònt molt intrigâ,
 Che n' savé al mod d' sugar sta gran bugâ.
 L' andava fora, e po turnava indri.
 E pinsand, al dess qusé d' in sùtt in sùtt,
 Un om sèinza quattrein, mo l' è pur brútt.

L' ussé d' cà suspirand, e Bertuldein
 Armas lé da per lú guardand al prúgn,
 Ch' dalla dsprazion al s' sré fein dâ di púgn,
 Cguussènd ch' sta qutà psseva avèir poc bòn fein;
 Intant la vèccia, e l' umarètt turnònn,
 Ch' i vléu vèdr al sgner Cònt, ma i n'al trovònn.

Lòur pinsand d'far un còulp, ma ch'fúss da mêster,
 Ciamònn inanz i sberr cún un Nudar,
 Per fari tútt i mobil inventariar,
 Ma a n'i era pr impicars' gnanc un cavèster,
 I cherdénn, ch' al i avess fatt purtar vi,
 E i cridaven fra d' lòur battènd i pì.

D' ògn cossa quell ragazz srà cunsapèvel
 I dessn: e un sberr i mess el man adoss,
 Ch' al vlè ligar cún un sfurzein bèin gross,
 E in tútt i mod i al pretendèn culpèvel,
 Lú mèzz pers, pr al spavèint d'n'andar persòn,
 Terman d a i vegn un gran ciarabacciòn.

Qstòur ern a mal parté, vdènd qusé st ragazz,
 Es en' savèn al mod per farl' arvgnir,
 Un po d' asè dmandònn in-t-un bicchir,
 Al vseini, ch' còursen tútt mess in savazz,
 Es i sbruffònn i pons, e sòtt' al nas
 I dénn dél balsem, ch' era al fòud dél vas.

Tant, ch' l'arvegn un puctein dall'azzidèint,
 E tútt quell donn i cminzònn a fari anem,
 Ma sèimper piú, lú ch' era pusilanem,
 S'imbruiava in-t-al vdèir qula sorta d'zèint.
 Al Nudar, ch' stava a scrivr in s' una fnèstra,
 Era stúff, es en' vleva piú d' qula mnèstra.

I cminzònn a dmandar po cún amòur,
 S' al so Patròn avé purtà vi i mobil,
 E in dov l'aveva mess quell coss piú nobil,
 E l'altra robba, ch' era in cà d' valòur;
 Lú arspòus, ch' dòp ch' al stà sig al n'avè vest
 Alter che 'l lét, e quel dòu scrann qusé trest.

I creditur, e i sberr s' guardavu insèm,
 E 'l nudar seguitava, es i dmandò:
 S'al savé ch'l'avess stabil o lug ch'fúss so,
 Lú arspòus ch'a li avé dett, ch'in-t-el Marèm
 L'aveva un bèll palazz grand purassâ,
 Ma ch'al n'era però gnanc fabricâ.

Ch'l'avé un Castèll, ch's'ciamava Castracúcc,
 Dov al i aveva pr una cossa rara,
 Appuntalâ d'ogn banda una Clumbara
 Peina d'zvét, d'palpastrì, d'falchett e d'alúcc.
 Al nudar dess ridènd ai creditur:
 Cm'a n'avessi alter moel, andâ a cà al bur.

I vegnen al sgaraboi pr al pagamèint,
 Ch'la véccia, e l'umarètt n'i vols dar ngòtta,
 E i sberr cridand biastmaven zò alla ròtta,
 E'l nudar anca lú n'era cuntèint.
 A i cunvegn sgar al prâ sèinza guadagn,
 Maldènd quell púnt, ch'i seven d'sti castagn.

La véccia fé purtar vi al so paiazz,
 E l'umarètt assrò la so casètta,
 Bertuldein armas lé una bèlla fètta
 Dòu dida fora d'cà cún i su strazz;
 E a n'saveva cmod s'far in qu'uccasiòn,
 Truvands' sèinza quattrein sèinza patròn.

Al s'afflez, al suspira, al pianz, al crida,
 Al guarda al zil, al guarda in tutt el band,
 A n'pò andar alla birba, ch'a i è al band,
 Al stà suspèis, e d'rabbia al s'morsga el dida.
 Intant ch'al pèinsa, cossa l'ha da far,
 A m'arpos, perchè a m'vein da stranudar.

FEIN DEL QUEINT CANT.

CANT SÈST.

Chi n' pò' battè al cavall, batt la sèlla,
 E al tòcca pr al piú ai dscalz andar pr i spein:
 In-t-l'aqua al pèss piú gross magna al piú pznein,
 E al crida dri 'l lavèzz alla padèlla:
 La furtouna fa in alt, e abbass andar:
 Cm' i bu n' han sèid, a s' ha l' asi d' stuflar.

Sèinza fall Bertuldein sré andâ a da mal,
 S' del donn, ch' staven lé vsein, en' l' arcuieven,
 Ch' sintènd tût el sòu dsgrazi, al cumpateven,
 E dòp quarèisma el i fénn far carnval,
 El-i al guernònn tût a gara, d' tal mauira,
 Ch' per tgnir sú 'l brag a i vleva la crusira.

El s' inzgnònn d' atruvari un bòn patròn,
 Ch' era un Duttòur d' medseina accreditâ,
 Ch' i dess, ch' l' aré mantgnú bèin vstè, e calzâ,
 E ch' per salari ogn mèis, i aré dâ un tston.
 Quèst era om vècc', ch' avé bona presèinza,
 E ogn parola al spudava una sentèinza.

Dapertútt Bertuldein era cún lú,
 E al sinteva, che st mèdg aqusé famòus,
 Per tútt i mal, s' al fúss anc stá franzòus,
 L' urdnava dl' aqua frèscà, e nieint d' piú.
 Ùn a in guareva, e zèint avén la sort
 D' pagar al so tribut al bèccamort.

Fra i alter su amalâ, al n' aveva ún,
 Ch' feva la purga, es vlé nttar al ciavgott,
 E un alter, che s' sinté debel la nott,
 A i vlé un cunfurtativ da torr a dzún;
 A i mandò a cà el-i arzètt per Bertuldein,
 E al i arcmandò, ch' a n' barattass bultein.

Per tgnirs' a mèint qustú in tols úna per man,
 Es andò vi pinsand pr en' s' aradgar;
 Ma quand al fú dov a li avé da dar,
 L' ingarbuìò 'l scrittur, e da baban
 Al dé a quèll debel d' corp' al sulutiv,
 E a qu' altr a gli affiubò al cunfurtativ.

Al suzzèss, che quèll ch' av st ultem sirop,
 Tútta la nott n' pssé durmir squas brisa,
 Dal gran calòur al s' cava la camisa,
 E a n' trova lug, ch' al se smaniava trop;
 Al s' arcmandava al zil a piú non poss,
 Ch' al cherdeva d' avèir al diavl adoss.

Dall'altra part, quèll sgnòur ch' vleva aiutars',
 E ch' s' n' era andâ cún la so spòusa a lét,
 Bisugnò ch' al s' livass del volt piú d' sètt,
 E la sgnureina che n' savé cmod fars',
 La gran púzza e 'l fetòur la persuas,
 N' pssènd far alter a tgnirs' bèin stop al nas.

Me n'sò dir chi d'lour du fúss piú instizzé,
 Per st azzidèint ch'era vgnú aqusé impruvis,
 E ch'punzess l'alba a n'i era mai d'avis,
 E appèna appèna al sòul av purtâ al dé,
 Ch'i mandònn cùn gran frèzza un servitour
 A ciamar fein a casa al sgnèr Duttour.

Al qual n's'dé gnanc tèimp d'vstirs'a rasòn,
 Ch'al còurs cùn una scarpa, e una pianèlla,
 E 'l calzètt zò pr el gamb a campanèlla,
 Sèinza cular, e sèinza al piruccòn;
 E qusé in frèzza currend al dé un sblisgott,
 Ch'fú causa ch'alla lèingua al s'dé un mursgott.

Quand l'arrivò dov era al tribulâ,
 E ch'a i cuntò tutt quèll ch'era suzzêss,
 D'una parola lú i cavò un pruzêss,
 Es agnussé cmod l'erròur era stâ;
 Al pinsò un poc, e po cùn so lizèinza,
 Al ciamò Bertuldein lé in so presèinza.

E a i spianò una filâ pr al sbali fatt,
 Cùn una vòus ch'al paré al campanazz,
 Es i vlé dar di púgn in-t-al mustazz;
 Lú s'tols d'sòtta, e quèll sgnòur arrabbé d'fatt,
 I mandò dri dla zèint fein in-t-la strâ,
 Per dari una timpèsta d'bastunâ.

In te sola confido, Bertuldein
 S'mess a far ch'al pareva una saiètta,
 Ma'l suzzêss per so dsgrazia arzimaldètta,
 Ch'un laché i era dri ch'paré un uslein,
 E un scappuzzott ch'al dé, fú al so tracoll,
 Ch'ogn volta al-i acuié tra cap e coll.

L'andò tant fein che 'l gamb i tegnen dri,
 Òura d' zà, òura d' là, in dov al psseva,
 E al laché ch' mnava zò, quant fiâ l'aveva,
 Se stuffò, e al s' arsols d' turnarsen vi;
 Ma Bertuldein era tant spavintâ
 Ch' al còurs piú d' un mêzz mei fora d' zittâ.

L' è un animal la dsgrazia ch' fa spavèint,
 Ch' è traditòura, es fa d' ògn' erba un fass;
 Per scapparla, a n' n' accid slungar i pass,
 Ch' la sà arzúnzr, e la còrr piú fort dèl vèint.
 Guai a qu' usèll ch' è nad in tresta vall,
 E a qu' asen ch' n' è pssú nassr un bòn cavall.

Bertuldein stracc e pest dal pavirâ,
 Fort ansand al s' fermò ch' a n' psseva piú,
 E vdènd ch' al cust a n' i aveva piú qlú,
 Al s' mess a sdèir dri a un foss per ciappar fiâ;
 E pinsand al Duttòur, al dseva spèss:
 Chi è causa dèl so mal, pianza se stèss.

In st mèintr al vegn passand ún cún du asen
 Cargâ cún del barell d' aqua dèl fiúm,
 Ch' andava alla zittâ; fra i alter nom
 I i dsén Colaquarol, d' quì ch' pappn e ch' taseñ.
 Al vindé l' aqua, ma lú bveva al vein,
 Qué s' fèirma per parlar a Bertuldein.

A i dmandò cossa al feva qusé lé oziòus,
 E s' al vleva andar sig in cumpagni,
 Ch' l' aré vindú anca lú d' qula mercanzi,
 E Bertuldein en' fú brisa ritròus,
 Al s' fé dar l' asen, es andò in tútt el band,
 Per tútt el strâ, chi vol dl' aqua, cridand.

In tútt el cà i andavn, e in tútt i bus,
 A vèndr d' st' aqua, e s' la cavaven bèin,
 Mei, ch' in Bulògna n' s' fa cùn quella d' Rèin,
 E dal paièis s' impraticheva, e d' i us;
 Quand una sira in s' la mèzz' òura d' nott,
 A i cascò un asen dèintr in-t-un ciavgott.

Colaquarol mèzz dsprá, s' mess a cridar,
 Es ciamò dl' altra zèint, ch' vgness aiutari;
 E st pover bstiol cavònn, ch' pr al taffanari
 Feva al sangu, perch' al s' av a scudrinar.
 A Cola i vegn tant al gran diavl adoss,
 Ch' al vleva d' Bertuldein far un sacc d' oss.

Lú, che n'fú nieint qula cossa, s'cavò d'sòtta,
 E per salvars', al mess man a un stradèll,
 Dèinter da un úss al va in s' un terbadèll,
 Dov i era un' assa, ch' era mèzza ròtta;
 E qusé al bur l' era tant fora d' gargam,
 Ch' al cascò zò a tersac in s' un ledam.

Quèst' era la curtsètta d' una stalla
 Dedrì alla casa d' zerta Virtuòusa,
 Brava cantant, ch' s' mess a còrrer smanìusa,
 Cùn del lúm, e dla zèint tútta vsté in gala;
 Ch' la s' era la puvreina spavintá,
 A sentir qustú cridar cm' un adanná.

Súbit ch' i al vestn avlá in qula purcari,
 Chi s' astupava al nas, e chi spudava,
 Chi andava pr aiutarl', e chi scappava,
 Chi stava a vdèirl', e chi turnava vi.
 Al puvrètt da per lú tant al s' inznò,
 Ch' dal gran zampèll, dov l' era, al s' liberò.

Qula sgnera virtuòusa l' arcgnussé:
 Per l' aquarol, ch' la l' avé vest tant volt
 In cà so a vèndri dl' aqua, e lú dsinvolt
 I cuntò la so dsgrazia, e cmod l' è lé.
 Là s' moss a compassiòn, e al tols in casa,
 E lú, ch' n' i avè dsgrüst, feva la rasa.

L'al fé dspuiar d'qui strazz, ch' l' avé puzzleint,
 Es i dé tutt i pagn d' un servitòur,
 Ch' l' aveva, ch' era mort pr un zert dulòur
 In-t-al spdal di amalâ cunvalesaint.
 La i dess, ch' s' al vlé star sig, la l' aztaré;
 Lú arspòus d' sé; e lì i dé la so livré.

Quand a i è stâ una qualc burasca in mar,
 Ech' un legn' va sù d' sòuvra in pizz, e in becon,
 I mariñar, che n' ein brisa mincion,
 Procuren per quèll brod d' savèir nudar;
 E s' mai i arivu in tèrra a salvamèint,
 I han d' posta in quèll servezi l' aqua e 'l vèint.

Bertuldein, ch' n' è mai stâ tant in *arnéis*,
 Al s' gònfià, e cm' al cameina, a n' tòcca tèrra,
 E l' abit un pêzz s' avr, e un pêzz s' assèrra,
 E s' cmèinza a mettr in-t-al bòn gúst Franzèis:
 Al pèinsa d' èsser vsté d' arzèint, e d' or,
 Sebbèin ch' l' è d' mèzza lana al giustacor.

Sintènd cumplimentar la so patròuna,
 L' avé imparâ anca lú d' dir qualc cuslèttà,
 E al studiava vudand in fein la sgièttà,
 De n' far piú 'l riverèinzi alla carlòuna;
 E cm' al vgné da madama al ballèrein,
 Al stava a vdèir a insgnari d' far i inchein.

La mader dla sgnureina Virtuòusa,
 Ch'era una vèccia greinza, grassa, e grossa,
 Fantastica in zert coss, quant mai dir s' possa,
 E in dell'-i alter piasèvla, e poc squasòusa,
 Sèimper la ciaccarava, es feva el cart,
 Es avé i requisit, ch' i voln in st' art.

Sèimper l' avé qualc cossa da cuntar;
 O dèl sgnèr cònt, ch' i avé dunâ un spillòn,
 O d' un zert sguèr marchèis, ch' un abitòn
 I avé purtâ, quand l' andò vî a cantar;
 Sta vèccia in sòmma sèimpr intrava in lezza,
 Òur a quèst, òur a quèll tirand la frezza,

La vleva piúttost bèin a Bertuldein,
 Perch' al feva a so mod in tútt' el coss,
 Ma cún so fiola l' avé sèimper al goss,
 Perch' la n' tgneva, dsé lì, strett i quattrein;
 El gattaiaven insèm, e po s' inmlaven,
 El se vleven sgarmiar, ma po el s' basaven.

Da lòur vgné ògn sira alla conversaziòn,
 Cavalir, e zttadein, duttur, mercant,
 E bèinch' un castradein fúss lú al galant,
 A n' se stiussé fra d' lòur chi fúss al bòn;
 Ün parlava da vsein, ún da luntan,
 Quèll i astricava i pi, qu' alter la man.

A s' cuntava del nov, e po s' zugava
 A trisétt, al cucù, o a banc fallé;
 Chi feva a vacca sig, chi era instizzé,
 A s' perdeva, a s' vinzeva, mo a n' s' pagava;
 E la vèccia i dsé a tútt què all' arruganta:
 Sèinza quattrein, patroni, l' orb en' canta.

Mai un regal se vdeva in tútt un ann
 Ch' i n' cascaven d'quèll mal, perch' i ern arsur,
 Al sprunâ i n' i abadaven, es staven dur,
 E i n' ern bon, che da arscaldari el scrann.
 Qualc volta el fêst al vgneva al musichein,
 Ch' la regalava d' zizl, e d' lazarein.

Ùn d' qui, ch' cundusn in volta i furastir,
 Vegn dalla sgnoura per purtari avvis,
 Ch' l' era arrivâ divers Milord' inglis,
 Ch' la sira vleven vgnirla a riverir.
 Lì i dess ch' i eren patron, ch' i vgnessen pur,
 E qué tútta la cà s' mess in sussur.

La Virtuòusa s' arrizzò i cavì,
 Ch' la i sté al dop dsnar attòuren quattr urètt;
 La s' dé la biacca, e sòuvra un po d' russètt,
 E la s' fé i maruné dinanz, e d' dri;
 La s' pruvò la marmotta, e la bernacca,
 E al papiliòn la s' mess, ch' n' i piase un' acca.

La s' mess, e po s' cavò piú d' trèinta volt
 L' andrié d' stoffa, e anc quella d' bruccâ,
 Quèlla dal pezz d' arzèint, e qu' arcamâ,
 E al spècc' i fé po vdèir quella, ch' va tolt.
 Finalmèint cùn l' arloi, guant, e brazzal,
 Quand la fù vsté, la n' stava gnanc tant mal.

La sira l' arrivò sti cavalir,
 E al mèster, cùn tútt quant i leccardein,
 E dòp dòu mella prufundessm inchein
 I s' messu a sedr, e po cminzonn a dir:
 Chi eren vgnú pr ammirar la so virtù,
 S' la i vlé far grazia, e ògn bris s' livayen sù.

Li s' mess tussènd un poc a scaracciar,
 Es dsé, ch'la n'era in vòus, e ch'a i dspiaseva,
 Ch'la i aré servé mal, perchè l'aveva
 Un catar, ch'l'era un mèis, ch'la n'pssé cantar.
 Per cunfirmarl' al mèstr in pi s' livò,
 E squas cún la pirúcca al fé un falò.

Infein po la cantò piú d' un' arièta,
 E qui sgnòuri dsén tútt: o cara! bravà!
 Chi trava vi la têsta, e chi s' smaniava,
 Chi stà incantâ, e chi dal gúst par ch' tètta;
 Chi suspira, e va in brod, chi tas, chi crida,
 Ch'al paré, ch'i tuccassn al zil cún 'l dida.

Bertuldein vegn a far la so figura,
 Cún dòu sòttcòpp in man cún al caffè,
 Tant imbruiâ, ch' a n' savé movr un pé;
 Ch' l' aré fatt redr i tue qula cargadura,
 La so patròuna al ciama, e 'l barbazagn,
 Da goff i arbalta ògn cossa sú pr i pagn.

Qué madr, e fiola s' messn a far dla túbba,
 Tútt s' livònn sú, e ògn ún dseva la so,
 Lì s' guardava al dinanz, e po alla co,
 Ch' sta cossa i vgné in-t-al cularein dla rúbba,
 La dess a Bertuldein: va fa i fatt tò,
 Pr en'pssèir dir, chi ròmp paga, e i sgduzz ein sù.

Sta cunfusiòn fú causa, ch' tútt i Inglis
 Fénn al so cumplimèint, es andònn vi,
 Cmod' anc fé tútt al rèst dla cumpagni,
 E al donn i arstò da far di prolg di mis.
 Ma quell piú, ch' i brusava era al regal,
 Ch' el cherdevèn d' avèir, es fénn cayall.

El villani, ch' tuccònn a Bertuldein,
 I strappazz, e 'l maldziòn, en' s' pòn cuntar,
 Basta savèir, ch' el i fénn fein alcar
 Quèll caffè, ch' era in tèrra, stand zò chein;
 La Virtuòusa in qula gran stezza dsé:
 Allòn, cmèinz' a cavar zò qula livrè.

La vèccia al vlé scusar, e 'l litigaven,
 Ch' la zòvna n' al vlè in cà assolutamèint,
 E pur cùn st gran zanzúm, e st cridamèint,
 Al mal, ch' era suzzèss en' rimediaven.
 El-i andònn a lètt bruntland tútt arrabbiâ,
 E Bertuldein pianzeva, ch' n' avé znâ.

La mader, ch' a i premeva st pover diavel,
 S' livò a bunòura, es al ciamò anca lù;
 La i dess: mi fiola in cà la n' t' i vol piú,
 Ch' t' sintess iersira, cmod la mnava el tavel.
 E cm' la s' è mess in tèsta un' upiniòn
 Al n' i la cavaré guanc Zizeròn.

La i dé un bigliètt, e po i insgnò la cà
 D' un zert Nudar so amig, d' lé poc luntan,
 E la dess, ch' a i al dess in propria man,
 Ch' l' aré trovâ un patròn, ch' era cmod va;
 E lù la ringraziò dsènd di strambúcc'
 E po i basò la man cùn 'l luzzl' ai ucc'

A s' pssré dir, ch' l' era iúst cmod è 'l ballòn,
 Quand l' è in aier mandâ, ch' cùn piú al va in alt,
 Piú fort in tèrra al casca, es fa di salt,
 Es búzca calz, e púgn sèinza dscherziòn;
 Ch' in-t-el sòu dsgrazi a n' trova altra curtsi,
 Che dal patròn, ch' i va a suppiar dedri.

Bertuldein andò súbit dal Nudar,
 Ch'era berlus da un occ', e a i dé'l bigliett,
 E dòp ch'al l'av bèin lét, fagand l'uccett,
 A i dess: per servitour mig t' toi a star,
 Maguarda bèin ch'l'è scrett sòvra alla porta:
 Dèintr in sta cà a i èintra sòul chi porta.

Al le mnò sú, e po ciamò la serva,
 E a i dess: a-i-ho tolt st zòuvn al mi servezi,
 Al m'è arcmandâ, e i m' disen ch'al n'ha vezi,
 S'l'è quésé, a i vrò bèin, basta mo ch'al s'cunserva;
 Insignai tútt i us dla cà, e fav' servir,
 E arcurdav' bèin che n' nassa del chimir.

Da lé a un poc l' andò vi, e Bertuldein
 Arstò in cà cún la serva, ch' avé nom
 Sempiterna: qustì i dess al che, e al com,
 Tútt i fatt dèl patròn, tútt qui di vsein;
 L'aveva i cavi, e'l zeì, ch' eren tant biònd,
 Ch'al paré iúst un mlòn dall'-i anem mònd.

Cún st pulastrott la s' prinzipiò a smesdgar,
 E ancora lú i cminzò a guardar d'bòn occ;
 Ma lì ch' savé al fatt so in fein a un fnocc'
 Cún drittura al merlott zèirca d' invsciar.
 La fa l' innuzinteina, e la ritròusa,
 Per tirarel' bèin sú tant, ch' al la spòusa.

Al Nudar era d' balla cún sta streia,
 Perch' l' avé gúst, ch' al negozi suzdess,
 A i lassa al camp, al vèd, es en' zittess,
 E mai i arriva adoss, es n' i sgumbeia.
 Un dé a i lassò in cà sul, spaszand per l' ort,
 Intant ch'l' andò a far far tstamèint a un mort.

Lòur attacònn buttazz, es vegnn' al strètt,
 E insèm s' prumessn, es fénn' al so cuntratt.
 Al Patròn turnò a cà, ch' i tgné adaccatt,
 E lòur i dessn ògn cossa stiètt, e nètt.
 Lú alla prema mustrò un po d' renitèinza,
 E po fé dars' la man lé in so presèinza.

I fénn la so scrittura, e la i dé in dota
 Zèint lir, un lét, dòu cass, e trèi banzol,
 Zeinq scrann, una spartura, e un armariol,
 E po dell'-i alter tatter, ch' ern in nota.
 A s' fé 'l nozz, e i sténn tútt in gran algrì,
 E Bertuldein n' savè nieint d' truvì.

I viveven cùn pas, e 'l guerz Nudar
 I tgnèva in cà, es era bèin servé.
 Ma dòp tri mis la Sempiterna un dé
 La s' mess a trar di zig, e squas a urlar:
 So maré súbit còurs a piú non poss,
 E al truvò un ragazzòn nad grand e gross.

L' arstò una statua d' zèss, tútt incantá,
 E a n' savé cossa s' dir vdènds' in sta sena,
 Ch' a st mònd úna sé fatta i gran Bibiena
 N' han mai fatta aqusé vèira, e qusé bèin dsgnâ;
 E al dseva da per lú ch' al paré matt:
 Ia sé poc tèimp s' fa un lavurir sé fatt?

S' ògn tri mis la in fa ún, me arò in puc ann
 Un eserzit in cà; mo cmod farò-ia
 A dari da magnar? cmod durarò-ia?
 Oh puvrètt me, quèst è stá un gran ingann!
 E mèinter ch' l' era dâ in sta gran dspraziòn,
 L' arriyò a cà in bòn pùnt al so Patròn.

Ch' intèis al fatt, i dess; ch' alligramèint
 Al stess pur, perch' in fein ch' viv al fúss stâ,
 Mai nieint dèl so bisògn i srev mancâ,
 E ch' al s' srè arcurdà d' lú in-t-al so tстамèint.
 Bertuldein tirò innanz sèinz' alter fiacc,
 Magnand, e bvènd cún la tèsta in-t-al sacc.

Intant la Sempiterna impaiulâ,
 Allivava al ragazz al mei, ch' la psseva,
 So maré stava in cà, es la serveva,
 Cún al cor quiet, cuntèint, e cunsulâ.
 E al Nudar s'a n' vols dar mai piú in qui grúpp,
 A i cunvgneva d' la cà purtar sú i cúpp.

Bertuldein, che s' stuffava d' star quse a stècc,
 S' trovò di amig, pr andar a cunversar,
 Ma al s' sinteva da tútt spess minciunar,
 Cún fari dri cridand al vers dèl bècc;
 E un dé fra i alter, i s' i messn a dir,
 Ch' a torr muier i era chersú al zimir,

Al puvrètt arrabiâ per tal ingiuria,
 Còrr a cà in frèzza dalla Sempiterna,
 Ch' era dvintâ tant quant è una lanterna,
 E al cmèinza a strepitar, es va in gran furia,
 Digand: ch' per causa so l' era stâ fecc
 Al cavrari in-t-la cumpagni di becc.

Lé poc luntan a s' i atruvava al guerz,
 Ch' sintènd tútt quell pladur, i arrivò adoss,
 E a Bertuldein, ch' vlé far al braganoss,
 A i fé calar l' argoi piú di dù terz;
 E po i cminzò a cuntar cún bona pas,
 Perch' a n' dess mèint a ciacr al seguèint cas.

E a i dess: un dé pr al mònd s' mess a viazar
 Un om vècc, e un ragazz cún un asnètt,
 Al prem a muntar sú al fú al tusètt,
 Perch' al vècc n' i piaseva d' cavalcar,
 Dla zèint trovònn, ch' s' i messn a cridar dri:
 Guarda! al zòuvn è a cavall, e al vècc va a pi.

Lòur per fari tasèir fénn al cuntrari,
 E al vècc muntò sú lú, lassand ch' andass
 A pi al tusètt; e i n' aven fatt dis pass,
 Ch' i trovònn dl'altra zèint, ch' cmiuzò a cridari
 Digand: vergògna! guarda là quell vcciazz,
 Al va a cavall, es manda a pi al ragazz.

Perch' i tasessn al smuntò prèst al prem,
 E i stimònn bèin d' mandar l' asnètt a sdoss,
 E caminand a pi tútt du dri a un foss,
 I dénn in d' i altr umur piz, ch' n' era i prem;
 Ch' i fénn la baia dri, perch' i lassaven
 L' asn a sdoss, e lòur matt a pi s' n' andaven.

Cgnussènd, ch' i dsén al vèir, i muntònn sú
 Tútt du a cavall, e i staven comdamèint;
 Ma poc luntan i intupònn dl'altra zèint,
 Ch' s' i messn a strapazar da becc curnú;
 Cún diri: guarda là ch' poca dscherziòn,
 In du in s' un pover asnètt! a i vré un bastòn.

Lòur smuntònn da cavall piú prèst, che d' frèzza
 E al sumar i ligònn tútt quattr el zamp,
 E i tulénn una stanga lé pr un camp,
 E in spalla i al purtaven cún gran dstrèzza.
 O alloura sé, ch' tútt al popol, ch' i vdeva,
 I feva dri 'l fistiâ, e po rideva.

Sti d'ú puvrett pr ussir fora d' quell tedi,
 Truvònn un fiúm, es i an'gònn dèinter l' asen,
 E a sta maniera liberà i armasen,
 Da tútt el ciacr, es i truvònn remedi.
 Cún al dann d' sti du matt al bsò imparar,
 D' en' dar mèint alla zèint, ch' vol ciaccarar.

Tútt en' parlen per bèin, ma pur tropp spèss
 Tal dà un cunsei, che n' s' al turev per lú,
 Es a s' dà in-t-al minción a n' s' trova piú
 Pareint, nè amig, es si stimâ, cm' è 'l vèss,
 E po al pruverbi dis: od, ved, e tas,
 Ch' a sta maniera t' vivrà sèimpr in pas.

Bertuldein en' fú sòurd a sti parol,
 Es imparò cmod al s' avé a cuntguir,
 Pinsand, ch' a st mònd ogn cossa ha da fuir:
 Fazza bèin chi vol far, dega chi vol;
 Al mess al cor in pas, la mèint a sègn,
 E suzzeda quell ch' s' voia a n' vol piú impègn.

Maré, e muier intant vivén al spèis
 Dèl bòn nudar, ch' i trattava cmod va,
 Dai copp in sú n' zercavn, e i stavn in cà,
 Lassand passar vi trèinta dé pr un mèis:
 I eren sicur d' avèir mattena, e sira,
 Bòn pan, bòn vin, e un gran piatt d' bona zira.

Bertuldein, ch' fein da cein era inclinâ
 Alla virtù d' sugar el bòtt, cm' al psseva,
 Da tútt el-i our volta e prilla, a ch' al vleva,
 L' era in canteina a dar del schicarâ,
 E bèn e spèss al n' era l' òura d' nona,
 Ch' l' avé pulicinèlla, e la simoua.

Una mattena, ch' appèna era dé,
 Al solit 'l andò 'l bòtt a salutar,
 E al bvé tant fort al pore, ch' l' av a cherpar,
 E al ciappò una cagòuna d' quèlli anvé;
 Ch' a i vegn sòn, e al cascò sòtta al calaster,
 E qué al s' indurmintò sèinz' alter dsaster.

Stèin pur zett, fein ch' al dorem, perch' a n' s' dèda,
 Zà ch' al fein del sòu dsgrazi l' è pur zunt;
 E me al mi dscòurs farò virgola, e pùnt,
 Perchè la púzza trop, cùn piú la s' mèda.
 Turnà po quand l' è dsdà, ch' a v' dò parola
 D' cuntary' allòura tùtt al rèst dla fola.

AL FEIN.

L' aboutour a chi ha l'ett.

Lettour galant, a m'vré cùn vù spiegar,
E a deg, dònca a dirò, com srev a dir;
A sò, ch' a m' intindrì sèinza finir,
Pr esèimpi, o verbi grazia, al mi parlar.

A sòn iúst cmod è quèll, ch'èintra in-t-un mar,
Al paralèll è bòn, stâm' a sintir,
Ch' vada là cùn dl' argoi, e cùn dl' ardir,
E po ch's' trova... a n'sò dir, a n'm'vré imbruiar.

Iúst, cmod è un sumarein, ch' va là da franc,
Ch' del volt scapúzza.... a m' arrivâ zâ a iosa,
Zioè ch' al par cvèll d' bòn, es è un calanc.

Zert vù m' capì, s' a vli, quèst è qula cossa,
Ch' a voi mo dir, ch' avâ dscherziòn almanco
D' lassar i spein, e coier sòul la rosa.





ENDIZ

DEL CUMPOSIZIÒN CUNTGÑÚ

IN ST TOM SÈTT.

FOLA	VIII.	El sètt Clumbein	pag.	1
	IX.	Al Corv	»	17
	X.	La superbia castigâ	»	28
		Egloga quarta	»	33

GIORNATA QUEINTA.

FOLA	I.	L' Oca	»	35
	II.	I Mis	»	42
	III.	Dpeint-Smalt	»	49
	IV.	La Brocca d' or	»	58
	V.	Sòul, Louna, e Tali	»	72
	VI.	La Sapièinta	»	80
	VII.	I zeinqu fradi	»	87
	VIII.	Ninlein e Ninleina	»	94
	IX.	I tri Zider	»	104
	X.	La Finadga d' tútt el fol.	»	119

El Dsgrazi d' Bertuldein dalla Zèina pag.	125
Cant Prem	» 135
Cant Secònd	» 145
Cant Terz	» 155
Cant Quart.	» 165
Cant Queint	» 175
Cant Sèst	» 189

FÈIN DL' ENDIZ.

Die 15 Iulii 1840.

IMPRIMATUR

Fr. PET. CAI. FELETTI O. P. S. Th. Mag. I. G. S. O.

Die 16 Iulii 1840.

IMPRIMATUR

JOSEPH A. PASSAPONTI Pro-Vic. Gen.

